

徐珂選輯

歷代白話詩選

黃葆真題

徐 珂 選 輯

歷 代 白 話 詩 選

商 務 印 書 館 發 行

中華民國十四年九月三號  
中華民國二十二年六月國難後第一版

\*\*\*\*\*  
版 翻  
權 印  
所 必  
有 究  
\*\*\*\*\*

歷代白話詩選一冊

(47221)

每冊實價國幣肆角捌分

外埠酌加運費匯費

編輯者 徐 珂

校訂者 葉 紹 鈞

發行兼印刷者 商務印書館  
上海河南路

發行所 商務印書館  
上海及各埠

(本書校對者楊曾勳)

# 目錄

## 晉

五古二首……………一

## 唐

五絕三十九首……………二

五律三首……………七

五古二十三首……………八

七絕七十五首……………一四

七律一首……………二五

七古八首……………二五

## 五代

五絕九首……………二八

五律一首……………二九

五古一首……………二九

七絕二十二首……………三〇

七律一首……………三三

七古五首……………三三

## 宋

五絕二十四首……………三五

五律十七首……………三八

五古十六首……………四二

六言四首……………四六

七絕三百首……………四七

七律二十一首……………八七

七古二十首(樂府附)……………九二

## 金

五絕二首……………九八



五律一首	九八
五古二首	九八
七絕十一首	九九
七古三首	一〇〇

元

五絕二十二首	一〇二
五律七首	一〇五
五古一首	一〇六
六言三首	一〇七
七絕三十五首	一〇七
七律六首	一一二
七古三首	一一四
明	
五絕一百三十八首	一一五

五律十九首	一三三
五古三十二首	一三七
六言十一首	一四四
七絕一百四十二首	一四六
七律六首	一六六
七古二十二首	一六七

清

五絕七十五首	一七四
五律二十七首	一八四
五古五十六首	一九〇
六言九首	二〇四
七絕一百七十七首	二〇五
七律十七首	二二九
七古六十一首(樂府附)	二三三

# 歷代白話詩選

## 晉

### 五古 二首

問來使 陶潛

爾從山中來

早晚發天目

山名在武林

我屋南窗下

今生幾叢菊

薔薇葉已抽

秋蘭氣常馥

歸去來山中

山中酒應熟

責子 陶潛

白髮被兩鬢

肌膚不復實

雖有五男兒

總不好紙筆

阿舒已二八

懶惰故無匹

阿宣行志學

而不愛文術

雍端年十三

不識六與七

通子垂九齡

但覓梨與栗

天運苟如此

且進杯中物

# 唐

## 五絕 三十九首

### 泛若耶谿 丘爲

結廬若耶裏 左右若耶水 無日不釣魚 有時向城市

溪中水流急 渡口水流寬 每得樵風便 往來殊不難

一川草長綠 四時那得辨 短褐衣妻兒 餘糧及雞犬

日暮鳥雀稀 稚子呼牛歸 住處無鄰里 柴門獨掩扉

### 早行遇雪 石召

荒郊昨夜雪 羸馬又須行 四顧無人迹 雞鳴第一聲

### 閑夜酒醒 皮日休

醒來山月高 孤枕羣一作琴書裏 酒渴漫思茶 山童呼不起

### 感興 李端

香爐最高頂 中有高人住 日暮下山來 月明上山去

路中口號 皇甫曾

還鄉不見家 年老眼多淚 車馬上河橋 城中好天氣

尋隱者不遇 一作孫革訪  
羊尊師詩 賈島

松下問童子 言師採藥去 只在此山中 雲深不知處

城上吟 子蘭

古塚密於草 新墳侵官古 道 城外無閑地 城中人又老

新嫁娘 王建

三日入廚下 洗手作羹湯 未諳姑食性 先遣小姑嘗

幼女詞 施肩吾

幼女纔六歲 未知巧與拙 向夜在堂前 學人拜新月

江南行三首 錄一 崔顥

君家何處住 妾住在橫塘 停船暫借問 或恐是同鄉

長干行 崔顥

家臨九江水 來去九江側 同是長干人 生小不相識

溪居 裴度

門逕俯清溪 茆簷古木齊 江塵飛不到 時有水禽啼

牧童 劉駕

牧童見客拜 山果懷中落 晝日驅牛歸 前谿風雨惡

溪口雲 張文姬

一片溪口雲 纔向溪中吐 不復歸溪中 還作溪中雨

崔九弟欲往南山馬上口號與別 王維

城隅一分手 幾日還相見 山中有桂花 莫待花如霰

雜詩三首 錄二 王維

家住孟津河 門對孟津口 常有江南船 寄書家中否

君自故鄉來 應知故鄉事 來日綺窗前 寒梅著花未

旅眠 元稹

內外都無隔 帷幰不復張 夜眠兼客坐 同在火爐牀

招東鄰 白居易

小榼二升酒 新簾六尺牀 能來夜話否 池畔欲秋涼

山下宿 白居易

獨到山下宿 靜向月中行 何處水邊碓 夜春雲母聲

夜雨 白居易

早蛩啼復歇 殘燈滅又明 隔窗知夜雨 芭蕉先有聲

遺愛寺 白居易

弄石臨谿坐 尋花遶寺行 時時聞鳥語 處處是泉聲

商山路有感 白居易

萬里路長在 六年身始歸 所經多舊館 大半主人非

訪皇甫七 白居易

上馬行數里 逢花傾一杯 更無停泊處 還是覓君來

池上 白居易

小娃撐小艇 偷採白蓮迴 不解藏蹤跡 浮萍一道開

秋浦歌李白

秋浦田舍翁 採魚水中宿 妻子張白鸚 結罾映深竹

自遣李白

對酒不覺眠 落花盈我衣 醉起步溪月 鳥還人亦稀

巴女詞李白

巴水急如箭 巴船去若飛 十月三千里 郎行幾歲歸

月李白

小時不識月 呼作白玉盤 又疑瑤臺鏡 飛在碧雲端

春曉孟浩然

春眠不覺曉 處處聞啼鳥 夜來風雨聲 花落知多少

尋菊花潭主人不遇孟浩然

行至菊花潭 村西日已斜 主人登高去 雞犬空在家

宿永陽寄璨律師韋應物

遙知郡齋夜 凍雪封松竹 時有山僧來 懸燈獨自宿

一作欲知昨夜  
風花落無多少

同衾子秋齋獨宿

韋應物

山月皎如燭

風霜時動竹

夜半鳥驚栖

窗間人獨宿

江村夜泊

項斯

日落江路黑

前村人跡稀

幾家深樹裏

一火夜漁歸

送張十八歸桐廬

劉長卿

婦人乘野艇

帶月過江村

正落寒潮水

相隨夜到門

次峽石

韓愈

數日方離雪

今朝又出山

試憑高處望

隱約見潼關

### 五律 三首

冬夕喜友生至

李咸用

天涯行欲遍

此夜故人情

鄉國別來久

干戈還未平

燈殘偏有燄

雪甚卻無聲

多少新聞見

應須語到明

夜到漁家

張籍



漁家在江口 潮水入柴扉 行客欲投宿 主人猶未歸  
竹深村路暗 月出釣船稀 遙見尋沙岸 春風動草衣

上都當事 張窈窕

昨日買衣裳 今日賣衣裳 衣裳俱賣盡 羞見嫁時箱  
有賣愁應緩 無時心轉傷 故園戎馬隔 何處事蠶桑

五古 二十三首

古風 一作 李紳

春種一粒粟 秋成<sup>一作收</sup>萬顆子 四海無閑田 農夫猶餓死  
鋤禾日當午 汗滴禾下土 誰知盤中餐 粒粒皆辛苦

失題 寒山

城北仲家翁 渠家多酒肉 仲翁婦死時 弔客滿堂屋  
仲翁自身亡 能無一人哭 喫他柘樹者 何太冷心腹

失題 寒山

我見百十狗 箇箇毛鬚 臥者渠自臥 行者渠自行  
投之一塊骨 相與唯啖啖牛皆切爭 良由爲骨少 狗多分不平

醒後 劉駕

醉臥芳草間 酒醒日落後 壺觴半傾覆 客去應已久 不記折花時 何得花在手

樊上漫作 元結

漫家郎亭下 復在樊水邊 去郭五六里 扁舟到門前 山竹遶茅舍 庭中有寒泉  
西邊雙石峯 引望堪忘年 四鄰皆漁父 近渚多閑田 且欲學耕釣 於斯求老焉

村居苦寒詩 白居易

八年十二月 五日雪紛紛 竹柏皆凍死 況彼無衣民 迴觀村閭間 十室八九貧  
北風利如劍 布絮不蔽身 唯燒蒿棘火 愁坐夜待晨 乃知大歲寒 農者尤苦辛  
顧我當此日 草堂深掩門 褐裘覆絪被 坐臥有餘溫 幸免飢凍苦 又無隴畝勤  
念彼深可愧 自問是何人

夏日 白居易

東窗晚無熱 北戶涼有風 盡日坐復臥 不離一室中 中心本無繫 亦與出門同

秋遊原上 白居易

七月行已半 早涼天氣清 清晨起巾櫛 徐步出柴荆  
閑攜弟姪輩 同上秋原行 新粟未全赤 晚瓜有餘馨  
自我到此村 往來白髮生 村中相識久 老幼皆有情  
是時新雨足 禾黍夾道青 見此令人飽 何必待西成  
露杖筇竹冷 風襟越蕉輕 依依田家叟 設此相逢迎  
留連向暮歸 樹樹風蟬聲

聞哭者 白居易

昨日南鄰哭 哭聲一何苦 云是妻哭夫 夫年二十五  
云是母哭兒 兒年十七八 四鄰尚如此 天下多天折  
余今過四十 念彼聊自悅 從此明鏡中 不嫌頭似雪  
今朝北里哭 哭聲又何切 乃知浮世人 少得垂白髮

食後 白居易

食罷一覺睡 起來兩甌茶 舉頭看日影 已復西南斜  
樂人惜日促 憂人厭年賒 無憂無樂者 長短任生涯

郭虛舟相訪 白居易

朝暖就南軒 暮寒歸後屋 晚酒一兩杯 夜棊三數局

寒灰埋暗火 曉焰凝殘燭 不嫌貧冷人 時來同一宿

登村東古塚 白居易

高低古時塚 上有牛羊道 獨立最高頭 悠哉此懷抱  
迴頭向村望 但見荒田草  
村人不愛花 多種粟與棗 自來此村住 不覺風光好  
花少鶯亦稀 年年春暗老

喜友至留宿 白居易

村中少賓客 柴門多不開 忽聞車馬至 云是故人來  
況值風雨夕 愁心正悠哉  
願君且同宿 盡此手中杯 人生開口笑 百年都幾迴

村居臥病三首 錄一 白居易

種黍三十畝 雨來苗漸大 種韭二十畦 秋來欲堪刈  
望黍作冬酒 留韭爲春菜  
荒村百物無 待此養衰療 蒼廡備陰雨 補褐防寒歲  
病身知幾時 且作明年計

慵不能 白居易

架上非無書 眼慵不能看 匣中亦有琴 手慵不能彈  
腰慵不能帶 頭慵不能冠  
午後恣情寢 午時隨事殮 一殮終日飽 一寢至夜安  
飢寒亦閑事 況乃不飢寒

閑居自題 白居易

門前有流水 牆上多高樹 竹逕遶荷池 縈迴百餘步  
波閑戲魚鼈 風靜下鷗鷺  
寂無城市喧 渺有江湖趣 吾廬在其上 偃臥朝復暮  
洛下安一居 山中亦備去  
時逢過客愛 問是誰家住 此是白家翁 閉門終老處

自在 白居易

杲杲冬日光 明暖真可愛 移榻向陽坐 擁裘仍解帶  
小奴搥我足 小婢搔我背  
自問我爲誰 胡然獨安泰 安泰良有以 與君論梗概  
心了事未了 飢寒迫於外  
事了心不了 念慮煎於內 我今實多幸 事了心和會  
內外及中間 了然無一礙  
所以日嗚中 向君言自在

何處堪避暑 白居易

何處堪避暑 林間背日樓 何處好追涼 池上隨風舟  
日高飢始食 食竟飽還遊  
遊罷睡一覺 覺來茶一甌 眼明見青山 耳醒聞碧流  
脫襪閑濯足 解巾快搔頭  
如此來幾時 已過六七秋 從心至百骸 無一不自由  
拙退是其分 榮耀非所求  
雖被世間笑 終無身外憂 此語君莫怪 靜思吾亦愁  
如何三伏月 揚尹謫虔州

狂言示諸姪 白居易

世欺不識字 我忝攻文筆 世欺不得官 我忝居班秩 人老多病苦 我今幸無疾  
人老多憂累 我今婚嫁畢 心安不移轉 身泰無牽率 所以十年來 形神閑且逸  
況當垂老歲 所要無多物 一裘煖過冬 一飯飽終日 勿言舍宅小 不過寢一室  
何用鞍馬多 不能騎兩匹 如我優幸身 人中十有七 如我知足心 人中百無一  
傍觀愚亦見 當已賢多失 不敢論他人 狂言示諸姪

贈夢得白居易

前日君家飲 昨日王家宴 今日過我廬 三日三會面 當歌聊自放 對酒交相勸  
爲我盡一盃 與君發三願 一願世清平 二願身強健 三願臨老頭 數與君相見

春歸終南山松龍舊隱 李白

我來南山陽 事事不異昔 卻尋溪中水 還望巖下石 薔薇緣東窗 女蘿繞北壁  
別來能幾日 草木長數尺 且復命酒樽 獨酌陶永夕

石壕吏 杜甫

暮投石壕村 有吏夜捉人 老翁踰牆走 老婦出門看 吏呼一何怒 婦啼一何苦  
聽婦前致詞 三男鄴城戍 一男附書至 二男新戰死 存者且偷生 死者長已矣

室中更無人 惟有乳下孫 有孫母未去 出入無完裙  
老嫗力雖衰 請從吏夜歸  
急應河陽役 猶得備晨炊 夜久語聲絕 如聞泣幽咽  
天明登前途 獨與老翁別

七絕 七十五首

雨過山村 王建

雨裏雞鳴一兩家 竹溪村路板橋斜 婦姑相喚浴蠶去 閑看一作著中庭梔子花

江村卽事 司空曙

罷釣歸來不繫船 江村月落正堪眠 縱然一夜風吹去 只在蘆花淺水邊

過長林湖西酒家 司空曙

湖草青青三兩家 門前桃杏一般花 遷人到處唯求醉 閒說漁翁有酒賒

赴東都別牡丹 令狐楚

十年不見小庭花 紫萼臨開又別家 上馬出門回首望 何時更得到京華

夜宴南陵留別 李嘉祐

雪滿前庭月色閑 主人留客未能還 預愁明日相思處 匹馬千山與萬山

百一作白花原一作王昌齡出塞行李頎

百一作白花原頭望京師一作盡期黃河水流無已時一作窮秋一作天曠野行人一作絕馬首東一作西來  
知是誰

諂山中叟施肩吾

老人今年八十幾口中零落殘牙齒天陰偃僂帶嗽行猶向巖前種松子

山院觀花施肩吾

初來唯見空樹枝今朝滿院花如雪門前爲報諸少年明日來遲不堪折

遊山南寺殷堯藩

山中盡日無人到竹外交加百鳥鳴昨日小樓微雨過櫻桃花落晚風晴

採蓮孫光憲

菡萏香連十頃陂小姑貪戲採蓮遲晚來弄水船頭溼更脫紅裙裹鴨兒

戲題湖上常建

湖上老人坐磯一作鳥頭湖裏桃花水卻流竹竿嫋嫋波無一作白際不知何者吞吾鉤

送李山人歸山陸暢



來從千山萬山裏 歸向千山萬山去 山中白雲千萬重 卻望人間不知處

官倉鼠 曹鄴

官倉老鼠大如斗 一作牛 見人開倉亦不走 健兒無糧百姓飢 誰遣朝朝入君口

回鄉偶書二首 錄一 賀知章

少小離家老大回 鄉音無改鬢 一作面 毛衰 兒童相見不相識 笑 一作借 問客從何處來

淮上漁者 鄭谷

白頭波上白頭翁 家逐船移浦浦風 一尺鱸魚新釣得 兒孫吹火荻花中

別修覺寺無本上人 鄭谷

松上閑雲石上苔 自嫌歸去夕陽催 山門握手無他語 祇約今冬看雪來

舟行 潘咸

平沙極浦無人度 猶繫孤舟寒草西 半夜起看潮上月 萬山中有一棹啼

寄河上段十六 一作王維詩 盧象

與君相識 一作見 卽相親 聞道君家住 一作在 孟津 爲見行舟試借問 客中時有洛陽人

失題 一作寒山詩 拾得

自從到此天台寺 誦經早已幾冬春 山水不移人自老 見卻多少後生人

畫松 景雲

畫松一似真松樹 且待尋思記得無 曾在天台上見 石橋南畔第三株

宿靜林寺 靈一

山寺門前多古松 溪行欲到已聞鐘 中宵引領尋高頂 月照雲峯凡幾重

寄夫 陳玉蘭

夫戍邊關妾在吳 西風吹妾妾憂夫 一行書信千行淚 寒到君邊衣到無

營州歌 高適

營州少年厭原野 狐裘蒙茸獵城下 虜酒千鍾不醉人 胡兒十歲能騎馬

逢賈島 張籍

僧房逢著款冬花 出寺行吟日已斜 十二街頭春雪遍 馬蹄今去入誰家

與賈島閒遊 張籍

水北原南草色新 雪消風暖不生塵 城中車馬應無數 能解閒行有幾人

送蜀客 張籍

蜀客南行聽碧雞 木棉花發錦江西 山橋日晚行人少 時見猩猩樹上啼

成都曲 張籍

錦江近西春水綠 新雨山頭荔枝熟 萬里橋邊多酒家 遊人愛向誰家宿

山禽 張籍

山禽毛如白練帶 栖我庭前栗樹枝 繡猴半夜來取栗 一雙中林向月飛

感春 張籍

遠客悠悠任病身 誰家池上又逢春 明年各自東西去 此地看花是別人

送李侍郎赴常州 賈至

雪晴雲散北風寒 楚水吳山道路難 今日送君須盡醉 明朝相憶路漫漫

雨晴 王駕

雨前初見花間蕊 雨後兼無葉裏花 蛺蝶飛來過牆去 卻疑春色在鄰家

宋氏林亭 薛能

地溼莎青雨後天 桃花紅近竹林邊 行人本是農桑客 記得春深欲種田

城西訪友人別墅 雍陶

澧水橋西小路斜 日高猶未到君家 村園門巷多相似 處處春風枳殼花

訪友人幽居二首 錄一 雍陶

落花門外春將盡 飛絮庭前日欲高 深院客來人未起 黃鸝枝上啄櫻桃

出都門 羅鄴

青門春色一花開 長到花時把酒盃 自覺無家似潮水 不知歸處去還來

塞上曲 周朴

一陣風來一陣沙 有人行處沒人家 黃河九曲冰先合 紫塞三春不見花

雪後宿同軌店上法護寺鐘樓望月 元稹

滿山殘雪滿山風 野寺無門院院空 煙火漸稀孤店靜 月明深夜古樓中

和樂天高相宅 元稹

莫愁已去無窮事 漫苦如今有限身 二百年來城裏宅 一家知換幾多人

答張籍因以代書 白居易

憐君馬瘦衣裘薄 許到江東訪鄙夫 今日心閑天又暖 可能扶病暫來無

開元九詩書卷 白居易

紅箋白紙兩三束 半是君詩半是書 經年不展緣身病 今日開看生蠹魚

村夜 白居易

霜草蒼蒼蟲切切 村南村北行人絕 獨出前門望野田 月明蕎麥花如雪

九日寄行簡 白居易

摘得菊花攜得酒 遠村騎馬思悠悠 下邳田地平如掌 何處登高望梓州

箬峴東池 白居易

箬峴亭東有小池 早荷新荇綠參差 中宵把火行人發 驚起雙棲白鷺鷥

寄題楊萬州四望樓 白居易

江上新樓名四望 東西南北水茫茫 無由得與君攜手 同凭欄干一望鄉

木芙蓉花下招客飲 白居易

晚涼思飲兩三盃 召得江頭酒客來 莫怕秋無伴醉客 水蓮花盡木蓮開

早出晚歸 白居易

早起或因攜酒出 晚歸多是看花迴 若拋風景長閑坐 自問東京作底來

晚出尋人不遇 白居易

盤暴不乘乘晚涼 相尋不遇亦無妨 輕衣穩馬槐陰下 自要閑行一兩坊

觀游魚 白居易

遠池閑步看魚遊 正值兒童弄釣舟 一種愛魚心各異 我來施食爾垂鉤

睡覺偶吟 白居易

官初罷後歸來夜 天欲明前睡覺時 起坐思量更無事 身心安樂復誰知

少年問 白居易

少年怪我問如何 何事朝朝醉復歌 號作樂天應不錯 憂愁時少樂時多

二月二日 白居易

二月二日新雨晴 草芽菜甲一時生 輕衫細馬春年少 十字津頭一字行

香山避暑二絕 白居易

六月灘聲如猛雨 香山樓北暢師房 夜深起凭欄干立 滿耳潺湲滿面涼

紗巾草履竹疎衣 晚下香山蹋翠微 一路涼風十八里 臥乘籃輿睡中歸

西樓獨立 白居易

身著白衣頭似雪 時時醉立小樓中 路人迴顧應相怪 十一年來見此翁

早春獨登天宮閣 白居易

天宮日暖閣門開 獨上迎春飲一盃 無限遊人遙怪我 緣何最老最先來

前有別柳枝絕句夢得繼和云春盡絮飛留不得隨風好去落誰家

又復戲答 白居易

柳老春深日又斜 任他飛向別人家 誰能更學孩童戲 尋逐春風捉柳花

遊趙村杏花 白居易

遊村紅杏每年開 十五年來看幾迴 七十三人難再到 今春來是別花來

閑眠 白居易

暖牀斜臥日曛腰 一覺閑眠百病銷 盡日一殮茶兩椀 更無所要到明朝

力疾山下吳村看杏花十九首 錄二 司空圖

近來桃李半燒枯 歸臥鄉園只老夫 莫算明年人在否 不知花得更開無

昨日黃昏始看回 夢中相約又銜杯 起來聞道風飄卻 猶擬教人掃取來

山中與幽人對酌 李白

兩人對酌山花開 一杯一杯復一杯 我醉欲眠卿且去 明朝有意抱琴來

夜雨寄北 李商隱

君問歸期未有期 巴山夜雨漲秋池 何當共翫西窗燭 卻話巴山夜雨時

別家 杜牧

初歲嬌兒未識爺 別爺不拜手吒叉 拊頭一別三千里 何日迎門卻到家

山行 杜牧

遠上寒山石徑斜 白雲生處有人家 停車坐愛楓林晚 霜葉紅於二月花

夏晝偶作 柳宗元

南州溽暑醉如酒 隱几熟眠開北牖 日午獨覺無餘聲 山童隔竹敲茶臼

酬柳郎中春日歸揚州南郭見別之作 韋應物

廣陵三月花正開 花裏逢君醉一迴 南北相過殊不遠 暮潮從去早潮來

因省風俗訪道士姪不見題壁 韋應物

去年澗水今亦流 去年杏花今又折 山人歸來問是誰 還是去年行春客

子規啼 韋應物

高林滴露夏夜清 南山子規啼一聲 鄰家婦婦抱兒泣 我獨展轉何時明



烏衣巷 劉禹錫

朱雀橋邊野草花 烏衣巷口夕陽斜 舊時王謝堂前燕 飛入尋常百姓家

隄上行 劉禹錫

酒旗相望大隄頭 隄下連橋隄上樓 日暮行人爭渡急 槳聲幽一作輒滿中流

元和十一年自朗州召至京戲贈看花諸君子 劉禹錫

紫陌紅塵拂面來 無人不道看花回 玄都觀裏桃千樹 盡是劉郎去後栽

酬李穆見寄 劉長卿

孤舟相訪至天涯 萬轉雲山路更賒 欲掃柴門迎遠客 青苔黃葉滿貧家

山中 一作盧 盧仝

飢食松花渴飲泉 偶從山後到山前 陽坡軟草厚如織 困一作與鹿麕相伴眠

盆池五首 錄一 韓愈

老翁真箇似童兒 汲水埋盆作小池 一夜青蛙鳴到曉 恰如方口釣魚時 原註方口地名

過始興江口感懷 韓愈

憶作兒童隨伯氏 南來今只一身存 目前百口還相逐 舊事無人可共論

七律 一首

八月十五日夜湓亭望月 白居易

昔年八月十五夜 曲江池畔杏園邊 今年八月十五夜 湓浦沙頭水館前  
西北望鄉何處是 東南見月幾迴圓 臨風一歎無人會 今夜清光似往年

七古 八首

宿洄溪翁宅 元結

長松萬株遶茅舍 怪石寒泉近巖下 老翁八十猶能行 將領兒孫行拾稼  
吾羨老翁居處幽 吾愛老翁無所求 時俗是非何足道 得似老翁吾即休

漁父歌 高適

曲岸深潭一山叟 駐眼看鉤不移手 世人欲得知姓名 良久問他不開口  
笋皮笠子荷葉衣 心無所營守釣磯 料得孤舟無定止 日暮持竿何處歸

東溪待蘇戶曹不至 張萬頃

洛陽城東伊水西 千花萬竹使人迷  
臺上柳枝臨岸低 門前荷葉與橋齊  
日暮待君君不見 長風吹雨過青溪

行見月 王建

月初生 居人見月一月行 月行一年十二月 強半馬上看圓缺 百年歡樂能幾何 在家見少行見多 不緣衣食相驅遣 此身誰願長奔波 饑中有帛倉有粟 豈向天涯走碌碌 家人見月望我歸 正是道上思家時

牧童詞 李涉

朝牧牛 牧牛下江曲 夜牧牛 牧牛村口谷 荷蓑出林山雨細 蘆管臥吹沙草綠 亂插蓬蒿箭滿腰 不怕猛虎欺黃犢

江行 吳融

來時風 去時雨 蕭蕭颯颯春江浦 敲敲側側海門帆 軋軋啞啞洞庭櫓

答張五弟 王維

終南有茅屋 前對終南山 終年無客常閉關 終日無心長自閑 不妨飲酒復垂釣 君但能來相往還

橫江詞李白

人言橫江好 儂道橫江惡 一風三日吹倒山 白浪高於瓦官閣

# 五代

## 五絕 九首

邨行 成彥雄

曖曖邨煙暮 牧童出深塢 騎牛不顧人 吹笛尋山去

春早 韋莊

聞鶯纔覺曉 閉戶已知晴 一帶窗間月一作日 斜穿枕上生一作明

夏日東齋 曹松

三庚到秋伏 偶來松檻立 熱少清風多 開門放山入

田上 崔道融

雨足高田白 披蓑半夜耕 人牛力俱盡 東方殊未明

春晚 崔道融

三月寒食時 日色濃於酒 落盡牆頭花 鶯聲隔原柳

江村 崔道融

日暮片帆落 江村如有情 獨對沙上月 滿船人睡聲

再到山陽尋故人不遇 李中

維舟登野岸 因訪故人居 亂後知何處 荆榛匝敝廬

欲問當年事 耕人都不知 空餘堤上柳 依舊自垂絲

野釣 韓偓

細雨桃花水 輕鷗逆浪飛 風頭阻歸棹 坐睡倚蓑衣

五律 一首

田家三首 錄一 李建勳

長愛田家事 時時欲一過 垣籬皆樹槿 廳院亦堆禾

病果因風落 寒蔬向日多 遙聞數聲笛 牛晚下前坡

五古 一首

感懷詩 韓熙載

僕本江北人 今作江南客 再去江北遊 舉目無相識  
金風吹我寒 秋月爲誰白 不如歸去來 江南有人憶

七絕 二十二首

春來燕 杜荀鶴

我屋汝嫌低不住 雕梁畫閣也知寬 大須穩擇安巢處 莫道巢成卻不安

牧童 呂巖

草鋪橫野六七里 笛弄晚風三四聲 歸來飽飯黃昏後 不脫蓑衣臥月明

清明日 李建勳

他皆攜酒尋芳去 我獨闔門好靜眠 唯有楊花似相覓 因風時復到牀前

漁父二首 李中

偶向蘆花深處行 溪光山色晚來晴 漁家開戶相迎接 稚子爭窺犬吠聲  
雪鬢衰髯白布袍 笑攜鱸鯉換村醪 慇懃留我宿溪上 釣艇歸來明月高

小兒垂釣 胡令能

蓬頭稚子學垂綸 側坐莓苔草映身  
路人借問遙招手 怕得魚驚不應人

與小女 韋莊

見人初解語嘔啞 不肯歸眠戀小車  
一夜嬌啼綠底事 爲嫌衣少縷金華

暴雨 韋莊

江村入夏多雷雨 曉作狂霖晚又晴  
波浪不知深幾許 南湖今與北湖平

書齋漫興 翁承贊

官事歸來夜雪埋 兒童燈火小茅齋  
人家不必論貧富 惟有讀書聲最佳

漁者 張喬

首戴圓荷髮不梳 葉舟爲宅水爲居  
沙頭聚看人如市 釣得澄江一丈魚

雞 崔道融

買得晨雞共雞語 常時不用等閑鳴  
深山月黑風雨夜 欲近曉天啼一聲

村墅 崔道融

正月二月村墅間 餘糧未乏人心寬  
南隣雨中揭屋笑 酒熟數家來相看



鄴中感舊 劉象

頃年曾住此中來 今日重遊事可哀  
憶得幾家歡宴處 家家家業盡成灰

招友人宿 貫休

銀地無塵金菊開 紫梨紅棗墮莓苔  
一泓秋水一輪月 今夜故人來不來

上歸州刺史代通狀二首 懷濬

家在閩山西復西 其中歲歲有鶯啼  
如今不在鶯啼處 鶯在舊時啼處啼  
家在閩山東復東 其中歲歲有花紅  
而今不在花紅處 花在舊時紅處紅

夜歸 行遵

山寺門前多古松 溪行欲到已聞鐘  
中宵引領尋高頂 月照雲峯凡幾重

秋霖夜憶家 韓偓

垂老何時見弟兄 背燈愁泣到天明  
不知短髮能多少 一滴秋霖白一莖

醉著 韓偓

萬里清江萬里天 一村桑柘一村煙  
漁翁醉著無人喚 過午醒來雪滿船

訪隱者遇沈醉書其門而歸 韓偓

曉入江村覓釣翁 釣翁沈醉酒缸空 夜來風起閑花落 狼藉柴門鳥徑中

卽目 韓偓

書牖暗記移花日 洗甕先知醞酒期 須信閑人有忙事 早來衝雨覓漁師

自遣 羅隱

得意高歌失卽休 多愁多恨亦悠悠 今朝有酒今朝醉 明日愁來明日愁

七律 一首

登石壁禪師水閣有作 杜荀鶴

石壁早聞僧說好 今來偏與我相宜 有山有水堪吟處 無雨無風見景時  
漁父晚船分浦釣 牧童寒笛倚牛吹 畫人畫得從他畫 六幅應輸八句詩

七古 五首

宿深村 貫休

行行一宿深村裏 雞犬豐年鬧如市 黃昏見客合家喜 月下取魚厚塘水

春晚書山家屋壁二首 貫休

柴門寂寂黍飯馨 山家烟火春雨晴 庭花濛濛水泠泠 小兒啼索樹上鷺  
水香塘黑蒲森森 鴛鴦瀾鵝如家禽 前村後壘桑柘深 東鄰西舍無相侵  
蠶娘洗繭前溪淥 牧童吹笛和衣浴 山翁留我宿又宿 笑指西坡瓜豆熟

蜀中送人遊廬山 隱巒

君遊正值芳春月 蜀道千山皆秀發 溪邊十里五里花 雲外三峯兩峯雪  
君上匡山我舊居 松蘿拋擲十年餘 君行試到山前問 山鳥只今相憶無

牧童 隱巒

牧童見人俱不識 盡著芒鞋戴笠笠 朝陽未出衆山晴 露滴蓑衣猶半溼 二月三月時  
平原草初綠 三箇五箇騎羸牛 前村後村來放牧 笛聲纔一舉 衆稚齊歌舞 看看白日  
向西斜 各自騎牛又歸去

# 宋

## 五絕 二十四首

曉行 孔平仲

枕上杜鵑啼 恩恩早起時 出門天未曉 月在杏花枝

江 許景衡

江邊問舟子 潮落幾時回 野店無燈火 還須明月來

郊野 趙葵

白鳥衝煙去 山僧渡水來 竹籬茅舍外 忽見野梅開

冬日 俞紫芝

茆舍竹籬短 梅花吐未齊 晚來溪徑側 雪壓小橋低

春日 利登

雨過苔猶溼 風來戶半開 閑花忽落盡 啼鳥自飛來

深秋吟 邵雍

終歲都無事 四時長有花 小車乘興去 所到便如家

圩田 胡仲參

圩田依澗水 入夏未栽禾 不是春耕晚 山中寒氣多

九月八日戲作兩絕句示妻子 錄一 陳與義

小甕今朝熟 無勞問酒家 重陽明日是 何處是黃花

薄暮 陳起

寂寥誰作侶 耿耿一寒缸 薄暮西風急 呼童掩卻窗

次東坡先生韻 錄四 張孝祥

微涼入船窗 秋水滿湘浦 過盡前頭灘 又得夜來雨

悠然望江南 日出煙靄微 倚門雙白髮 屈指待兒歸

漁師未賣魚 船小風蕩漾 得錢瞥波去 不怕江流漲

朝發方良磯 暮宿白水灣 寬作一月程 須見江南山

春雨 陸游

片片紅梅落 織織綠草生 無端夜來雨 又礙出門行

西邨 郭祥正

遠近皆僧刹 西邨八九家 得魚無賣處 沽酒入蘆花

道上吟 錄二 楊萬里

樹隱重重竹 溪明曲曲峯 林深那有寺 烟遠忽聞鐘

城中雪一尺 山中雪一丈 地上都已消 卻在松梢上

與子上野步 楊萬里

籬落深深巷 茅茨小小家 冬晴好行脚 何處不梅花

夜歸 趙汝鎡

爲愛清秋月 徘徊步水濱 夜歸驚犬吠 錯認是生人

後圃 趙汝鎡

澆花惟要蚤 芟草不知名 新竹生來巧 南牆補數莖

萬田道中 劉安上

水闊疑無路 雲深僅有山 兒童划小艇 出沒稻塍間

乍歸 劉克莊

兒童嬉膝下 母子話燈前 卻憶江湖上 家書動隔年

宿山中四首錄一 劉克莊

城中人怪我 清旦買芒鞋 君若知其趣 還應日來

觀梅 戴敏

三杯暖寒酒 一榻竹亭前 爲愛梅花月 終宵不肯眠

五律 十七首

曉行山間 真山民

出門誰是伴 只約瘦藤行 一二里山徑 兩三聲曉鶯  
亂峯相出沒 初日乍陰晴 僧舍在何許 隔林鐘磬清

得家書 于石

久客秋又晚 思家夢屢驚 空階聞葉落 隔樹見鐙明  
親老貧長健 兒癡學未成 淒涼今夜月 照我故鄉情

谿邨 王鑑

水路隨山轉 谿清踏軟沙 斜陽曬魚網 疎竹露人家  
行蟹上枯岸 飢禽銜落花 老翁分石坐 閑話到桑麻

憶太夫人 文天祥

三生命孤苦 萬里路酸辛 屢險不一險 無身復有身  
不忘聖天子 幾負太夫人 定省今何處 新來夢寐頻

旅館 朱繼芳

僕行方請息 旅館復相招 小市三家聚 前邨五里遙  
茅柴侵熱飲 松葉帶生燒 猶有斜陽在 行吟忽斷橋

苕溪 朱繼芳

維舟古祠下 野飯就魚羹 坐聽篙人說 行逢繹路平  
居民難問姓 溪鴨自呼名 天目無由到 沿洄更幾程

月夜 邵雍

雨霽風自好 秋深天未寒 移牀就階下 看月出林端



有酒欲共飲 無賓可同歡 他時遇良友 此景復求難

思家 胡仲參

夜夢到山居 回頭千里餘 屢傳歸去信 不得寄來書  
小徑應添筍 荒畦欠理蔬 客程頻得雨 田里事何如

北使還襄邑道中作九月三十日 徐鉉

九月三十日 獨行梁宋道 河流激似飛 林葉翻如掃  
程遙苦晝短 野迴知寒早 還家亦不閑 要且還家了

懷如順上人 徐照

西湖湖上寺 一別二三年 舊住房長閉 新栽樹已圓  
空多相憶夢 不得寄來篇 喜見隣僧說 歸期是臘前

泛湖至東涇 陸游

春水六七里 夕陽三四家 兒童牧鵝鴨 婦女治桑麻  
地僻衣襟古 年豐笑語譁 老夫維小艇 半醉摘藤花

除夕宿臨川 楊萬里

一臘天頻雪 千山梅未花 終年不爲客 除夕便辭家  
雨又垂垂落 風仍故故斜 難開愁裏眼 只益鬢邊花

放船 楊萬里

岸岸人家住 門門水面開 老翁扶杖立 稚子看船來  
一夜鳴春雨 諸灘漲綠醅 順流行自快 更著北風催

月臺夜坐 楊萬里

秋日非無熱 秋宵至竟清 老夫連數夕 露坐到三更  
風急星明滅 雲行月送迎 追憶追不得 歡卻偶然成

溪邨鄒登龍

兀兀小橋西 人家住繞溪 雲山當戶入 竹樹出檐齊  
風急花初盡 春深鶯亂啼 稻畦新雨足 稚子亦鉏犁

夏夜 趙汝鐸

今夕暑差甚 芒屨階下行 除燈檐月上 卻扇竹風生  
病骨坐怕久 靜吟詩易成 夜涼思睡去 樓鼓已三更

出城送客不及步至溪上二首錄一 蘇軾

送客客已去 尋花花未開 未能城裏去 且復水邊來  
父老借問我 使君安在哉 今年好風雪 會見麥千堆

五古 十六首

代小子廣孫寄翁翁 孔平仲

爹爹來密州 再歲得兩子 牙兒秀且厚 鄭鄭已生齒 翁翁尙未見 既見想歡喜  
廣孫讀書多 寫字輒兩紙 三三足精神 大安能步履 翁翁雖舊識 伎倆非昔比  
何時得團聚 盡使羅拜跪 婆婆到壘下 翁翁在省裏 太婆八十五 寢膳近何似  
爹爹與嫗嫗 無日不思爾 每到時節佳 或對飲食美 一一俱上心 歸期當屈指  
昨日又開爐 連天北風起 飲闌卻蕭條 舉目數千里

人生一世吟 邵雍

前有億萬年 後有億萬世 中間一百年 做得幾何事  
又況人之壽 幾人能百歲 如何不喜歡 強自生憔悴

心安吟 邵雍

心安身自安 身安室自寬 心與身俱安 何事能相干  
誰謂一身小 其安若泰山 誰謂一室小 寬如天地間

贈徐彥 徐積

昔者見君面 記得秋風時 遺我壽陽書 故人情可知  
一從西城居 復來南郭住 時時還憶君 不知在何處

贈陳糾 徐積

子來別我時 送子到巷口 約去百步地 出巷更引首  
乃與二三子 回所舍依依 故人情可見 何用送行詩

哭張六 并序 徐積

張六子莊死矣十一月十三日夜四更時積用素服望其所居哭之哭且爲詩明且涕泣以書  
使孤甥老老致於柩前嗚呼哀哉

欲視目已瞑 欲語口已噤 欲動肉已寒 欲書手已硬 惟有心上熱 惟存心中悲  
此熱須臾間 此悲無休時 所悲孤兒寒 所悲孤兒飢 苦苦復苦苦 此悲遂入土

牧牛兒 陸游

南村牧牛兒 赤脚踏牛立  
衣穿江風冷 笠敗山雨急  
長陂望若遠 隘巷忽相及  
兒歸牛入欄 煙火茆簷溼

武岡路 彭汝礪

朝行黃茅岡 暮宿黃茅驛  
一岡復一岡 岡岡如絡繹  
一驛復一驛 思親頭易白  
何時自此還 行李兼晨夕

暮宿半塗 楊萬里

朝日在我東 夕行在我西  
我行日亦行 日歸我未歸  
平生太疎放 似黠亦似癡  
如何今日行 不以衾枕隨  
借令今夕寒 我醉亦不知  
如何今日行 不以衾枕隨  
勢須就人宿 遠近或難期  
倒睡莫解衣

柴步灘 楊萬里

江關水不聚 分爲三五灘  
遂令客子舟 上灘一一難  
山有樹百尺 樹圍屋數間  
水底復生洲 沙溼有未乾  
從此洲愈多 安得水更寬  
憶從嚴陵歸 水落不能湍  
拖以數童僕 折卻十竹竿  
今茲過吾舟 念昔猶臆寒

觀魚 楊萬里

老夫不禁熱 跣足坐瓦鼓 臨池觀游魚 定眼再三數 魚兒殊畏人 欲度不敢度  
一魚試行前 似報無他故 衆魚初欲隨 幡然竟回去 時時傳一杯 忽忽日將暮

舟中新暑止酒 楊萬里

新暑酒不宜 作熱妨夜睡 不如看人飲 亦自有醉意 彼飲吾爲嘸  
所羨過於味 同舟笑吾癡 吾不羨渠醉 安知醉與醒 誰似誰不似  
一作是

明發四望山過都昌縣入彭蠡湖 楊萬里

衆船爭取疾 直赴兩山口 吾船獨橫趨 甘在衆船後 問來風不正  
法當走山右 不辭用盡力 要與風相就 忽然挂孤帆 吾船卻先走

歲暮歸自城中一病垂死病起遣悶 錄一 楊萬里

食罷游東園 慨然傷我懷 昨日病臥時 自謂不復來 入門大風起 萬松聲頓哀  
病骨念不堪 欲行重徘徊 徘徊南齋前 小倦坐苔階 齋前花不多 上有兩古梅  
似知我至此 頃刻忽盡開 多情梅間竹 偃風亦奇哉 不知喜風舞 爲復怯風回  
萬象皆迎春 我獨老病催 明日能來否 且歸憩誠齋

贈犁春謝耕道樓鑰

歸耕十三年 此來殊欲然 一犁正春雨 君行欲何處  
我方買紅船 重歸尋舊廬 君亦早歸來 勿荒負郭田

梵天寺僧守詮小詩清遠可愛次韻

杭州圖經梵天寺在鳳凰山

蘇軾

但聞煙外鐘 不見煙中寺 幽人行未已 草露溼芒屨 惟應山頭月 夜夜照來去

六言 四首

東塔六言二首 孫覲

翠竹含風嫋嫋 青山照水重重 窗戶無人半掩 一龕香霧空濛  
偶與白雲共出 忽隨倦鳥俱還 明日重尋舊路 桃花流水空山

華亭道間記所見二首 黃文雷

楊柳陰中稻廩 芙蓉花裏柴扉 日夕牛羊下隴 老翁稚子同歸  
田舍雞豚壯長 江鄉魚蟹鮮肥 是處茅柴新熟 老翁醉倒扶歸

七絕 三百首

江村 蔡襄

黯淡江村春日斜 汀洲芳草野田花 孤舟橫笛向何處 竹外炊煙一兩家

探春 鄭獬

雪後清風特地斜 柳條疎瘦未藏鴉 與君試去探春信 看到梅花第幾花

江村晚眺二首 戴復古

數點歸鴉過別村 隔溪漁笛遠相聞 菰蒲斷岸潮痕溼 日落空江生白雲

江頭落日照平沙 潮退漁船閣岸斜 白鳥一雙臨水立 見人驚起入蘆花

見山居可喜 戴復古

一溪盤曲到階除 四面青山畫不如 修竹罩門梅夾路 詩人居處野人居

題鄭子壽野趣 戴復古

菜花園圃槿花籬 麥滿前坡水滿池 野老橫竿攔鴨過 牧兒攜笛倚牛吹

題黃州謝深道國正山菴 戴復古

就荒山竹重抽筍 新種池荷晚著花 意象全然似村落 又添茅屋兩三家



船過桐江懷郭聖與 戴復古

只言君在桐江住 及到桐江不見君 日暮空山獨惆悵 不知又隔幾重雲

淮村兵後 戴復古

小桃無主自開花 煙草茫茫帶晚鴉 幾處敗垣圍故井 向來一一是人家的

僑寄山居霍然幾月凡見之於目聞之於耳者輒綴成絕句名之曰

田園雜興非敢比石湖聊以寫一時閒適之趣云爾 錄一 王志道

幕幕黃雲麥壟秋 牧童橫笛倒騎牛 百錢買得葫蘆扇 持向田頭蔽日頭

雨中過周氏莊 林昉

吠犬柴門扣未開 滿身風雨立蒼苔 翠禽一箇高枝上 啄得殘桃落地來

題村居 張煒

村居何處見時節 春去春來自一年 誰與兒童話寒食 也將楊柳插門前

數舍茅茨簇水涯 傍簷一樹早梅花 年豐便覺村居好 竹裏新添賣酒家

韶口山家 蕭解

茅屋一區山四圍 門前蘋蘆帶菱池 兒童似駭儒衣到 兩兩三三壁縫窺

亂定到邑 蕭解

蒙蒙野草自榮華 破屋夾茅人賣茶 滿巷門基帶甌石 有時認得故人家

東藏一 儲泳

靈竺山前滿徑苔 遊春車馬可曾來 共君便欲攜尊去 一樹海棠花正開

歷崎道中 方豐之

漠漠春陰接海低 濛濛晚雨傍山飛 半碛古埭無人過 時有村童護鴨歸

龍華晚望 林家

喜鵲寒鴉噪晚田 山前茅舍起炊煙 小橋敗葉風頻掃 斜日平蕪犢自眠

天華寺 呂夷簡

賀家湖上天華寺 一一軒窗向水開 不用閉門防俗客 愛閒能有幾人來

新昌道中 林表民

殘村時有兩三家 繚繞清溪路更賒 客裏不知春去盡 滿山風雨落桐花

鬻廬 宋氏

自嘆年來刺骨貧 吾廬今已屬西鄰 殷勤說與東園柳 他日相逢是故人

溪莊 王堃

旋栽楊柳爲溪步 更結笆籬當水門  
家在深林人不見 江村新月幾黃昏

春郊晚行 何基

村煙淡淡日沈西 岸柳陰陰水拍隄  
江上晚風吹樹急 落紅滿地鷓鴣啼

入杭 戴表元

曹江白酒樊江飯 處處當年客似家  
垂老重來舊相識 春風只有野桃花

竹裏 王安石

竹裏編茅倚石根 竹莖疎處見前村  
閑眠盡日無人到 自有春風爲掃門

鍾山晚步 王安石

小雨輕風落楝花 細紅如雪點平沙  
槿籬竹屋江村路 時見宜城賣酒家

畚田調錄一 王禹偁

北山種了種南山 相助力耕豈有偏  
願得人間皆似我 也應四海少荒田

宿紅林驛遇交代王給事 王十朋

路入紅林林未紅 相逢俱是白頭翁  
郵亭燈火一尊酒 明日君西我向東

漁父吟 王鑑

竹絲籃裏白魚肥 日落江頭換酒歸 只恐明朝風雪凍 老妻連夜補蓑衣

可笑口號七章 錄四 文同

可笑庭前小兒女 栽盆貯水種浮萍 不知何處聞人說 一夜一根生七莖  
可笑陵陽太守家 閑無一事只栽花 已開漸落并纔發 長作亭中五色霞  
可笑此公何太惑 讀書寫字到三更 也知學得終無用 自肯辛勤比後生  
可笑兒孫亦滿眼 朝朝庭下立參差 謂言飽讀詩書去 憔悴如翁亦好爲

出山 文天祥

日日騎馬來山中 歸時明月長在地 但願山人一百年 一年三百餘番醉

望城難 文天祥

自來百里半九日 望見城頭路愈長 薄命只愁追者至 人人搖槳渡滄浪

發高沙 文天祥

曉發高沙臥一航 平沙漠漠水茫茫 舟人爲指荒煙岸 南北今年幾戰場

暑中雜興 錄一 方岳

是非不到野溪邊 只就梧桐聽雨眠 睡熟不知溪水長 鶯鷺飛上釣魚船

種花口處 孔平仲

蜀葵萱草陳根在 金鳳雞冠著地栽 併作暑天庭戶景 深叢時見一花開

小軒窠石 史彌寧

密傍軒窗開小池 巧安窠石俯清漪 道人不愛閑花草 祇種餅蕉和水榭

春暮同社會飲張園小樓分韻得飛字 史彌寧

殘紅委地水平池 楊柳陰陰鶯亂飛 山色滿樓新雨後 一簾風絮卷春歸

題野人家 朱熹

茆簷竹落野人家 只麼悠悠闋歲華 田父把犁寒雨足 牧兒吹笛晚風斜

南屏三首 錄一 朱翌

正當晝永六十刻 久坐僧齋烹雨前 滿園菜花開向夏 一隻蝴蝶飛上天

橋西 朱繼芳

雲淡風微日未低 瘦藤扶到小橋西 林花過雨相爭發 谷鳥無人自在啼

晚眺 朱繼芳

鳥飛欲盡暮煙橫 一笛西風萬里晴 山外有山青不見 微雲映出卻分明

稚子 利登

雙雙稚子戲柴關 搏土爲人半印錢 更過十年那有此 短蓑蓬笠種荒田

夜坐 李綱

春夜沈沈燈影明 卷書兀坐忽三更 不知船外風多少 但聽滿江波浪聲

索酒 李觀

不醉多愁醉多病 幾迴愛酒又停杯 死生若是有天命 莫放愁來任病來

村 宋伯仁

又是江南割稻天 家家兒女笑相牽 芙蓉占斷清溪水 獨許漁人醉鱖船

晚春溪行 回文 宋伯仁

青山數里一溪橫 片片花邊舞燕輕 耕過水田新雨足 晴天曉色柳風清

西湖晚歸 宋伯仁

一輪紅日倚青山 只見湖光數里間 聽得畫船人說到 錢塘門外夜深關

有感 宋伯仁

窗戶清清半掩門 小兒揩淚立黃昏 幾多心事無人問 獨看梅花月半痕

戲作 宋伯仁

青梅黃盡雨無多 柳影重重午日過 忽聽隔籬人語笑 采蓮船子上新河

村田樂 宋伯仁

打稻天如二月天 滿村和氣樂豐年 田翁爛醉身如舞 兩個兒童策上船

聽雨 宋伯仁

凍雨瀟瀟未肯晴 洒窗聲似煮茶聲 山童酷得鄰家酒 炊粟鑪頭獨自傾

農家 宋伯仁

茅屋三間權作籬 白頭婆子葺冬衣 兒童飽飲黃昏後 短笛橫吹喚不歸

村居 吳可

擊井耕田僅萬家 農夫農婦罌絲麻 夜來得雨陂塘足 村北村南罷踢車

村巷詩 吳可

村巷深深桑柘煙 園林寂靜落花天 柴門有客忙相揖 搖手低聲蠶大眠

日落 沈遼

日落沙頭山已昏 飢鳥投暝下前村 誰云野客無多事 步出林間自撚門

夏日卽事 何應龍

野土生煙草樹焦 彤彤日脚火雲燒 池邊自掬青荷葉 分付山童蓋藥苗

吳蠶 何應龍

正是吳蠶出火時 交交窗外一禽啼 溪西有葉高難采 遙見青裙上竹梯

曉窗 何應龍

桃花落盡李花殘 女伴相期看牡丹 二十四番花信後 曉窗猶帶幾分寒

謝西臺張元伯雪中送詩 邵雍

洛城雪片大如手 爐中無火罇無酒 凌晨有人來打門 言送西臺詩一首

南園賞花 邵雍

三月初三花正開 閒同親舊上春臺 尋常不醉此時醉 更醉猶能舉大盃  
花前把酒花前醉 醉把花枝仍自歌 花見白頭人莫笑 白頭人見好花多

垂柳 邵雍

門前垂柳正依依 更被東風來往吹 忘了自家今已老 卻疑自是少年時



月陂閑步 邵雍

因隨芳草行來遠 爲愛清波歸去遲  
獨步獨吟仍獨坐 初涼天氣未寒時

孤山隱居書壁 林逋

山水未深猿鳥少 此生猶擬別移居  
直過天竺溪流上 獨樹爲橋小結廬

晨起 周文璞

閉門不與俗人交 元晏春秋日日抄  
清曉偶然隨鶴出 野風吹折白櫻桃

山居書事 周文璞

茶蘼架倒無人架 全似老夫狂醉時  
昨夜一場溪雨橫 又漂苔蘚到花枝

夜深 周弼

虛堂人靜不聞更 獨坐書齋對夜燈  
門外不知春雪霽 半峯殘月一溪冰

溪西李家 邱葵

秧鉞初出未全青 昨夜江頭冷雨晴  
日暮採樵人去後 一痕淡月亂蛙鳴

次韻德父 姜夔

籬落青青花倒垂 避人黃鳥雨中飛  
西郊寂寞無車馬 時有溪童賣菜歸

次石湖書扇韻 姜夔

橋西一曲通村 岸閣浮萍綠有痕 家住石湖人不到 藕花多處別開門

九月十三日飲湖上 姚勉

閉門十日厭塵埃 纔見湖光眼便開 最愛平堤楊柳外 幾舟撐去幾撐來

思江南筍蕨 姚勉

先生亟去理山齋 筍蕨春甜味正佳 一夜東風催變綠 筍吹成竹蕨成柴

丙辰祇召入京道信州題一杯亭 姚勉

山行頗覺興悠哉 到此何妨更一杯 爛醉不須愁世事 明朝醉醒又愁來

趙福王飲一杯於此

過界首 胡仲參

幾重嶺隔幾重灣 路入濃濃煙雨間 獨立溪橋重回首 前頭已是劍州山

晚雨 胡仲參

勃姑鴉舅叫樓西 春色陰晴景不齊 濃墨四垂收未起 明邊一片夕陽低

游白石山觀音寺 胡仲參

綠陰深處石橋橫 纔入山門意便清 林下一僧無个事 時來倚樹聽泉聲

雨中胡仲參

愁坐黃昏掩客扉 風翻桑葉滿庭飛 孤燈挑到寒更盡 猶有行人帶雨歸

訪徐叔詠教授山菴迷道而作 俞德鄰

上山下山山歷歷 松篁不改路非昔 杖藜聊欲問山翁 山空葉落無人跡

到徐叔詠居 俞德鄰

攀藤躡石訪幽客 茅屋參差松樹隔 山童聞語不應門 古木千重鳴格磔

夏晝 俞桂

輕搖羽扇著輕紗 閒汲清泉自煮茶 綠是夏來無甚雨 小池猶未有荷花

溪流 俞桂

雲腳纔行又復開 一聲隱隱只空雷 家僮忽報溪流漲 知是前村落雨來

卽事 俞桂

落楊花春事了 小池新綠雨添痕 育鷺時節寒猶在 村落人家半掩門

道間 施樞

一溪新綠漲晴沙 傍岸疎籬八九家 桑葉又抽麻正長 綠陰深處響纜車

田家 范成大

晝出耘苗夜績麻 村莊兒女各當家 兒童未解供耕織 也傍桑陰學種瓜  
年年 范協

年年如燕一還家 又訪幽居過水涯 風雨滿城春欲暮 山中猶有碧桃花

和子我晚歸 晁沖之

七里灣即宿烏飛 六家店上行人稀 渡口有船招不得 歸來稚子候柴扉

戲呈魏評事 徐積

我向燈前置酒盃 南軒北戶一時開 如今正是花時節 且放春風數路來

古陵橋 徐璣

西橋西岸柳成叢 春去春來歲歲同 偶被東風吹落絮 又隨流水過橋東

題張提舉西野 徐照

渡頭風景如前日 誰種桃花在兩邊 未晚人家門戶閉 鷺鷥閑立釣魚船

鴈池作 翁卷

包家門外柳垂垂 搖蕩春風滿鴈池 爲是城中最佳處 每經過此立多時

山雨 翁卷

一夜滿林星月白 且無雲氣亦無雷  
平明忽見溪流急 知是他山落雨來

舍外早梅 翁卷

行遍江村未有梅 一花忽向煖枝開  
黃蜂何處知消息 便解尋香隔舍來

野望 翁卷

一天秋色冷晴灣 無數峯巒遠近間  
閒上山來看野水 忽於水低見青山

鄉村四月 翁卷

綠遍山原白滿川 子規聲裏雨如煙  
鄉村四月閑人少 纔了蠶桑又插田

悼舊呈趙紫芝 翁卷

憶向城南共說詩 山民與我定相隨  
如今獨來還獨往 此恨除君人不知

離丹陽 韋驥

人從北固山前去 雲水蒼茫日向西  
今夜渡江何處宿 楊花落盡子規啼

勸酒 韋驥

二月已破三月來 青春白日映樓臺  
勸君更飲一杯酒 一月人生笑幾迴

書齋夜坐 連文鳳

讀罷殘書聽雁聲 西風一榻一青燈 老來清思渾如許 自笑前生莫是僧

月夜獨坐 連文鳳

坐久不聞人語喧 風枝吹動宿禽翻 幾家負卻三更月 未到鐘聲已閉門

吳門道中二首 孫覲

數間茅屋水邊村 楊柳依依綠映門 渡口喚船人獨立 一蓑煙雨溼黃昏

一點炊煙竹裏村 人家深閉雨中門 數聲好鳥不知處 千丈藤蘿古木昏

魏江道上得小菴解裝小榻 孫覲

老柳當門翠十尋 桑麻一曲竊然深 蒼苔滿地無人掃 只有醪醑一架陰

靜節軒二首 錄一 孫覲

蓮葉平鋪塘水滿 棟花半落渚風清 無言獨立蒼茫裏 更聽黃鸝一兩聲

西湖雜興二首 錄一 高九萬

城中無處聽蟬鳴 短策輕鞵晚出城 行到柳陰松影下 恰纔聞得兩三聲

遇畫工來嵩 梅堯臣

朝來又入揚州郭 千萬中人識者誰 唯有來嵩曾畫我 依稀見似昔年時

題南禪院壁二首 錄一 張耒

乞食高僧午未歸 秋庭落葉日暉暉 蕭條古寺松陰下 簷鐸風中乳鴿飛

絕句 張耒

伏暑新除風露清 五更山舍一雞鳴 幽人枕上朦朧睡 臥看東岡次第明

雨歇二首 錄一 張耒

家童取酒衝泥至 酒滿山瓶重莫攜 老子欣然一笑起 開嘗洗盞對山妻

次江州王知府叔堅韻二首 錄一 張孝祥

今朝放纜好天色 過午忽作打頭風 卻望江州纔十里 我船且繫蘆花中

蕓春道中 張孝祥

霜淨波平水落灣 我行正在畫闌間 簾鉤不用怕風日 且看江南江北山

餞翁丹山發南浦 張至龍

鳴鳩語燕近清明 柳絮風輕秧水平 一帶春流多斷岸 盡緣倒柳當橋行

巴嶺 張至龍

處處柴門掩半邊 鶯啼綠樹隔炊烟 竹梯閒倚柔桑畔 定是人家蠶已眠

送人遊姑蘇 張良臣

兒時我亦寄君州 細細聽君說舊遊 處處綠波通酒巷 女郎多在采菱舟

春曉 陳允平

曉風獵獵卷芭蕉 簾幕深深燕子巢 十二畫欄多倚遍 一雙蝴蝶上花梢

早起 陳起

今早神清覺步輕 杖藜聊復到前庭 市聲亦有關情處 買得秋花插小瓶

望曉 陳起

要知筋力衰多少 一覺纔回常了了 鄰鷄無奈五更何 望斷窗紗不能曉

泊舟延平二絕 錄一 陳淵

野梅飄盡喜春歸 又見溪桃片片飛 醉臥暖風呼不醒 亂紅無數點人衣

送存書記 梁棟

一聲兩聲松子落 一片兩片楓葉飛 夕陽在山新月上 道人相伴一僧歸

天台書事 錄一 曹勛



清曉鴉啼睡夢閒 喜聞飛雪滿前山 攬衣忙作披衣意 不問輕寒且凭欄

醉起 許棐

午醉醺醺到日晡 起呼茶盃炷熏爐 隔窗幾點敲花雨 子細聽時卻又無

秋江漁父 許棐

小舟輕似一鷗飛 戀月隨風慣不歸 困臥蘆花深雪裏 夜寒添蓋舊蓑衣

夜意 錄一 陸游

睡覺隣鷄已再啼 蓬窗燈暗雨淒淒 東家蹇驢不用借 明日門前一尺泥

過杜浦橋 陸游

橋外波如鴨頭綠 杯中酒作鵝兒黃 山茶花下醉初醒 卻過西村看夕陽

初冬雜題 錄一 陸游

風橫雲低雨脚斜 一枝柔艣暮咿啞 昏昏醉臥知何處 推起船篷忽到家

東關 陸游

天華寺西艇子橫 白蘋風細浪紋平 移家只欲東關住 夜夜湖中看月生  
煙水蒼茫西復東 扁舟又繫柳陰中 三更酒醒殘燈在 臥聽蕭蕭雨打篷

題剡溪瑩上人梅花小軸 陸游

孤舟清曉下溪灘 爲訪梅花不怕寒 忽有一枝橫竹外 醉中推起短篷看

晚興 陸游

一聲天邊斷雁哀 數籟籬外蚤梅開 幽人耐冷倚門久 送月墮湖歸去來

山茶一樹自冬至清明後著花不已 陸游

東園三日雨兼風 桃李飄零掃地空 惟有山茶偏耐久 綠叢又放數枝紅

初夏錄一 陸游

翦韭醃薑粟作漿 新炊麥飯滿村香 先生醉後騎黃犢 北陌東阡看戲場

雜興錄一 陸游

東家飯牛月未落 西家打稻雞初鳴 老翁高枕葛幪裏 炊餈熟時猶鼾聲

龜堂雜興錄一 陸游

曳杖東岡信步行 夕陽偏向竹間明 丹楓吹盡鴉聲樂 又得霜天一日晴

湖上作錄一 陸游

鵝兒涇口曉山橫 蜻蜓港頭春水生 蘭亭之北是茶市 柯橋以西多觴聲

路乾 陸游

日曬露融步步泥 旬餘不到石泉西 連朝和暖得乾路 喚取鄰翁來杖藜

雨晴風日絕佳 徙倚門外 陸游

一雙芒屨伴筇枝 不用兒扶自出嬉 貪看南山雲百變 舍西溪上立多時

雨後 陸游

雨後涼生病體輕 閑拖拄杖出門行 槐花落盡桐陰薄 時有殘蟬一兩聲

雨中鋤藥 陸游

庭中正苦日卓午 水面忽看雲過西 老子不辭衝急雨 小鋤香帶藥畦泥

秋懷 陸游

園丁傍架摘黃瓜 村女沿籬采碧花 城市尙餘三伏熱 秋光先到野人家

夜投山家 錄一 陸游

生草茨廡荆作扉 數家煙火自相依 大兒飼犢舍邊去 小兒捕魚溪口歸

泛舟過金家埂 贈賣薪王翁 錄一 陸游

老人不復事農桑 點數雞豚亦未忘 洗脚上牀真一快 稚孫漸長解燒湯

秋思錄三 陸游

村南村北鷓鴣鳴 小雨霏霏又作晴 拂枕敲眠不成夢 卻拖藤杖出門行  
出門東行復西行 處處人家打稻聲 小甕醅醅雖未熟 後園楮蕈已堪烹  
桑竹成陰不見門 牛羊分路各歸村 前山雨過雲無迹 別浦潮回岸有痕

小艇 陸游

放翁小艇輕如葉 只載蓑衣不載家 清曉長歌何處去 武林溪上看桃花

村舍 錄一 陸游

露草乾時兒牧羊 朝日出時女采桑 一牀絮被千萬足 不解城中有許忙

村女 陸游

白襦女兒繫青裙 東家西家世通婚 采桑餉飯無百步 至老何曾識別村

初冬雜詠 錄二 陸游

重陽已過二十日 殘菊纔存三四枝 對酒插花君勿笑 從來不解入時宜  
夜窗父子共煎茶 一點青燈冷結花 村落盜清無吠犬 園林月上有啼鴉

自法雲歸 陸游

落日疎林數點鴉 青山缺處是吾家 歸來何事添幽致 小竈燈前自煮茶

晚涼 陸游

笛簾平鋪八尺牀 脫巾高臥對疎篁 近村得雨知何處 此地無風亦自涼

嘉定己巳立秋得膈上疾近寒露乃小愈 陸游

半飢半飽隨時過 無客無書盡日閑 童子貪眠呼不省 狸奴戀煖去仍還

行邁雜篇 錄一 黃庭堅

白白紅紅相間開 三三五五踏青來 戲隨蝴蝶不知遠 驚見行人笑卻回

早作 黃大受

星光欲沒曉光連 霞暈紅浮一角天 乾盡小園花上露 日痕恰恰到窗前

十月初三日自邑夜歸 舒岳祥

北風茅店晚炊遲 吠犬聲中蹋黑歸 谿上人家應夜績 松明一點出疏籬

夢歸 舒岳祥

獨行東阪茅茨屋 回望西牆竹樹坡 愁殺曛黃歸路遠 兵殘人少鬪體多

寧川冷渡 華岳

峯回路轉六七里 林靜鳥啼三四聲 遊女不知行旅恨 一茶留我話平生

宿溪上華岳

夢回斜月掛林端 酒力初消怯夜寒 何處客舟猶未泊 一聲柔艣過前灘

題代度寺 楊萬里

一別重來十五年 殘僧半在寺依然 黃楊當日絕低小 已過危簷也可憐

又題寺後竹亭 楊萬里

行盡空房忽畫欄 竹光和月入亭寒 壁間題字知誰句 醉把殘燈子細看

甲申上元前聞家君不快西歸見梅有感 錄一 楊萬里

官路桐江西復西 野梅千樹壓疎籬 昨來都下筠籃底 三百青錢買一枝

閒居初夏午睡起 楊萬里

梅子留酸軟齒牙 芭蕉分綠上窗紗 日長睡起無情思 閒看兒童捉柳花

松陰一架半弓苔 偶欲觀書又懶開 戲掬清泉洒蕉葉 兒童誤認雨聲來

將至建昌 楊萬里

梅雨芹泥路不佳 悶來小歇野人家 綠萍池沼垂楊裏 初見芙蓉第一花

夏日頻雨 楊萬里

一番暑雨一番涼 眞箇令人愛日長  
隔水風來知有意 爲吹十里稻花香

夏夜追涼 楊萬里

夜熱依然午熱同 開門小立月明中  
竹深樹密蟲鳴處 時有微涼不是風

霜夜望月 楊萬里

人靜蛩喧天欲霜 不眠獨自步風廊  
閒看月走仍雲走 知是雲忙復月忙

小池 楊萬里

泉眼無聲惜細流 樹陰照水愛晴柔  
小荷纔露尖尖角 早有蜻蜓立上頭

舟次西徑 楊萬里

夜來徐汝伴鷗眠 西徑晨炊小泊船  
蘆荻漸多人漸少 鄱陽湖尾水如天

登淨遠亭 楊萬里

池冰愛日未全開 旋旋波痕百皺來  
野鴨被人驚得慣 作羣飛去卻飛回

雪霽出城 楊萬里

梅於雪後較多花 草亦晴初忽幾芽  
河凍落痕餘一寸 殘冰閣在柳根沙

寒食相將諸子游翟園 錄三 楊萬里

鹿葱舊種菊新栽 幽徑深行忘卻回 忽有野香尋不得  
蘭于石背一花開  
小小茅亭短短窗 海棠圍裏柳中央 乍晴萱草渾無力  
落盡梅花尚有香  
兒曹倦走儘從渠 老脚微酸半欲扶 未悉前頭花好否  
且令蜂蝶作前驅

曉登多稼亭 錄二 楊萬里

過雨梅無半箇黃 冬青枝上雪花香 不須更要風吹面  
看著青林意自涼  
雨前田畝不勝荒 雨後農家特地忙 一眼平疇三十里  
際天白水立青秧

午熱登多稼亭 錄一 楊萬里

芒鞋蒲扇頗蕭然 倦倚胡牀不是眠 避暑無藏身去處  
追涼行盡竹旁邊

靜坐池亭 楊萬里

胡牀倦坐起憑欄 人正忙時我正閒 卻是閒中有忙處  
看書纔了又看山  
荷邊弄水一身香 竹裏招風滿扇涼 道是秋來還日短  
秋來閒裏日偏長

檜徑曉步 楊萬里

雨歇林間涼自生 風穿徑裏曉逾清 意行偶到無人處  
驚起山禽我亦驚



七月既望晚歸菱壕 楊萬里

官壕水落兩三痕 正是初秋雨後天 菱荇中間開一路 曉來誰遇采蓮船

穉子弄冰 楊萬里

穉子金盆脫曉冰 綵絲穿取當銀鉦 敲成玉磬穿林響 忽作玻璃碎地聲

小瓶梅花 楊萬里

梅萼才開已亂飛 不堪雨打更風吹 蕭蕭只隔窗間紙 瓶裏梅花總不知

小舟晚興 錄三 楊萬里

簷篷舊屋雨聲乾 蘆葦新簷暖日眠 枕底席邊俱綠水 腳根頭上兩青天

人在非晴非雨天 船行不浪不風間 坐來堪喜還堪恨 看得南山失北山

潮痕初落水猶肥 雨點才來已復微 半濕岸沙危欲落 牽船稚子去如飛

四月休日聞蟬 楊萬里

荔支葉底暑陰清 已有新蟬一兩聲 荷露柳風餐未飽 怪來學語不分明

端午後頓熱 楊萬里

只今新暑已歆然 作麼禁當六月天 飛上風前最涼處 年年輸與柳梢蟬

江上松徑 楊萬里

一日江行百折中 回頭猶見夜來峯 好山十里都如畫 更與橫排一徑松

明發曲阮 楊萬里

雲橫平野近人低 似絮如紗只隔谿 行到谿東元不見 回頭卻復在谿西

宿潮州海陽館獨夜不寐 楊萬里

臘前蚊子已能歌 揮去揮來奈爾何 一隻攪人終夕睡 此聲原是不須多

碧落洞前灘水錄一 楊萬里

碧落峯前上一灘 篙師呼得口都乾 開門將謂船行遠 只在峯頭蘆荻灣

上已同沈虞卿尤延之王順伯林景恩游湖上得句呈同社錄三

楊萬里

孤山山後北山前 十里長堤隔兩邊 一行垂楊綠無縫 石橋通處過春船  
籃輿休上馬休騎 溼卻青鞋也不辭 揀取雨絲疎處去 攜筇且謁水仙祠  
雨催杖履卻須回 捲上疎簾眼頓開 十里湖光平似鏡 柳梢梢外一船來

曉入祕書省過二橋 楊萬里

船底吳儂尙晏眠 一船炊飯數船煙 行人各自東西岸 抵死回頭看兩邊

龍山送客 錄一 楊萬里

念念還鄉未得還 偶因送客到龍山 分明認得西歸路 又是回車卻入關

自生米小路出舞陽渡 楊萬里

獨徑千盤繞水田 初逢官路一欣然 舞陽渡口新河水 白髮重來二十年

清曉洪澤放閘 錄一 楊萬里

起來霜重滿淮船 更覺今朝分外寒 放閘老兵殊耐冷 一絲不挂下冰灘

入長安閘 楊萬里

船入長安恰五更 歸人都喜近臨平 陰晴天色知何似 篷上惟聞掃雪聲

瓦店雨作 錄二 楊萬里

斜風吹雨打船牕 一陣疎來一陣忙 聽作山齋聲點滴 不知作客在山陽

近岸人家欲閉門 遠林煙樹半昏昏 鷓鴣白鷺歸何晚 今夜定投何處村

宿新市徐公店 錄一 楊萬里

籬落疎疎一徑深 樹頭新綠未成陰 兒童急走追黃蝶 飛入花來無處尋

桑茶坑道中 楊萬里

秋晴夾岸隔深溪 東水何緣得到西 溪面祇消橫一笕 水從空裏過如飛  
晴明風日雨乾時 草滿花隄水滿溪 童子柳陰眠正着 一牛喫過柳陰西  
山根一徑抱溪斜 片地纔寬便數家 漫插漫成隄上柳 半開半落路旁花

登度雪臺下臨桃李徑 楊萬里

桃花夾外李當中 三徑花門兩徑紅 獨繞畫簷無箇事 自攜團扇撲黃蜂

料理小池荷 楊萬里

側寒淨荷更泛苦 爲芟數路水痕開 魚兒便喜新開港 纔去纔來千百回

與山莊子仁姪東園看梅 錄一 楊萬里

仰樹看花不見梅 聞香疑在別家開 更行數步偶回首 卻被青松映出來

歸路過南溪橋二首 楊萬里

霜風一動嶺雲開 雲外樵歌暮更哀 童子隔溪呼伴侶 併驅水牯過溪來  
愛他風物重徘徊 歸路遲遲亦快哉 曲折緣溪非不好 忽逢斷岸卻回來

積雨小霽 楊萬里

雨足山雲半欲開 新秧猶待小暄催 一雙百舌花梢語 四顧無人忽下來

晚歸再度西橋 楊萬里

歸盡溪橋東復東 蓼花迎路舞西風 草深一鳥忽飛去 儂不覺他他覺儂  
水落沙灘大有情 漩來漩去不成行 暗叢飛下小瀑布 攔住溪聲獨作聲  
盡日山行意未消 歸來再與坐溪橋 山童拋石落溪水 喚作魚兒波面跳

與子仁登天柱岡過胡家塘蓴塘歸東園 三首 楊萬里

嫩晴無日也無風 正是春光醉樣醺 行到中峯元未覺 回頭已度打頭風  
胡牀脚底萬峯寒 拄杖錐尖亂蘚斑 天柱岡頭行未飽 相攜更上一重山  
數間茅屋傍山根 一對兒童出竹門 只愛行穿楊柳渡 不知失卻李花村

十一月十九日折梅二首 楊萬里

初愛寒香一朵斜 又逢奇朵出高丫 折來折去花多了 忘卻前花與後花  
也知春向歲前回 不道春前早有梅 折得數枝撚歸去 蜂兒一路趁人來

日午 楊萬里

揭竿借日自烘衣 背立晴暄片子時 雪後春生人未覺 弄絲蟻子獨先知

食蓮子錄一 楊萬里

城中蓮子買將歸 未問嘗新早與遲 偶憶湧金門外曉 畫船帶露摘來時

訪梅 楊公遠

荒寒茅屋是誰家 獨木橋橫小徑斜 卻是無人行到處 春風先已到梅花

始生書懷二首 楊公遠

連年客裏度生朝 自草新詩慰寂寥 卻喜窗前風景好 梅花初放雪初消

浮生六十度春秋 無辱無榮儘自由 但得此身強健在 明年花甲又從頭

登南樓 楊傑

此樓此景他州無 天高水闊連平蕪 楊柳深處杏花發 日暖數聲山鷓鴣

煙村 葉紹翁

隱隱煙村聞犬吠 欲尋尋不見人家 只於橋斷溪回處 流出碧桃三數花

嘉興界 葉紹翁

平野無山見盡天 九分蘆葦一分煙 悠悠綠水分支港 撐出南鄰放鴨船

訪龍井山中村叟 葉紹翁

雨打荒籬豆莢垂 柴門未啓立多時 客來自掘蹲鴟羹 旋拾枯松三兩枝

西溪 葉紹翁

一條橫木過前溪 村女齊登采葉梯 獨立衡門春雨細 白雞飛上樹梢啼

山行 葉茵

青山不識我姓字 我亦不識青山名 飛來白鳥似相識 對我對山三兩聲

去去 葉茵

去去扁舟對晚暉 晴和直欲減棉衣 風來一陣蘆花過 祇道春殘柳絮飛

泊舟溪口 葉茵

萬柳陰中繫客船 柔條如竹葉如錢 大姑小婦挑甘齋 搖手烏兒正二眠

省墓 葉茵

隴上松杉手自移 至今苔蘚半寒枝 夢中不記重泉隔 猶學兒童戲綵時

漁邨 葉茵

古柳溪頭枕斷槎 橫篙挂網幾漁家 得魚去換紅蒸米 呼子來挑齋菜花

邨居 葉茵

數舍茅茨簇水涯 傍檐一樹蚤梅花  
年豐便覺村居好 竹裏新添賣酒家

卽事川天竺二韻 葛天民

寒食少逢天氣佳 十朝九日雨如麻  
新巢唯有燕生子 小巷已無人賣花

日出 裴萬頃

日出柴門尙嬾開 綠陰多處且徘徊  
槐花滿地無人掃 半在牆根印紫苔

玉清夜歸 趙師秀

巖前未有桂花開 觀裏閑尋道士來  
微雨過時松路黑 野螢飛出照青苔

宿靈隱寺 潘閔

繞寺千千萬萬峯 滿天風雪打杉松  
地爐火煖黃昏睡 更有何人似我慵

喜臘雪 潘閔

久旱臘月如夏熱 夜來忽降一尺雪  
叫謝上天聲應徹 且壓瘴氣不作孽

暮田 劉子翬

打麥蓬蓬響暮田 兒童拾穰笑爭先  
市頭米價新來減 一醉瓷甌五六錢

兩山 劉子翬



渡南渡北兩山遙 隔岸行人手可招 日暮海門烟雨黑 一川舟楫趁歸潮

江村漁舍 劉安上

江邊茅屋被風掀 雨打疎窗夜不眠 催喚兒童五更起 重添篋纜繫漁船

盱江道中 劉仙倫

過雨青山啼杜鵑 池塘水滿柳飛綿 田家正是忙時節 女采桑歸男下田

漁父 劉翰

輕舟一葉一輕篷 上有蕭蕭鶴髮翁 昨夜不知何處宿 月明都在笛聲中

壽昌 劉克莊

山路泥深雪未乾 病身初怕浙西寒 新年臺曆無人寄 且就村翁壁上看

歲晚書事十首 錄二 劉克莊

荒苔野蔓上籬笆 客至多疑不在家 病眼看人殊草草 隔林迢遞見梅花

日日抄書懶出門 小窗弄筆到黃昏 丫頭婢子忙勻粉 不管先生硯水渾

三月二十一日泛舟六絕 錄二 劉克莊

溪北溪南一雨通 山村佳處便掀篷 老身不怕無安處 着在漁翁保社中

稚子呼牛婦盪耕 早秋水足麥風清 老農喜極還垂涕 白首安知再太平

秋晚 劉克莊

江頭落日照平沙 潮退漁舟閣岸斜 白鳥一雙臨水立 見人驚起入蘆花

雲邊阻雨 劉宰

薔薇籬落送春闌 笋蕈園林早夏間 牛背牧兒酣午夢 不知風雨過前山

和漁翁四絕 錄一 劉黻

得魚換米傍村歸 篷底煙生溼草炊 醉倒船頭呼不醒 斜陽捉蠅有孫兒

早起戲作 樓鑰

枕穩衾溫夢不回 閒居不怕漏聲催 天明更欲從容睡 長被兒孫惱覺來

午睡戲作 樓鑰

早起三朝當一工 老來貪睡不相同 偶然一次五更起 卻用重眠到日中

過蒼嶺 樓鑰

黃雲滿塢沙田稻 白雪漫山薺菜花 路入縉雲頻借問 碧香酒好是誰家

村童 鄧深

侵晨裹飯下高山 負石趨城得米還 不識往來爲幾里 祇言住處指雲間

舟中卽事三首 錄一 鄧深

兩岸農家各自耕 相過正欠小舟撐 牧童來往如平地 騎得吳牛入水行

荆江口望見君山 鄭震

荆江江口望漫漫 一白無邊夕照寒 只是青雲浮水上 教人錯認作山看

晚春卽事 鄭震

輕寒時節牡丹開 葉底青青又見梅 門外數枝楊柳薄 一春鶯燕不曾來

訪隱者 鄭思肖

石竇雲封隱者家 一溪流水繞門斜 滿山落葉無行路 樹上寒猿剝蘚花

琅琊山六題 錄三 歐陽修

琅琊谿

空山雪消谿水漲 遊客渡谿橫古槎 不知谿源來遠近 但見流出山中花

石屏路

石屏自倚浮雲外 石路久無人跡行 我來攜酒醉其下 臥看千峯秋月明

班春亭

信馬尋春踏雪泥 醉中山水弄清輝 野僧不用相迎送 乘興閒來興盡歸

戲贈丁判官

景祐四年

歐陽修

西陵江口折寒梅 爭勸行人把一盃 須信春風無遠近 維舟處處有花開

賞花 歐陽修

淺深紅白宜相間 先後仍須次第栽 我欲四時攜酒去 莫教一日不花開

奉使契丹初至雄州

一作過塞

歐陽修

古關衰柳聚寒鴉 駐馬城頭日欲斜 一作駐馬關見落霞 猶去西樓二千里 行人到此莫思家

夜興 謝逸

梧桐葉落覆東牆 院落風清枕簟涼 夢覺疎鐘鳴遠寺 一池明月芰荷香

送程楚翁遠遊 謝枋得

近日人傳庾嶺梅 南枝落盡北枝開 長安舊日元無此 盡是江南人送來

寄謝叔魯 謝枋得

紅葉飄搖霜露清 去年今日正同行 夜來似與君相見 明月一窗梅影橫

天台道上早行 戴曷

篋輿軋軋過清溪 溪上梅花壓水低 月影漸收天半曉 兩山相對竹雞啼

夜過鑑湖 戴曷

推篷四望水連空 一片蒲帆正飽風 山際白雲雲際月 子規聲在白雲中

歸途過銅官山 戴曷

山徑崎嶇落葉黃 青松疎處漏斜陽 鳴禽無數聲相應 一陣微風野菊香

溪陰堂 蘇軾

白水滿時雙鷺下 綠槐高處一蟬吟 酒醒門外三竿日 臥看溪南十畝陰

惠崇春江晚景 蘇軾

竹外桃花三兩枝 春江水暖鴨先知 萋萋滿地蘆芽短 正是河豚欲上時

縱筆三首 錄一 蘇軾

寂寂東坡一病翁 白鬚蕭散滿霜風 小兒誤喜朱顏在 一笑那知是酒紅

醉睡者 蘇軾

有道難行不如醉 有口難言不如睡 先生醉臥此石間 萬古無人知此意

吉祥寺賞牡丹

蘇軾

人老簪花不自羞 花應羞上老人頭  
醉歸扶路人應笑 十里珠簾半上鉤

山村

蘇軾

杖藜裹飯去匆匆 過眼青錢轉手空  
贏得兒童語音好 一年強半在城中

新涼

嚴羽

小院新涼水竹通 鳴蟬聲斷晚來風  
忽然坐睡膏騰去 不覺殘書落手中

兵火後還里

嚴粲

十載青山幾戰塵 還家何處訪情親  
兒時巷陌今難認 卻問新移來住人

偶成

饒節

松下柴門閉綠苔 只有蝴蝶雙飛來  
蜜蜂兩股大如繭 應是前山花已開

聞杜鵑

饒節

落月過山風露清 雞聲未作天欲明  
杜鵑不管人殘夢 南枝飛過北枝鳴

薔薇

饒節

薔薇作架高一丈 準擬春風如許長  
可憐條間一寸葉 中有嫩色三月香

雨窗 永頤

江湖春水欲生時 開盡梅花雁北飛  
風雨滿庭人不寐 小窗燈火夜深微

裴六書堂 永頤

數峯相對夕陰遮 新占書堂舊竹斜  
地冷石階秋菊小 一叢開得兩三花

夏日 惠洪

山縣蕭條半放衙 蓮塘無主自開花  
三叉路口炊煙起 白瓦青旗一兩家

秋晚 惠洪

紫梨紅棗八九樹 竹屋柴門三四家  
機杼聲遲秋日晚 繞籬寒菊自開花

山家 斯植

一溪流水繞煙霞 路入青松第幾家  
蝴蝶傍人飛不去 隔牆開盡碧桃花

西湖晚望 斯植

久雨初晴睡正長 春蛙鳴遍舊池塘  
小亭寂寞斜陽裏 一陣東風過木香

苕溪舟次 斯植

扁舟煙重冷漁蓑 兩岸人家浸小河  
芳草自生春自老 落花隨雨晚風多

秋思 道璨

草根無數候蟲鳴 月在梧桐樹上明 庭院無人過夜半 自攜團扇繞階行一本樹

超師房 道璨

巖桂花開滿院香 青莎葉底有鳴螿 人家只在西林住 雞犬聲中又夕陽

題水墨草蟲 道璨

蜻蛉低傍豆花飛 絡緯無聲抱竹枝 憶得西湖煙雨裏 小園清曉獨行時

江村 蘊常

江村風急葦花飛 漠漠吹煙樹影稀 亦有人家沙際住 夕陽雞犬傍人歸

小溪 曇穎

小溪莊上掩柴扉 雞犬無聲月色微 一隻小舟臨斷岸 趁潮來此趁潮歸

七律 二十一首

山行卽事 高九萬

籃輿破曉入山家 獨木橋低小徑斜 屋角盡懸牛蒡菜 籬根多發馬蘭花



主人一笑先呼酒 勸客三杯便當茶 我已經年無此樂 爲憐身久在京華

過越江見人家臨水竹可愛 鄭剛中

何人此地得幽居 水竹中間宅一區 無盡江山千萬里 有情花木兩三株  
應無俗客來驚犬 時有扁舟過賣魚 我欲他時成卜築 更添幾架古人書

閒適吟

熙寧元年 邵雍

六尺眼前安樂身 四時爭忍負佳辰 溫涼氣候二八月 道義賓朋三五人  
量力盃盤隨草具 開懷語笑任天真 勸君似此清閒事 雖老何須更厭頻

壬戌二月 徐璣

山城二月景如何 行處時時聽踏歌 淡色似黃楊葉小 濃香如蜜菜花多  
春容每到晴時改 天氣偏從雨後和 好向溪頭尋釣侶 小溪連夕漲清波

舒州歲暮 張弋

窮冬日日愛天晴 古寺門開絕送迎 野鶴忽來橋上立 山僧獨向水邊行  
過寒梅樹白全少 入臘草芽青漸生 又是舒州一年了 怕看新曆動鄉情

探梅 曾幾

幅巾芒鞋筇竹策 踏遍山南與山北 雪含欲下不下意 梅帶將開未開色  
繞樹三匝且復去 前村一枝應可摘 丁寧說似水邊人 從今日報花消息

乙酉社日偶題 楊萬里

愁邊節裏兩相關 茶罷呼兒檢曆看 社日雨多晴較少 春風晚煖曉猶寒  
也思散策郊行去 其奈綠谿路未乾 綠暗紅稀非我事 且尋野蕨作蔬盤

中秋前夕攜酒與子仁姪登多稼亭 楊萬里

月忽飛來墮我傍 我還飛入月中央 如何桂樹許多影 不隔冰輪些子光  
自古中秋多苦事 非風卽雨斷人腸 醉來不信寒欺酒 露溼杯盤凍作霜

迓使客夜歸錄一 楊萬里

病身已怯九秋涼 也復移尊下砌旁 只愛杯中都是月 不知身上幾多霜  
清愁舊覺天來遠 寒夜新添歲樣長 不是旁人俱欲睡 老來無睡亦何妨

題水月寺寒秀軒 楊萬里

古寺深門一徑斜 繞身縈面總煙霞 低低簷入低低樹 小小盆盛小小花  
經藏中間看佛畫 竹林外面是人家 山僧笑道知儂渴 其實迎賓例瀹茶

十五日明發石口遇順風 楊萬里

泝流淺水刺樓船 百棹千篙祇不前  
一夜波聲喧到曉 北風氣力欲翻天  
挂帆未了青泥過 轉眼相將玉筍邊  
無數小舟俱在後 追儂不及指爲仙

夜過高郵 楊萬里

水鳥舟人兩不棲 波聲風響總堪悲  
覺來枕上三更雨 夢到江南一霎時  
邵伯問來還漸近 高郵過了不曾知  
滿天星月銀河溼 明早新晴也大奇

四更發青陽縣西五里柯家店 楊萬里

轎旁萬兀路千縈 死盡村雞無一鳴  
落月正明知未曉 暗泉甚遠只聞聲  
自緣客子行來早 豈是秋天不肯明  
午熱未來先下店 卻將晝睡補宵征

六月將晦出夜凝歸門 楊萬里

暑裏街頭可久停 今宵無月也宵征  
一天星點明歸路 十里荷香送出城  
山橋聲聲柔艣緊 葛衣眼眼野風清  
五更月出還家下 不早相期作伴行

送簡壽王主簿之官臨桂二首 錄一 楊萬里

柴門草徑儘莓苔 不放紅塵俗子來  
詩客清晨衝雨入 梅花一夜爲君開

飄蕭落葉殘燈火 陸續清談濁酒杯 二十六年纔四見 驪駒抵死又相催

與侯子雲溪上晚步 楊萬里

人入溪園自掩門 溪流新落二三痕 杖藜紫菊霜風徑 送眼丹楓夕照村  
行住忽然忘近遠 陰晴未肯定寒暄 多時不出今聊出 牧子樵兒一笑喧

同王見可劉子年循南溪度西橋登天柱岡望東山 楊萬里

偶因閑步散頑麻 權喚胡麻小似些 飛上山頭人似鶴 回看溪畔路如蛇  
雲煙極目知可愛 松竹爲門是我家 下得山來飢更渴 也無麥飯也無茶

次公秩滿來歸遇上已寒食同日父子小酌 楊萬里

又是一年修禊時 何須曲水泛金卮 遍嘗衆酒少亦醉 坐到三更眠未遲  
上已巧常寒食日 春風慳放牡丹枝 白頭父子燈前語 忘卻江湖久別離

自黃山還塗中作 鄭震

屈指還京十日程 每逢歇處問村名 春沙脈脈溪初漲 夜雨垂垂曉又晴  
山下有人傳虎出 店中炊飯見牛鳴 天涯行客無寧日 不及田家業在耕

雨後訪田家 劉應時

一雨及時晴又佳 江村農父語諠譁 旋炊麥飯非常飽 笑指苗田不用車  
有眼何曾識朝市 逢人只喜話桑麻 此間賸有漁樵地 容我旁邊著一家

西湖除夜 道璨

又來上國看新光 細嚼梅花嚙冷泉 阿母在家年六十 孤兒爲客路三千  
身居東海滄波上 心在西山落照邊 碧戶朱門楊柳岸 不知歸日是何年

七古

樂府附二十首

漁父曲 李新

黃蓑老翁守釣車 賣魚得錢還酒家 醉中乘潮過別浦 睡起不知船在沙  
籬根半落秋江水 稚子蓬頭採洲泚 蓴絲芹甲滿筠籠 日暮谿橋得紅米

過新開湖呈無言兄御史 劉一止

整整斜斜村舍居 十五五沙中鳧 潛魚釣影水深淺 高柳著行煙有無  
天闊雲低過平楚 已覺淮音近吳語 淮南米賤好留儂 正恐不歸心更苦

書會別亭 王安石

西城路 居人送客西歸處 年年借問去何時 今日扁舟從此去

春風吹花落高枝 飛來飛去不自知 路上行人亦如此 應有重來此處時

### 大舟 王令

大舟無風帆不舉 小舟榜入青冥去 舟中漁子呼且歌 夜半鬪魚誰得多

### 訪人不遇題壁 方惟深

何年突兀庭前石 昔日何人種松柏 乘興問來就榻眠 一枕春風君莫惜

城西今古陽山色 城中誰有千年宅 往來何必見主人 主人自是亭中客

### 正日大雪過秀州城外聞樂神踏歌打鼓 李芝儀

歲除夜雪一尺許 便覺新年喜氣多 大觀元年第一日 一番勝事信可歌

歌不已 鼓聲起 漫壟連村如市裏 更願雪深一尺餘 收了去年三尺水

### 秋夜同章三十九弟次邠宿延慶山中 林亦之

芭蕉月上照窗扉 屋裏老僧眠不知 起來樹根飲一盞 舉頭忽是三更時

藤蘿一處一處好 我亦持杯隨處坐 山雞忽叫野鐘鳴 滿地西風愁殺我

### 送晦叔 徐積

兩人俱是白髮翁 不用語言情意通 且喜胸中無一事 一生常在平易中 願公活百歲 我活九十九 白髮變成黃髮翁 回來同把一杯酒

誰何哭 徐積

誰何哭 哀且危 白頭母 朱顏兒 兒忽捨母去 母何用生爲 架上有兒書 篋中有兒衣 兒聲不復聞 兒貌不復窺 誰何哭 哀復哀 腸未絕 心先摧 母恃兒爲命 兒去不復來 朝看他人兒 暮看他人子 一日一夜間 十生九復死 君不見昨夜人靜黃昏時 合心抱痛無人知 其時忽不記兒死 倚門引頸望兒歸

哀哀詞 徐積

哀哀復哀哀 哀哀至此極 孤兒與慈母 中路忽相失 恍惚須臾間 終日不復得 誰復坐我堂 誰復入我室 誰復飲兒酒 誰復哺兒食 兒飢復誰念 兒寒復誰恤 耳不聞慈語 目不見慈色 譬如行路人 日遠如一日 行人猶可期 遠道猶可追 天窮地盡處 一日猶可歸 哀哀復哀哀 此去無盡時 誰言生離別 不如死別離 君不見人已閉門烏已棲 黃昏塚畔孤兒啼

三月三日作 徐積

今朝乃是三月三 三分春色二分去 一分春色能幾多 吟翁老病無如何 卻思翁在秦中時 年少愛遊山與溪 其時人物如神仙 手攜酒榼擎花枝 人不惜錢似癡騷 乞者與之見者買 人人俱著好衣裳 處處紛紛成五采 山上山前鬧如市 人半歸時城欲閉 西溪最是柏坡頭 人家占卻無閒地 更有幾處入城早 清明上已踏芳草 若無疾病與死亡 人家大抵無煩惱

### 分題得漁村晚照 徐照

漁師得魚繞溪賣 小船橫繫柴門外 出門老嫗喚雞犬 收斂簑衣頭屋隴  
賣魚得酒又得錢 歸來醉倒地上眠 小兒啾啾問糞米 白鷗飛去蘆花煙

### 負承零陵更盡而代者未至家君攜老幼先歸追送出城正值泥雨

#### 萬感驟集 楊萬里

吾父先歸吾未可 父母已行猶顧我 兒女喜歸未解悲 我愁安得如兒癡 牆頭人看不須羨 居者那知行者歎 昨日幸晴今日雨 天公管得行人苦 吾母病肺生怯寒 晚風鳴屋正無端 人家養子要作官 吾親此行誰使然

### 濠原路中 楊萬里



長亭短亭三復五 總是兒時行底路 尙憶天寒日小黃 先君前行我後顧  
如今悲不爲途窮 病雁孤飛失老鴻 三年閉戶松風裏 行路又還從此始

初二日苦熱 楊萬里

人言長江無六月 我言六月無長江 只今五月已如許 六月更來何可當 船艙周圍各五尺 且道此中底寬窄 上下東西與南北 一面是水五面日 日光煮水復成湯 此外何處能清涼 掀篷更無風半點 揮扇只有汗如漿 吾曹避暑自無處 飛蠅投吾求避暑 吾不解飛且此住 飛蠅解飛不飛去

安樂坊牧童 楊萬里

前兒牽牛渡溪水 後兒騎牛回問事 一兒吹笛笠簪花 一牛戴兒行引子 春溪嫩水清無渣 春洲細草碧無瑕 五牛遠去莫管他 隔溪便是羣兒家 忽然頭上數點雨 三笠四簷趕將去

中途小歇 楊萬里

山僮問游何許村 莫問何許但出門 脚根倦時且小歇 山色佳處須細看  
道逢田父遮儂住 說與前頭看山去 寄下君家老瓦盆 他日重游卻來取

贈宗周賓 劉子翬

我車南 君車北 相逢總是天涯客 擁爐談笑一燈殘 出門風雨千山隔

採桑曲 鄭震

晴採桑 雨採桑 田頭陌上家家忙 去年養蠶十分熟 蠶姑只著麻衣裳

牧童辭 張玉嬾

朝驅牛 出竹扉 平野春深草正肥 暮驅牛 下短陂 谷口煙斜山雨微 飽采黃精歸不

飯 倒騎黃犢笛橫吹

# 金

## 五絕 二首

憶山中二絕句 元德明

東寺留連飲 張園爛漫遊 兒童望歸路 一日幾登樓  
秋色山中好 山翁醉不迴 不知籬下菊 霜後幾叢開

## 五律 一首

秋郊 王庭筠

瘦馬踏晴沙 微風度隴斜 西風八九月 疎樹兩三家  
寒草留歸犢 夕陽送去鴉 隣村有新酒 籬畔看黃花

## 五古 二首

讀書月山夕二首 元好問

層崖多古木 細路深莓苔 柴門開曉日 雲際青山來  
靜中有真趣 孤賞何悠哉  
久旱雨亦好 既雨晴亦佳 胡牀對明月 樹影含清華  
牆東有洿池 敲枕聽鳴蛙

七絕 十一首

河陰道中二首 王庭筠

黍葉成陰杏子青 榴花相映可憐生 林深不見人家住 道上唯聞打麥聲  
微行入麥去斜斜 才過深林又幾家 一色生紅三十里 際山多少石榴花

梁園 密國公璠

一十八里汴堤柳 三十六橋梁苑花 縱使風光都似舊 北人見了也思家

浦津晚渡 曹之謙

黃河城下水沄沄 船去船來幾夕曛 老盡津頭垂釣客 柳陰相對白鷗羣

晚宿山寺 趙楓

松門明月佛前燈 庵在孤雲最上層 犬吠一山秋意靜 敲門時有夜歸僧

河橋劉迎

桃李香中八九家 青旗高挂綠楊斜  
晚來風色渡頭急 滿地蕭蕭楊白花

荒田擬白樂天 蕭貢

荒田幾歲闕人耕 欲種糜蕎趁晚晴  
急手剪除荆與棘 一科才了十科生

郊行二首 錄一 鄺權

溪橋納納馬蹄輕 竹裏人家犬吠聲  
行盡灘光溪路黑 隔林燈火夜深明

客意 元好問

雪屋鐙青客枕孤 眼中了了見歸途  
山間兒女應相望 十月初旬得到無

和答中山道士 趙秉文

行轉青溪又別峯 馬蹄終日認樵蹤  
翠微深處無人住 寺在深山何處鐘

北都雪望 趙秉文

千山雪盡出樵車 一逕雲移去似蛇  
小屋平頭墟落裏 炊烟起處是人家

七古 三首

花下墓 趙秉文

山前樹 今人看花昔人墓 昔人栽花待遊宴 花開墓上人何處 今年花盡復明年 今人復爲後人憐 酒澆墓上吃不得 留與飢鴉作寒食

香山飛泉亭 趙秉文

霜風吹林林葉乾 泉聲落石毛骨寒 道人清曉倚欄干 自汲清泉掃紅葉 一庵冬住白雲端

至日感事 趙秉文

人言至日一線長 我覺至日一線短 縫新統舊不如昔 身上衣猶慈母線 昨日日短猶可長 今日衣敝不可統 年年至日壽北堂 親不在堂衣在眼

# 元

## 五絕 二十二首

### 題馬遠雪景圖 沈中

暮雲天一色 飛雪滿江干 野艇歸來晚 推篷不厭看

### 書生 甘泳

踉蹌趣講席 誦讀鬪高聲 我亦曾如此 而今白髮生

### 題分宜縣橋 郭銓

雲從溪北生 雨過溪南響 溪上蓑笠翁 倚闌看水長

### 重到山家 郭銓

紅雨長茶芽 東風吹柳花 行人今日到 先自補窗紗

### 和歐陽南陽月夜思 揭傒斯

月出照中園 鄰家猶未眠 不嫌風露冷 看到樹陰圓

曉出順成門有懷何太虛揭傒斯

步出城南門 懷望江南路 前日風雨中 故人從此去

獨夜 趙孟頫

秋風動林葉 夜雨滴池荷 孤客睡不着 亂蛩鳴更多

村居雜詩 劉因

鄰翁走相報 隔窗呼我起 數日不見山 今朝翠如洗

黃昏雨氣濃 喜色滿南畝 誰知一夜風 吹放門前柳

春陰 劉詵

短短麥苗遠 冷冷溝水清 北山晴雨裏 一樹李花明

春雨曉坐 劉詵

衆木蔽春塘 花落如墮鳥 山莊苔滿階 久雨來人少

雪霽過青溪 題道士江野舟南館二首 薩都刺

孤舟橫野水 門外雪晴初 白日莫放鶴 青溪閑釣魚

江南正月半 猶自有梅花 踏雪去何處 青溪道士家



過高郵射陽湖雜詠錄三 薩都刺

野鶴如人長 迎風理毛羽 獨立秋雨涼 人來忽飛去  
捕魚湖中水 賣魚城市裏 夫婦一葉舟 白頭共生死  
大醫一丈闊 小舟一葉輕 相傳子與孫 終古無人爭

過紫薇菴馮訪道士錄一 薩都刺

道士愛幽居 年來一事無 盆池新過雨 石上種菖蒲

江晚 大圭

長江鳥飛盡 兩岸蘆花發 何處一舟來 清江上秋月

山中一絕 英

一聲山鳥啼 幽夢忽喚醒 起來開竹扉 日上中峯頂  
窗前瀑布寒 林外夕陽薄 清風何處來 撲撲松花落

西齋秋夜 善住

晚雨過江城 西齋秋氣清 夢回孤枕上 無處不蟲聲

早行 善住

拂曙駕柔櫓 溪山行幾重 雲昏不見寺 依約但聞鐘

### 五律 七首

#### 冷坐 仇遠

冷官宜靜坐 借屋近荒村 無酒可延客 未昏先閉門  
水明知月上 木落見梅尊 滿目淒涼者 相逢不必言

#### 謝惠菜 呂誠

江鄉正月尾 菜羹味勝肉 莖同牛乳腴 葉映翠釵綠  
每辱鄰家贈 頗慰老夫腹 囊中留百錢 一日買一束

#### 南居寺 何中

閉戶未從容 出門誰適從 聊隨碧溪轉 忽與白鷗逢  
小雨十數點 澹煙三四峯 峯峯看不足 山寺已鳴鐘

#### 郭外 周權

郭外人家少 漁村颺酒旗 江雲低壓樹 沙竹細穿籬

地暖梅花早 天寒潮信遲 夕陽烟景外 倚杖立移時

送友還家 秦不華

君向天台去 煩君過我廬 可于山下問 只在水邊居  
門外梅應老 窗前竹已疎 寄聲諸弟姪 老健莫愁予

山行卽事 潘純

石子路三叉 居人八九家 綠分鄰寺竹 紅出矮牆花  
野老能娛客 山泉自煮茶 茜裙誰氏女 赤腳髻雙丫

除夜客中 戴良

歲月遽如許 蹉跎老卻人 一年惟此夜 明日又逢春  
湖海未歸客 風塵多病身 感時渾不寐 燈火獨相親

五古一首

老病 何失

老病積漸來 筋力日覺墮 南園一步地 杖藜不能過

階前宿雨晴 屋角紅日大 不是賣花聲 曉夢誰驚破

### 六言 三首

#### 題青山白雲圖 張昱

一箇茅廬何處 小橋古木溪灣 但見山青雲白 不知天上人間

#### 次韻與明德小友二首 薩都刺

烟雨短篷水口 人家亂石山前 送別莫忘今日 相逢知在何年  
莫笑風餐水宿 暫離馬足車塵 兩岸好山送客 一江細雨歸人

### 七絕 三十五首

#### 桐廬舟中 翁葵

十數人家門傍水 二三里路地栽桑 前溪漁棹歸無數 網掛船頭曬夕陽

#### 秋日江村 熊礪谷

短短竹籬三五家 獨樹作橋橫淺沙 山頭昨夜雨初過 秋水一寸莢菇花

初夏 蕭應元

半晴半雨白晝長 似無似有綠陰香 兒童刻竹記新筍 一夜風吹一尺強

題郭天錫青山白雲圖 若舟

萬疊青山萬疊雲 水邊烟樹隔孤村 依稀南岳峰頭住 茅屋三間獨掩門

初夏卽事 照鑑

三月已破四月初 綠陰門巷晝模糊 近窗一樹櫻桃熟 格磔鈞舟來鷓鴣

與存此山上人山行 梁大柱

一聲兩聲松子落 三一一作片五兩一作片楓葉飛 夕陽下一作山新月下 道人相伴一僧歸

船上謠送伯庸 以番貨事 奉使閩浙 宋本

舊時家近黑橋街 三十餘年不往來 憑仗使君一問訊 楊梅銀杏幾回開

和西湖竹枝詞二首 錄一 良辰

六月七月生晚涼 大樹小樹臨幽窗 枯槎行蟻過無數 晴空好鳥飛一雙

宿山中田家 翁森

欹坐顏蒼醉濁醪 松油燒盡夜蕭騷 兒童十歲能吹笛 嘹唳一聲山月高

湖居雜興 錄一 白斑

雨後林塘夏亦秋 一葫蘆酒在船頭 醉來深入荷花去 臥看青天飛白鷗

題松石 于立

匡廬道士山陰住 遠屋青松箇箇長 溪上一番春雨過 白雲滿地茯苓香

晚步 王旭

草沒行蹤一徑斜 西風開滿蒺藜花 行歌曳杖不知遠 轉過青林又幾家

閏二月朔日 吳師道

病過春光兩月程 幾番風雨幾番晴 不知開到何花樹 今日才聞燕子聲

題小景 杜本

秋雲滿地夕陽微 黃葉蕭蕭雁正飛 最是江南好天氣 村醪初熟蟹螯肥

夜宿野城 成廷珪

露氣涓涓欲二更 小舟猶向月中行 前村知有人家近 隔浦微聞犬吠聲

客夜思親 宋无

老妻病女去淮西 慈母居吳鶴髮衰 我獨天涯聽夜雨 寒燈三處照相思

卽事 宋禧

今年臘月尙無雪 門外垂楊綠葉長 一夜海潮河水滿 鱸魚清曉入池塘

喜晴 高明

刺桐花開山雨晴 綠樹上有黃鸝鳴 杖藜出門看山色 恰見小池新水生

題青山白雲圖 高明

昨夜山中宿雨晴 白雲綠樹最分明 茅廬早起無他事 去看谿南新水生

吳山遊女 貢性之

十八姑兒淺澹妝 春衣初試柳芽黃 三三五五東風裏 去上吳山答願香

春日 張昱

一陣東風一陣寒 芭蕉長過石闌干 只消幾日膏騰醉 看得春風到牡丹

江梅 馮子振

有客孤山弔鶴歸 半肩行李插疎枝 街頭兒女不解事 剛道賣花人未迴

喜晴 楊載

簷外喧喧雀報晴 夕陽猶照小窗明 迴舟更倚南風順 要聽田家打麥聲

到京師 楊載

城雪初消薺菜生 角門深巷少人行 柳梢聽得黃鸝語 此是春來第一聲

溪上 劉秉忠

蘆花遠映釣舟行 漁笛時聞三兩聲 一陣西風吹雨散 夕陽還在水邊明

和許君善郊居 謝應芳

秋色蒼茫日落斜 鯉魚風起荻飛花 先生晚酌依稀醉 吹笛漁童恰到家

題江干初雪圖 戴表元

斷樹寒雲古岸隈 漁翁初撥小船開 看渠風雪忙如許 還有魚兒上釣來

駱鄭二君子見訪 戴良

獨住江村客到稀 忽聞山犬吠荆扉 青苔黃葉無人掃 買藥兒郎竟未歸

阻風南露筋過羅漢寺登樓看山茶 薩都刺

野寺尋春酒未醒 不知幾日過清明 小闌干外東風急 一樹山茶落晚晴

乙未五月口號 錄二 顧瑛

二月修城五月過 修城不了奈城何 只因一夜斜風雨 到曉都坍一半多



成隊誰家青苧娘 頭遮箸笠足如霜 入城糶米不歸去 屋裏踏車人正忙

題王元章墨梅子賢

我家繞屋梅花樹 況在清溪白石邊 雲霧月明疎影小 讀書猶記十年前

暮至奉化縣 圓至

郭西水寺尋猶遠 昏黑街名看不真 山縣閉門官禁夜 月明處處斷行人

詠梅花 梅花尼

終日尋春不見春 芒鞋踏破嶺頭雲 歸來笑撚梅花嗅 春在枝頭已十分

水檻 鄭允端

近水人家小結廬 軒窗瀟灑勝幽居 憑闌忽聽鳴榔響 知有小船來賣魚

七律 六首

題漁家壁 郊詔

漫郎家住黃泗浦 閒看飛花坐北窗 渡口青山高似屋 門前潮水直通江  
垂楊繫艇已千尺 春鯉上盤纔一雙 野老相過無一事 白頭喜對酒盈缸

近詩數首簡玉山

一作白鶴題 玉山主人 于立

我離

一作住

城中五十日

念子終日不相忘

驛回隴首梅未發

雁過沙頭書幾行

田間雞黍酒正熟

霜後園林橘半黃

亦欲歸栖一作後日東歸

同一笑一作醉

酣歌不減少年狂

赴山陽

寄君祥濟之 仲寬子昂

李俊民

立馬西風不忍行

往回只是片時程

一年又作半年客

百里有如千里情

落日寒林山下路

淡煙疎竹水邊城

願君把酒休惆悵

四海由來皆弟兄

四月廿四日雨中寄仲莊

呂誠

四月江鄉暑尙微

林寒老客未更衣

復愁刈麥雨不止

況是索租人正饑

穀秧出水青青短

筆笥登盤筒簡肥

門外泥深無轍迹

相從莫怪出村稀

題城西書舍次韻

袁士元

自笑茅檐多野意

水邊栽柳翠成堆

鶴因無恙老猶健

燕若有情貧亦來

曲徑斜穿花影入

小池低傍竹陰開

故人有意能相訪

細啜茶甌當酒杯

半村爲傅處士賦

張翥

半距城闌半距村

煙霞咫尺少塵喧

小車出市僕先路

斜日下山人到門

兩岸花陰連第宅 一川草色散雞豚 田家數里將迎慣 時復相留醉酒尊

### 七古 三首

余嘗作一詩觀者皆喜文卿見余寫此卷俾余書之於上本誠

莫造屋 莫造屋 何用經年興土木 造屋人在堂 拆屋人在腹 不知造時榮 但見拆時

辱 莫造屋 莫造屋 世道由來反覆多 興廢但分遲與速

莫買田 莫買地 買田置地增家計 西陌東阡恣兼并 不知戶役隨田至 大男小女日夜

忙 帶鎖擔枷了官事 莫買田 莫買地 生前將爲子孫謀 身後翻爲子孫累

### 山行 本誠

水聲瀼瀼山中路 林深不知林外雨 轉來澗深不可渡 沿流直過前山去 前山腳下溪路

斜 隔江遙見山人家

# 明

## 五絕 一百三十八首

士門 王尙綱

蒼蒼土門口 日出逢樵叟 問爾何事來 山中苦無酒

去越 王翹

步出越城門 回看越城樹 久客成故鄉 徘徊不能去

病起 木公恕

臨曉新梳髮 呼兒卷幔紗 平生行樂慣 病起卽看花

冷泉亭口號與劉邦彥別 史鑑

君去我獨留 持杯勸君酒 明日虎跑泉 還來看山否

一葦渡 安紹芳

夕陽下前溪 西風吹野渡 不見折葦人 獨立滄江暮

黃洞山 吳高

惠陽十萬家 采薪皆此處 荷葉蓋頭歸 知是前山雨

秋晚 吳鏞

風高野水寒 天遠青山小 渡口人不來 斜陽送歸鳥

山居卽事 吳夔

颯颯樹頭風 山犬吠不已 呼童啓柴扉 明月照谿水

春夜錢塘江行 吳宗儒

小艇發江干 入夜東風起 帶雨挂輕帆 西行三百里

題畫 吳統持

古寺寂無僧 山深寒更雨 泉流暗竹中 似覺有人語

東禪寺 李姓

松杉滿院風 豆莢一籬綠 不聞車馬喧 時有高人宿

萬松菴 何僊

青林千尺陰 覆此山中閣 月出不逢人 門前松子落

送別 林章

相送到江干 淒其風又雨 淚下沾君衣 看君不能語

題扇寄邊華泉 俞泰

木葉迎風下 孤亭傍水開 何時尋舊約 載酒過江來

京師得家書 袁凱

江水三千里 家書十五行 行行無別語 只道早還鄉

爲顧新山題畫用思道韻 倪宗正

久住水東溪 欲往水西去 一夜春草生 溪路無尋處

驟雨 倪嘉慶

雨驟泉聲急 雲涼樹色濃 不知何處寺 忽送一聲鐘

舟中雜咏 錄一 徐霖

今夜河西宿 無眠但數更 並船何處客 吹笛到天明

山中 徐應鑾

流水看不厭 況兼溪上山 倚闌終日坐 紅葉擁柴關

欲訪南鄰居 遙遙在何處 隔浦見晴沙 江村從此去

松關 唐順之

月出照松關 松陰正滿地 恐有山僧歸 終夜不須閉

筠徑 唐順之

面面隔深竹 茅齋在何處 遙聞犬吠聲 試從此路去

山行 高啓

欲訪山中人 未識山中路 茅屋漏疎林 蒼蒼但煙霧

盱江對月 范汭

新月出江干 郵亭獨倚闌 別家如昨日 二十一回看

山中 孫一元

來往不逢人 家在山深處 獨鶴忽飛來 風動月中樹

舟行 孫毓

天陰村徑黑 渾迷舊時路 忽逢岸上燈 照見橋邊樹

江南山 孫茂芝

少小住江南 忘卻江南好 辛苦北遊還 喜見江南道

宿陝州橫渠舖 陳文東

獨客臥車上 羣僕臥車下 車前或明火 時時照牛馬

淮陽夜月 張鈇

今夜淮陽月 清光似故鄉 有人千里外 對月望淮陽

客至 張承

茅屋雨三間 草草蔽風雨 客來不入門 坐愛千年樹

吳江舟中 張文介

向夕問舟人 吳江將至否 須傍微月中 繫船好沽酒

閩門見別者代爲吳歌 張民表

一船往東撥 一船往西開 兩船不相顧 都看姑蘇臺

苔徑 張次中

苔徑路敲危 幽人自來去 但聞啼鳥聲 不識鳥啼處

山居 張綱孫



朝雲起山南 暮雲起山北 只有山中人 朝暮見山色

武鄉山中晚行 陸深

落日下西崦 餘光在高樹 水流青山中 人行白雲處

西坪路 許儻

蒼蒼古木中 夕陽忽已晚 隔浦聞雞鳴 人家知不遠

市汊驛下阻風 程誥

江干日色黃 北風怒不已 君看上水船 一日三百里

江北謠 屠隆

千錢與唱歌 百錢與賣酒 本是青州人 家住黃河口

夾溝遇邑人 楊士奇

聞道故鄉來 辭家今遠近 恐有南京書 停舟試相問

江南曲 萬表

客從潮陽來 夜泊秦淮口 鄉語人不知 兒童聞拍手

山中偶作 董斯張

秋草長於人 小鳥時出入 但聞樵者歌 不見行人跡

夕陽 蔡復一

夕陽欲下山 一半戀流水 短笛牛羊歸 餘光照童子

遇鄉人 蔣之翹

君從石城來 曾過青溪否 我家傍青溪 門前數株柳

西亭同朱近臣送沈嘉則 盧澐

送君江上行 路近梅根渚 雨急天欲昏 不盡別時語

野興 羅壽

山中雨欲來 樹杪風先起 猶有試茶人 偶坐松蘿裏

絕句 蘇伯衡

落葉滿衡門 蕭蕭風雨夕 一燈溪上明 何處獨歸客

東溪過朱子蓉弘句

門外秋瓜蔓 垂垂過板橋 東溪一夜水 竈下有魚跳

山居 契靈

懸崖老樹枯 樵斧不敢割 亂挂猢猻藤 不知幾千尺

屈曲山路長 曾不見車馬 鳥啼落日黃 處處逢樵者

半山聞鶯 李延是

一路籃輿穩 山行日欲西 藤花開未盡 隨處有黃鸝

途中雜詠 邊貢

朝從田父飯 憩馬古林西 村雞不知曙 日高猶自啼

避兵陳莊 閔鼎

遙傳村外信 兩耳若不聞 支頤一藤枕 有酒伴桐君

晝則人無譁 夜則犬遠吠 東鄰與西家 防夜如守歲

小港無數灣 小舟無一舵 牽纜復撐篙 船從草上過

大村百家煙 小村數椽屋 隔岸或相呼 曠野同一族

采蓮曲 瞿時行

十里蓮塘路 扁舟任往還 一村小兒女 終日在花間

輕輕一葉舟 蕩入荷花裏 不見採蓮人 但聞花中語

弄孫 瞿時行

曝背晴檐下 呼孫戲膝前 耄年朋輩少 賴爾伴餘年

廣午山居 蔣宗魯

家在深山裏 蒼蒼盡綠苔 日長無客到 惟有鳥飛來

春日卽事 馮氏

閑步小橋東 黃鶯處處逢 梨花風雨後 人在綠楊中

伏羌道中山家卽事 吉人

茅屋依山澗 柴扉傍水涯 小橋通曲徑 滿地是桃花

早行 鄭明選

雞鳴客下牀 出門天未曙 山黑不見人 但聞馬啼去

柴門 夏鏃

二里溪橋路 人家水影中 柴門經日掩 紅葉滿籬風

竹門 章适

日出山鳥鳴 竹深門更靜 露溼人不行 幽花墮苔徑

口占樓以上

夢殘聞雨聲 點點落屋瓦 有客忽喧門 客是何爲者

有僧吟樓以上

有僧七八歲 清明寺中住 門前見我來 走到花深處  
問客請吃茶 蓮趺香一炷 我自乘輿來 日落卻歸去

舟行錄三 盧仲佃

江邊春色來 小舟去如注 前面好青山 舟人不肯住  
兩岸生輕風 篙轉隨水落 舉頭望白雲 天空一隻鶴  
日暖風已定 袖中出小扇 捲篷水面坐 白雲飛一片

江上 盧洪秋

日暮滄江遠 風高水屋寒 相逢江上客 盡說上灘難

宿遷別安隱兄 王鏊

年年積相思 兄南弟在北 一朝兄北來 弟作南歸客  
弟北兄復南 草草途中見 見時未交言 船開激如箭

白髭嘆 錄二 王鑿

我年三十九 白髭有一莖 當時初見之 妻子殊爲驚  
今年四十二 白者日益多 朝來明鏡中 對之不復嗟

山中示諸生 錄三 王守仁

桃源在何許 西峯最深處 不用問漁人 沿溪踏花去  
池上偶然到 紅花間白花 小亭閒可坐 不必問誰家  
溪邊坐流水 水流心共閒 不知山月上 松影落衣斑

句容道中 王挺

薄暮蒼煙近 人家雞犬聲 月斜尋古岸 夜半過寒城

憶母 時督兵 史可法  
白洋河

母在江之南 兒在淮之北 相逢敝夢中 牽衣喜且哭

春日上高橋阡 危素

春草如帶長 生於阿娘墓 不見墓中人 但見墓上樹

對白桃花下約耦耕飲酒 錄一 朱議霽

呼兒掃階石 待風吹落花 夜來陂下水 已浸岸邊沙

宿蘇門 李夢陽

朝發陽武城 暮宿蘇門里 臥聽青山鐘 遙在白雲裏

泉上獨酌 李夢陽

湧金亭畔路 細雨不思迴 獨酌看流水 山花映酒杯

雙泉寺題壁 李夢陽

寺僻無人行 夜雨長秋草 山僧出迎客 落葉不曾掃

我昔寺中游 題詩在東壁 三年不見僧 見之頭半白

送佘客 李夢陽

自寄還家信 聞人數月圓 住近沙溪口 終日問來船

贈王左史 李夢陽

林臥每倦出 時或一乘馬 來訪王相國 醉歸月明下

君家百甕酒 留連胡不飲 花月我自來 醉卽花間寢

贈慧峯老禪師四絕句錄一 李日華

飯罷坐石上 手摩青莓苔 洗鉢向流水 水流花片來

賣花曲 宗臣

長安買花者 數株千萬錢 道旁有饑人 一錢不相捐

郊行 宗臣

竝馬出春城 搖鞭一相語 楊柳遍前山 應從何處去

園亭雜興四首錄一 孟洋

何處水中石 移來亭畔清 東風三日雨 細草忽然生

浦城見雪 俞安期

南雪不到地 北風吹滿山 不知吳越路 凍斷幾時還

得家兄在遠消息四首錄二 高啓

家將遠人信 復報遠人知 世亂書難得 開緘勝見時  
歲晚各離家 憐兄去路賒 書來約歸近 同看故園花

西陂 高啓

芳草水東西 春風路欲迷 歸時不覺晚 山與夕陽低



聞雁 高啓

江寒月黑夜 定宿兼葭裏 叫叫過燈前 卻是誰驚起

題雲林小景 高啓

歸人渡水少 空林掩煙舍 獨立望秋山 鐘鳴夕陽下

別呂隱君 高啓

孤舟晚溪口 欲去重回首 不忍別青山 況此山中友

題楞伽山寺壁 高啓

惆悵望山裏 寒梅應自開 雲中何處覓 須待雪晴來

期陳則不至聞宿清隱蘭若 高啓

幽禽雨中響 門掩春塘綠 思君暮不來 應伴山僧宿

得家書 高啓

未讀書中語 憂懷已覺寬 燈前看封篋 題字有平安

赴京道中逢鄉友 高啓

我去君卻歸 相逢立途次 欲寄故鄉言 先詢上京事

曉發山驛 高啓

風殘杏花曉 馬上聞啼鳥 茅店未開門 山多住人少

訪固師而師適詣余兩不相值 高啓

我去尋幽院 師來訪小園 休言不相見 相見本無言

蔡村田家 高啓

西中未聲歇 煙火西林起 獨立候歸人 柴門夕陽裏

尋胡隱君 高啓

渡水復渡水 看花還看花 春風江上路 不覺到君家

待渡 高啓

渡子未迴舟 立傍沙頭樹 天寒雪欲來 莫滯人歸去

山中 徐燾

散步入空林 斜陽滿山麓 四顧寂無人 鐘聲出修竹

山中 張羽

一聲山鳥啼 幽夢忽喚醒 起來開竹扉 日上中峯頂

窗前瀑布寒 林外夕陽薄 清風何處來 撲撲松花落

絕句 錄一 張羽

荒村無四隣 茅齋夜深雨 田犬時一鳴 廚人暗中語

畫錄一 張羽

高人自無偶 獨向亭中坐 日落西風來 時聞松子墮

曉起 陳獻章

客眠不覺曉 開門見白雲 雲中何所有 童子二三人

觀羣兒釣 錄一 陳獻章

羣兒齊弄釣 其一偏多遇 餘三未得手 投竿來上樹

訪客舟中 陳獻章

船頭載春酒 船尾閣春沙 恰到溪窮處 山山積穀花

橋上 陳繼儒

兄弟自兩兩 逍遙板橋上 一道柳風來 囊裳渡花浪

山中 陳繼儒

溪邊不垂釣 山中不開門 開門山鳥驚 垂釣溪魚懶

春雨 陳繼儒

春江欲入戶 雨勢來不已 小屋如漁舟 濛濛水雲裏

秋水亭 陸粲

夷門秋水亭 梁王古臺下 臺前舊堤路 盡日無車馬

田間早行 梅鼎祚

白露濡我衣 行人道上稀 明星在高樹 滿田螢火飛

東林寺前作 梁有譽

山色斜依寺 江流曲抱村 時有山僧出 殘陽獨掩門  
寒日照流水 晚風吹古樹 遙聽暮鐘聲 依依度江去

過洗馬灘 張弘至

水急舟難上 舟人苦力微 莫嫌來似緩 歸喜掙如飛

哭亡女六首 錄四 馮琦

少小生京國 行年四十春 如何故鄉去 未作故鄉人

夢裏如相見 人前或錯呼 不如梁上燕 並坐已將雛  
兒念女有母 母念兒有女 強欲寄家書 執筆淚如雨  
女向隴頭臥 婦在閨中泣 片語暫相勸 已自青衫溼

秋雨古詞 舒芬

西風一夜雨 新涼入單被 不管客中人 寒衣未曾寄

夜行安慶 楊慎

風順月仍明 扁舟半夜行 雞鳴問前路 已近九江城

宿林中 靳學顏

微月下高木 疎星亂螢火 忽聞風雨聲 茅齋落山果

寄友人次角韻 董說

涼秋坐谿堂 采菱共儂剝 汝坐青藤根 儂坐豆花角

漫成九首 錄一 劉基

昨夜三更裏 還家夢卻成 朦朧半驚覺 連喚小兒名

元日雪 魏允中

夜雪曉猶飛 空齋寒色裏 忘卻是元朝 過午眼方起

夜行 魏允中

一片泥滑滑 縱橫荆棘樹 月暗少人行 前村不知路

小屯 歸有光

小屯不知名 土屋十數家 少婦時出汲 黃沙沒弓鞋

題小畫 錄一 龔詡

我本林下人 城市少踪跡 有癖愛看山 時來坐磐石

五律 十九首

春日金元見過 皇甫湜

當時好奇客 頻過旅人居 及此歸來日 翻憐會面疎  
花前茲夕醉 湖上隔年書 意氣君休問 嗟今已不如

宿三叉口 陸垵

雲樹蒼茫合 鄉關道路賒 近船呼伴侶 隔岸有人家

草短煙橫野 江寒月浸沙 家人應念我 今夜宿三叉

寄朱宸卿 黃習遠

與君同里閭 只隔數家居 無日不相見 有時還寄書  
開尊呼共飲 得句問何如 自作長干客 別來三月餘

訊程孺文 魏之瓊

不得巢湖信 時詢渡口居 繞離河路曲 背郭草堂虛  
林靜風驚犬 溪喧晚聚漁 主人游未倦 閒殺半牀書

寓言送李希賢 羅玘

山僧下山時 僧送不出山 但問下山僧 此去何時還  
乳水開一孔 白雲留半間 祇恐僧還少 僧還誰閉關

百苦 龔賢

百苦不一樂 中宵夢忽清 有家長作客 到老尙謀生  
牖月背人下 野風空自鳴 明朝渡江水 前路未休兵

憶舍弟 莊景

天邊聞一雁 杳杳向南徂 今夜西風冷 他鄉小弟孤  
五人千里去 九月一書無 欲寄千行淚 憑誰達客途

山行訪梅不得到竹林寺 杜濬

飲泉心未足 出谷復何之 欲問竹林路 樵人亦不知  
遠江雙鳥去 落日一峯敲 爲覺梅花近 山風故故吹

水村卽事示諸從子 錄一 錢澄之

檐溜何時住 春泥不肯乾 子孫如此衆 屋宇那能寬  
草澤收牛早 秧田護鴨難 衣棉脫更著 早暮覺全寒

同盧漢遠熊甘澍廖朱草楚山上人遊龍興巖訪松關曉庭遂至茅

篷 錢澄之

出城無十里 一路有泉聲 得伴寧辭倦 看山不覺行  
亭荒樵共歇 田小犢深耕 莫更思攜酒 吾方困宿醒

東山登眺 劉時舉

欲覽江城勝 先登郭內山 市塵紅樹外 樓閣翠微間



徑曲雲千疊 舟橫水一彎 更無人語雜 好鳥自飛還

歸田園 錢點

田家無歷日 卜歲聽禽聲 牧豕供秋稅 驅牛趁雨耕

繩牀綿被煖 板屋紙窗明 來往皆親友 終年不入城

水閘谿上 王綬

昨夜山中雨 梅花香一谿 不知泉水滿 忽覺石橋低

新筍過牆出 寒禽隔屋啼 老僧肯導我 路轉未全迷

曉抵無錫城外 王綬

一枕未曾安 篷窗燈已殘 孤帆衝水峭 高閣逼天寒

樹色山前暗 星光野外乾 村家人起早 小語出林端

木瀆 王綬

極目靈巖近 輕雲護翠微 山僧扶杖下 水鳥背帆飛

野渡靜涵樹 夕陽寒戀衣 有人自城市 負米返柴扉

暮憩池溪公館 李日華

小館秋陰滿 松風落照前 停車問村酒 倚樹聽疎蟬  
千點暮山紫 一羣飛鷺旋 此中有佳趣 且復緩征鞭

憶家君 陸粲

白髮人千里 朱門月半扉 燕山雲去遠 澤國雁來稀  
無夜不成夢 有書空道歸 遙憐北風勁 尋便寄寒衣

逢鄭校書 楊基

一從淮水別 千里各西東 又是秋風後 相逢客路中  
鬚眉憐我老 憂患憶君同 遙想西齋宿 孤燈照影紅

題廳事東亭子 魏允中

亭外可方丈 亭中只一間 人皆笑容膝 我獨愛開顏  
坐處四簷月 起來一帶山 朝朝爲吟興 客思未全閑

五古 三十二首

天台 朱國祚

人言天台高 四萬八千丈 中有瀑布泉 飛流衆山響 多少采藥人  
石梁不得上 我思劓壽藤 削作過頭杖 拄上最高峯 雲中一拊掌

茗溪春曉圖 吳倫

夜聽溪上雨 曉看溪上山 雨歇山更佳 尙在空濛間  
白雲掩疎鐘 綠樹迷遠島 居人想未起 村村自啼鳥

晚歸 吳益夫

夕陽下西林 草徑含暝色 鳴蛩在深樹 向晚猶不息 歸騎且遲遲 中天雲未黑

錄別 吳兆

行舟權已駕 斯須不相保 弱子纔一齡 就我懷中抱  
念此傷人心 皇皇何足道 如何故鄉生 不向故鄉老

送友回真定 李德

君自邯鄲來 復向邯鄲去 邯鄲月色好 夜照江南樹  
太行多峻阪 中有羊腸路 往來不憚煩 知君爲親故

松際月 沈倬

清風湖上來 徐徐入松下 風吹松子落 拾之欲盈把 月出松際雲 清光滿籬舍

訪樵者 孫一元

遠尋山中樵 不識山中路 隔林伐木聲 遙憶林深處 不晤竟空歸 日墮西陵樹

夜泊古崎 陳亮

寒山夜蒼蒼 清撥數聲響 風生蘆葦鳴 水落洲渚廣 月落知潮來 時聞人蕩槳

哀舊廬 張綱孫

朝出西郭門 一步一徘徊 道逢舊鄰里 問予何所之 予亦無所之 將往北山陂  
五世爲君鄰 一朝俱遷移 兄弟皆分散 妻孥何所依 矧復幼子亡 棄置在路歧  
頃從家中過 不知有阿誰 蘭桂摧作薪 空餘零露垂 風雨日飄搖 棟宇莓苔滋

念我平日居 涕淚不可揮

山中吟 黃鞏

春山澹無姿 春雲溼將雨 隔林有人家 知是雲深處  
雲深山徑微 欲往疑無路 不如山中人 只在山中住

曉發 戴冠

春鳥喔喔啼 取火照行李 隔離謝主人 出門渡溪水 仰觀羅浮嶺 白雲猶未起

丙寅六月過吳子往荻秋菴 歸子慕

蕭瑟湖上廬 六月如清秋 涼雨過柴門 綠楊風颯颯 水濱一穉子 使我心忘憂 洋洋何所求 終日無一魚 持竿釣不休 問之向我笑

題蔣廷暉小景 郭登

我家南山下 柴門別經久 不知今春來 新添幾株柳 清江閑釣竹 鷗鷺還來否 對此忽相思 長歌獨搔首

憶幼子 邢昉

汝生初墮地 我遊五茸城 三月始入門 聞汝呱呱聲 從此更遠邁 越嶠東南征 三爲象浦客 六榜惡溪行 在遠日何多 在家日何少 屈指幾度別 垂髫忽已好 三歲別我時 門前牽我衣 宛轉學人語 問我幾時歸 四歲及五歲 別我涕能揮 七歲差解事 鞠躬步庭幃 去冬復別我 含悽叩所如 本言渡江去 卻寄金陵書 今汝年九齡 毛詩誦曹鄴 翩翩過交友 再宿傾肝肺 前日有書來 頗與人意會 世亂我已老 我衰汝始大 如何久契闊 喟然發長慨

山月隨人歸 吳中蕃

上山月在山 下山月在路 不謂此清光 能逐幽人步  
取徑可無憂 到門先入戶 與我坐殘更 相依勝親故

牧牛詞 金礎

牧牛在平坂 牛飽心即安 插花滿丫髻 蘆管西風寒 誰家煙火起 日脚射江水  
叮嚀莫亂行 道旁有禾黍 斜披短蓑衣 不管閑是非 手扳青竹弓 野鳥雙雙飛

送表兄葉志通 王鏊

客從遠方來 過我陋巷口 十年積相思 舉此一杯酒 少時同嬉戲 今已成皓首  
行雲遊四方 寒郊折衰柳 中年常送別 不似此分手 昔時秦康公 見舅如見母  
今我復何爲 見兄如見舅

泊官步門 危素

人歸石城邊 鳥沒白沙尾 秋風涼蕭蕭 波靜月如洗 水鳥栖不定 半夜猶飛起

秋風 高啓

秋風屋外來 落葉紛我旁 不出門幾日 我樹如此黃 但覺成懶性 焉知逝頹光

朝食止一盂 夕臥惟一牀 仲尼欲行道 轍迹還四方 而我何爲者 不與世相忘

東坡路上阻水 高啓

不覺去村遠 瀟瀟柳間步 江南夜來多 春流稍侵路 蓑裳自可涉 不待漁舟渡

冒雨暮歸過白沙湖 高啓

天寒滿湖雨 獨棹東歸急 遙望水邊村 蕭條暮煙溼 家人應候我 深曠柴局立

雨中留徐七賁 高啓

江寒宿雨在 落葉滿村溼 留君繫君艇 莫犯風潮急 試問欲歸城 誰家借蓑笠

看刈禾 高啓

農工亦云勞 此日始告成 往穫安可後 相催及秋晴 父子俱在田 札札鎌有聲

黃雲漸收盡 曠望空郊平 日入負擔歸 謳歌道中行 鳥雀亦羣喜 下啄飛且鳴

今年幸稍豐 私廩各已盈 如何有貧婦 拾穗猶惻惻

送陳四秀才還吳 高啓

君是故鄉人 同作他鄉住 同來不同返 惆悵臨分處

手把長干花 回望長洲樹 恐起憶家心 愁題送君句

僕至得二女消息 高啓

我僕持尺書 來自我故鄉 讀書意未了 呼僕問彼詳  
云我兩小女 別來稍已長  
大女手摻摻 窗前學縫裳 小女啼啞啞 走索瓜果嘗  
喜爺有使歸 迎門各踉蹌  
我坐聽此言 欲慰意反傷 稍近尙爾思 更遠何能忘

送周四孝廉後酒醒夜聞鴈聲 高啓

別時酒忽醒 客去未空舍 風雪鴈聲來 寒生石城夜  
遙憶渡江船 正泊楓林下

夢姊 高啓

我家白頭姊 遠在婁水曲 昨夜夢見之 千里地誰縮  
不知別已久 尙作別時哭  
覺來旅齋空 風雪洒窗竹 田家有弟妹 終歲喜相逐  
我非王事靡 胡忍離骨肉  
城東先人廬 尙有書可讀 何當乞身還 親爲姊煮粥

過硤石 高啓

青山夾長溪 溪上有魚市 土門閉落日 野氣白於水  
虎行車迹外 鳥起鐘聲裏 吳語問居人 到州還幾里

秋夜 黃端伯



明月澹如水 寒光清桂枝 涼風不能寐 臥起行遲遲 上堂念今夕 下堂念昔時

再過真空寺道 馮琦

驅車上河橋 遙望橋邊路 風沙何蕭蕭 我父從此去 今日涿鹿道 明日瀛海渡  
我欲往從之 蒼蒼隔煙樹 緬惟膝下驢 深憶別時語 舉頭望白雲 低頭淚如雨

雲南曲 劉坊

雲南好草場 萬里連山岡 青草油油光 東也有草場 西也有草場 南也有草場 北也  
有草場

雲南好畋獵 虎豹肥欲死 雉兔無踪跡 兵圍民屋東 兵圍民屋西 兵圍民屋南 兵圍  
民屋北

金陵還家作 歸有光

自從出門日 預言相見期 西風揚子渡 猶嫌歸棹遲 于今對寒月  
芭蕉露灘灘 一兒縣城西 一女松江湄 心情兩縈繫 有如蛛網絲

六言 十一首

江上卽事 郭武

綠水橋邊酒店 白鷗沙上漁家 山前山後春雨 江北江南落花

弋陽道中 陸垞

石子船頭磊磊 溪聲枕上潺潺 人行上瀨下瀨 夢隔千山萬山

山中小景 宗泐

四山一片秋色 野客獨坐茅亭 渡頭紅葉如雨 石上長松自青

示知非禪人通醉

坐在十字街頭 發賣阿伽陀藥 病與不病俱來 和根一併拔卻

秋日 諸葛淵

白露清風時候 黃花紅葉家居 此際如何是樂 持螯把酒看書

東濠雜興五首 錄一 俞安期

送客偶經花塢 呼童莫上松關 雨晴隣叟乍去 月黑樵人未還

寫意 徐賁

看山看水獨坐 聽風聽雨高眠 客去客來日日 花開花落年年

山中作三首 錄二 陳繼儒

手持斑竹鋤頭 睡起刪花理草 忽然走入深林 驚散一羣黃鳥  
野寺一里二里 山隣三家五家 燒筍味兼蘭蕙 煮茶香帶梅花  
新涼 陳繼儒

燕子飛來枕上 荷花開到橋西 新涼幾番客至 永日不住雞啼  
題畫 梅鼎祚

半水半煙著柳 半風半雨催花 半沒半浮漁艇 半藏半見人家

七絕 一百四十二首

秋日雜興 錄一 何大復

溪上茅齋楓樹林 渚雲沙日共陰陰 連朝不遣家僮掃 紅葉蒼苔一尺深

村行 頓銳

白骨橫斜暴淺沙 破村飢色兩三家 荒田一望無人種 滿院蓬蒿野菜花

邨居 王恭

草徑茆扉帶軟沙  
隔林雞犬幾人家  
青山盡日垂簾坐  
落盡櫻欄一樹花

茅齋煮泉圖 王紱

小結茅齋四五椽  
蕭蕭竹樹帶秋煙  
呼童掃取空階葉  
好煮山廚第二泉

題枯木竹石寄李公實 王紱

罨畫溪邊水拍隄  
繞隄高樹倚雲齊  
君家正在樹深處  
滿地綠陰山鷓啼

題靜照軒 王紱

尋常客不到山家  
松火寒爐自煮茶  
風雪閉門才十日  
不知春已到梅花

九日過九江 王良佐

一舟西下繫垂楊  
忽值黃花夾岸香  
逢著故人汪太守  
九江城裏過重陽

泊嘉善縣 王廷相

千峯萬峯廣德路  
晝行夜行湖州纒  
七十五橋今過盡  
畫船明日入松江

送張山人歸越 方大激

雉子斑斑麥正齊  
黃梅四月雨淒淒  
新安江上攜尊酒  
送爾看山到浙西

璞石席上作 方大激

十年不慣出家門 千里來逢故舊存 正值江干春未晚 萋萋荻筍襄河豚

震澤竹枝詞送中書李舍人二首 史鑑

太湖東與海相通 大浪掀天難使篷 今夜且來洲裏宿 明朝又怕日高風

鴉鵲羣飛過別村 烏雲接日晚昏昏 西湖一夜翻湖起 大小人家水到門

梅家蕩權歌 朱國祚

梅家蕩口蜆子黃 瓜皮譽船七尺長 剪取東園白頭韭 蛤蜊風味勝橫塘

由商丘入永城途中作 李先芳

三月輕風麥浪生 黃河岸上晚波平 村原處處垂楊柳 一路青青到永城

貞溪初夏次南金韻 錄一 邵亨貞

棟花風起漾微波 野渡舟橫客自過 沙上兒童臨水立 戲將萍葉飼新鵝

江行 金誠

江水悠悠江路長 孤鴻啼月有一作帶微霜 十年蹤跡渾無定 莫更逢人問故鄉

冬日 姚璉

野人曝背向牆隈 時飲茅柴酒兩杯 滿階落葉渾不掃 拄杖去尋江上梅

牧童 姜玄

煙中草深黃犢肥 百舌繞身原上飛 斜陽幾處吹蘆笛 頭戴衣裳渡水歸

西谿竹枝詞 二首 胡介

山行處處曉光開 十八溪邊載舊醅 有屋盡從梅裏出 無泉不自竹邊來

溪上女兒鬢蓬蓬 鬢邊滿插映山紅 逢人問路公然應 指點前溪東復東

龔行儉以扇索畫 秦爽

行過溪橋日欲低 綠陰滿地郭公啼 微風輕颺茶煙起 知有人家住水西

田園雜興 徐勣

春流一夜水平堤 菱葉縱橫荇帶齊 分付兒童須愛惜 莫驅鵝鴨浴前溪

梅 張庸

拄杖尋春路不賒 小橋流水野人家 千年老幹屈如鐵 一夜東風都作花

溪家 張琦

紫絮茅花飛入門 淺溪幽響出籬根 溪家老婦閒無事 落日呼歸白鼻豚

春暮 張含

春暮南溪花氣香 亂蜂驚蝶不成行 漁竿在手不須放 釣得鯉魚三尺長

至高郵逢邢勉仁鄆登

客中相見倍相親 白酒黃雞莫笑貧 君住淮南我淮北 如何不是故鄉人

溪外陸澄原

短橋隱隱隔清溪 溪外人家更向西 行盡西溪人不見 一林修竹畫眉啼

睡起華幼武

梅子將黃杏子肥 綠陰門巷客來稀 南窗一枕睡初覺 胡蝶滿園如雪飛

雨止黃雲

滯雨無聊待雨晴 依然飽飯聽松聲 西風短檝明朝發 一路看山直到城

初夏黃繼立

楊花初點渡頭萍 十姊妹花紅滿屏 門前忽見漁舟過 風送鷓鴣一陣腥

三十六灣楊士奇

湘陰縣南江水斜 春來兩岸無人家 深林日午鳥啼歇 開遍滿山紅白花

過城陵磯楊士奇

城頭水落石層層 石上魚橋半搭罾 忽望高樓出城郭 舟人指點說巴陵

同韻公游西山 聞啓祥

青龍橋外柳如煙 一片西湖一帶泉 恰似江南三月景 可憐有水只無船

卽事 趙云佐

荆門日午喚人開 步出林亭石滿苔 昨夜山中風雨惡 一溪流水泛花來

春游田家四景之一 劉廌

竹籬茅舍兩三家 屋外青山綠樹遮 行客偶來春已暮 山南山北杜鵑花

小景 劉泰

雲溪一帶靜無沙 門對青山是我家 幾日不來亭子坐 東風開過紫藤花

小景 鄭昂

水驛山橋四五里 楓林茅屋兩三家 何人踏雪尋僧去 潮退春船閣暮沙

秋日江行 魯靖王肇輝

策馬行行出郭遙 平沙水落未生潮 楓林兩岸經霜老 紅葉無風落小橋

錢唐逢康元龍 謝肇淛



黃梅細雨暗江關 我入西湖君欲還 馬上相逢須盡醉 明朝知隔幾重山

田真墓 謝肇淪

汝河如帶日西斜 禾黍荒村四五家 惟有田真墳畔樹 春風猶發紫荊花

後園續詠 羅洪先

棠梨花開深淺黃 燕子初飛日漸長 草亭坐久客不到 半雨半風春太狂

南村雲起北村晴 晴鳩雨鳩更互鳴 東風吹雨衣不溼 我在桃花深處行

上新河竹枝詞 甘京

日日小潮算大潮 初三初八十三朝 乘潮來往漁船小 一手扳罾一手搖

今夜 杜濬

蕭寺孤燈雨滴苦 老夫一出旋歸來 呼兒且莫忙沽酒 今夜懷人不舉杯

乙巳八月十六夜 杜濬

中秋節後何妨雨 臥聽蕭蕭掩竹關 記得月明潮欲上 去年今夜在焦山

邨居雜興 顏俊彥

病臥經旬滿面埃 梅花落盡杏花開 畫梁無數空巢在 社雨蕭蕭燕不來

天目山居 圓信

簾捲春風啼曉鴉 閒情無過是吾家 青山箇箇伸頭看 看我菴中吃苦茶

他山感舊 錢點

山頭誰種樹參天 種樹人今去幾年 樹老逢春枝盡發 可憐人去不知還

仲冬 范汭

仲冬之交氣不齊 桃花李花開滿溪 行人認是二三月 祇少黃鸝枝上啼

青田溪上 牟嘉敏

月出高峯潮上灘 丁寧舟子放舟還 蒲帆不掛春流急 又過前溪白鷺灣

仲春偶成 牟瓘

山前山後花爭發 溪北溪南麥正齊 性嬾日長無箇事 枕書窗下聽山雞

江村卽事 陳綺

庭鵲查查日欲曛 黃魚初上欲開尊 今宵恐有客來到 分付家童莫掩門

松巖 無愠

山中十日九日雨 樹頭青子落不住 白犬尋縱入草間 驚起竹雞飛上樹

採茶曲 樓以登

採茶採茶復採茶 萬花落盡開茶花 看過花殘枝落葉 明年穀雨好抽芽

漁 丁養浩

苦竹岡頭雨漬泥 綠楊溪上水平堤 前村買得茅柴酒 自煮鱸魚向老妻

野景 于謙

千山萬山白雲起 三片五片紅葉飛 野寺蕭條門半掩 夕陽滿地一僧歸

題溪山深隱畫 王世貞

古木寒流一兩家 柴門晝掩待歸鴉 何如只向人間住 與客攜壺踏落花

乙亥新正十日過陳湖二絕 錄一 王鏊

漠漠湖光隱磧沙 陳湖東畔是君家 春來十日無人見 一樹寒梅已着花

江上 王彥泓

水畔人家竹繞扉 明月江上掉船歸 一篙打得蘆花響 驚起沙鷗拍拍飛

偶成 王彥泓

沿溪一帶綠楊齊 茅屋間間俯水低 不識誰家小兒女 盪船來泊小橋西

卽景 王衡辰

野菜香菇繞徑栽 漁樵日落棹歌回 回舟自識門前柳 卻問客船何處來

送友人游瀾 危素

常山縣前放船開 桐廬江口寄書迴 君行不受人間熱 六月海潮如雪來

二月望丘翁林亭 李夢陽

今日花朝好風日 梁園酒新花更開 走覓南鄰丘處士 月明騎馬醉深迴

新水至 李夢陽

桃花照水楊柳長 河水新添一尺強 昨夜舳艫銜尾至 不是魚航是酒航

東園漫興之作 李夢陽

大麥初黃小麥齊 櫻桃半熟壓枝低 先生阜帽何爲者 白首看花月每西

早夏示殿卿二首 錄一 李攀龍

長夏園林黃鳥來 百花春酒復新開 主人把酒聽黃鳥 黃鳥一聲酒一杯

禮玄齋雜詠六首 錄一 李日華

青竹籬笆黃土牆 春風樹樹野桃香 鄰家有酒我能醉 典卻鷄裘也不妨

偶成 李昱

獨木橋頭芳草池 野人縛屋正臨溪 日長課罷渾無事 自向花簷掃燕泥

冬日 李昱

冬日苦短不可說 況迺朔風吹倒人 鄰童折屐走相報 江上無數梅條新

漁家 李奎

翠竹寒煙沙上村 一江春水抱柴門 釣船晚繫垂楊下 姑婦捉魚翁哺孫

遊黔國公魚池四首 何景明

小岸城邊上輕舸 一溪宛轉向魚池 水藤濛濛荷葉暗 棹入中流總不知  
池邊二十五亭臺 箇箇朱窗向水開 亭下扁舟蕩雙漿 打魚送酒幾回來  
半竿斜日疎蒲明 兩岸人語鳧不驚 菱葉拂衣香袖舉 秋風吹浪綵舟輕  
三陣五陣打荷雨 一點兩點照水螢 笙歌留客不知夜 燈火迴舟直到城

秋日雜興十五首 錄二 何景明

野亭千橘未全黃 青柿紅梨俱待霜 南鄰老翁種橡栗 已見兒童收滿牀  
溪上茅齋楓樹林 渚雲沙日共陰陰 連朝不遣家僮掃 紅葉蒼苔一尺深

友人夜宿 何景明

相逢猶憶十年前 青草書堂溪水邊 四海交遊今殆半 幾人風雨對牀眠

畫梧竹 沈周

畫了梧枝又竹枝 綠陰如水墨淋漓 任人捲去糊窗壁 雨雨風風總不知

發宜春二首 錄一 吳維嶽

歲暮山行興亦嘉 寒梅幾樹正舒花 蒼峯百轉炊煙午 雞犬聲中五六家

客夜聞女病 高啓

歲盡歸期尙杳然 不知汝病復誰憐 隔簾兒女燈前笑 客舍愁中正獨眠

田舍夜春 高啓

新婦春糧獨睡遲 夜寒茅屋雨來時 燈前每囑兒休哭 明日行人要早炊

夢歸 高啓

何事頻頻夢裏歸 只緣未慣客天涯 覺來不見家人面 恰似前朝始別時

忽夢還家上楚船 來時舊路只依然 家人不識關山遠 有夢何因到我邊

臥病夜聞隣兒讀書 高啓

月淡梧桐雨後天 伊吾聲在北窗前 誰知隣館無兒客 病裏聽來轉不眠

冬日到山家 徐燧

十里青山古木平 半溪殘雪夕陽明 小橋流水門深閉 但聽雲中雞犬聲

郵亭殘花 徐燧

征途微雨動春寒 片片飛花馬上殘 試問亭前來往客 幾人花在故園看

下邳阻風 徐燧

邊風颯颯捲黃沙 白浪連天湧作花 野店無門盡閉 夕陽衰柳帶寒鴉

寄黃白仲 徐燧

家在西湖第幾峯 白雲無數水重重 鳥啼花落春光暮 同聽南屏寺裏鐘

小桃源呈吳元翰陳惟秦江仲魚 徐燧

山轉溪迴一徑斜 半栽桑柘半桃花 何年共結茅茨隱 添得人煙三兩家

秋日山行 徐燧

行盡空山日未斜 隔林煙火見人家 澗邊小犢眠衰草 風動滿園蕎麥花

山園雜興 徐燧

信步荒園日幾迴 秋風吹老壁間苔 澆花正怪兒童懶 忽見松陰片雨來

咏芙蓉送朱仲垣歸越 徐賁

雨晴送客柳塘西 野水芙蓉滿大堤 一路看花何處好 樓船直到若耶溪

燕京五月歌 錄二 徐渭

竹黃如稿少鮮妍 一叢五竿百箇錢 賣與人家那不貴 湯澆火炙過冬天  
孽薺菱藕賤如柴 竿蔗年來漸亦栽 百貨百珍俱得到 卻無一箇荔枝來

寄沈子 徐渭

兩月歸家不出門 谿邊荷葉大如盆 不知近到西湖上 更大如盆有幾根

送使人歸蜀 唐順之

蜀吳萬里說殊方 總是江流一帶長 暫醉瓜洲能幾日 乘風忽又過瞿塘

食蒜 唐順之

三餐齋粥猶嫌穢 百味葷腥久不嘗 頃來食蒜如餐蜜 已換山中一副腸

辛未八月二十二日大風雨口號 陶宗儀

大風怒吼雨如麻 入得更深勢轉加 曉起忽聞牆外語 今年只損木棉花



贈山叟 陳繼儒

有個小屏松下開 堂前蔬藥繞畦栽 老翁抱孫不抱甕 剛欲灌花山雨來

題竹里館 陳繼儒

有個詩人閒更閒 焚香日日掩松關 萬章老樹千竿竹 遮斷溪南枕上山

題賣茶山家壁 陳繼儒

東西崦曲半人家 種剩梅花種早茶 茶塢落英堆滿寸 怪來茶味是梅花

花中午餉 陳繼儒

何處停車午餉時 亂山深處有茅茨 高高下下梅千樹 家在花中香不知

春日雨霽泛舟 陳繼儒

柳葉沈沈蘆笏肥 碧湖青草鷺鷥飛 桃花一樹魚三尺 不醉月明船不歸

山居 陳繼儒

西崦茶塢有人家 雲抱青山水抱沙 記得春深無個事 梅花落盡又桃花

東軒獨坐 陳獻章

桃花寂寞梨花開 山中薄酒三五杯 村西有客可人意 風雨今朝期不來

清曉 陳獻章

清曉有人來款扉 風吹衫袖白披披 昨宵打雨山窗破 莫怪先生下榻遲

社中錄一 陳獻章

社屋新成燕子來 山丹未落野棠開 三三兩兩兒童戲 弄水攀花日幾回

柳渡頭答鄉友 陳獻章

溪南溪北荔枝垂 五月荷花乍放時 忽有酒船邀半路 三杯不記主人誰

喜李楚材至自嚴陵 張宣

一千里外兩飄零 十一年前好弟兄 相見不須論別事 故人誰死與誰生

舟人婦二首 錄一 張縉彥

小舫爲家是鄉 年年煙雨浣衣裳 春時記得南溪柳 今到南溪柳又黃

謝人送荷栽 張孚敬

五月一日分荷栽 祇恐今年花未開 明年花開主人遠 也應念我看花來

宿淞江驛驚潮 張弘至

萬里驅馳第一程 浙中山水舊經行 江船正好安眠去 又作迎潮夜半驚

過中和小市 張弘至

數家野店曲成村 老嫗當壚洗瓦盆 驚喚兒童走相探 半林秋日照柴門

野步卽事 張羽

村北村南叫鷓鴣 山前山後雨初收 牧雛不管簑衣溼 一笛春風倒跨牛

山中言志 將有四糖之下 聊述所志云耳 區大相

柴扉竹裏掩斜暉 童子山前採藥歸 滿地藤花閒不掃 風來坎上釣魚磯

下皋雜詠 錄一 黃潛

春風一夜到桑麻 嫩葉柔枝漸次加 曉起喜聞童穉語 新移丹荔亦萌芽

金臺早行 黃潛

數村行過始聞雞 星斗依稀月滿溪 遙想故園人正睡 梅花影落小窗西

登樓書所見 董說

疏林葉亦水生煙 正是江南曬稻天 鄰舍蠻童花插髻 柳陰撐出霽泥船

木瀆道中 董說

靠山結屋路斜出 拜樹成籬葉倒生 賣魚人踢石椶影 卸笠放船天晚晴

過江南高城訪孫景賢知事途中有作因錄奉柬 劉崧

屋角桃花深淺開 臨溪欲過復徘徊 誰知不是尋春者 自爲山人看竹來  
渡江一望一咨嗟 水繞山圍逕路斜 多謝野人相指別 青松嶺外第三家  
家在松蘿杳靄間 屋西流水並沙灣 可憐萬里懷鄉意 日上高城望北山

石塘山家 劉崧

隴麥高低逕路斜 小池楊柳帶人家 東菑午餉柴門靜 一犬籬根臥落花

夜驚 劉崧

雞喧犬噪牛夜鳴 空村月落旅魂驚 何人敲竹爭防虎 坐聽山風過五更

與郭約別 劉崧

火燒橋畔草離離 野水寒山日暮時 已渡前溪更回首 知君獨立尙歸遲

小莊 劉崧

老虎廟前溪水長 白羊坪下晚山蒼 到家尙遠心先近 指點行人問小莊

石鼓坑田舍 劉崧

松林日暮雨淒淒 十里陂田五里泥 一月離家歸未得 桐花盡落子規啼

出長逕藍陂 劉崧

行人三五度回溪 亂後人家井竈迷  
蒼耳黃蒿無路入 斷垣細雨鶉鳩啼

東原對月 劉崧

土屋無風夜不關 屋前遙見兩青山  
瓦盆盛酒茅鋪席 何日柴門望月還

見池上梨花 劉崧

梨花一樹照清池 暖雪晴風二月時  
忽憶小園曾種得 今年應發兩三枝

溪上晚眺 劉崧

槿巷蓬門處處同 行人橋外各西東  
荒原斜日牛羊下 一路西風蒟蘢紅

和溪道中 劉崧

深深黃竹兩三家 丘隴高低逕路斜  
犬吠柴門楓葉下 一籬寒日蔓絲瓜

觀野燒 劉崧

牧童敲火枯柳根 青煙獵獵起荒原  
回風吹入蓬科去 燒卻東家桑棗園

清明濟上 歸有光

瀛州三月雪中行 千里寒風到濟寧  
道上女郎斜插柳 始知今日是清明

初發白河 歸有光

白河流水日湯湯 直到天津接海洋  
胡風刮地起黃沙 三月長安不見花  
我欲乘舟從此去 明朝便擬到家鄉  
卻憶故鄉風景好 櫻桃初熟正還家

夏木幽居 聶大年

溪山到處有芳林 著箇茅亭在綠陰  
黃鳥不鳴花落靜 不知澗水夜來深

小景 聶大年

石田茅屋是誰家 童子開門掃落花  
一卷殘書春晝永 客來隨意具茶瓜

歸自北莊 龔詡

離卻南沙已夕暉 隨潮小艇快如飛  
多情最是波心月 一路相隨伴我歸

任溪道中 二首 龔詡

縈紆曲徑隨溪轉 伊軋肩輿傍柳行  
忽聽竹林茅屋下 琅琅一派讀書聲  
南望玉山三十里 從容時坐復時行  
不獨少寬輿從力 看花兼得聽啼鶯

夜歸 龔詡

短棹孤篷一葉槎 南周村裏訪俞華  
還家已及黃昏後 細雨斜風兩岸蛙

## 七律 六首

### 田園卽事 吳承恩

小溪小溪雨已過 前村後村花欲迷  
老翁打鼓保社裏 野客策杖官橋西  
黃鸝紫燕聲上下 短柳長桑光陸離  
山城春酒綠如染 三百青錢誰爲攜

### 新豐夜泊

馬一龍

新豐市上酒家邊 夜泊沽來不用錢  
北風吹雨欲作雪 客子到家將近年  
京國書傳千里外 剡溪路入小村前  
深林舊有高人隱 尋到梅花卻繫船

### 雁門紀事 王越

雁門關外野人家 不養絲蠶不種麻  
百里全無桑柘樹 三春那見杏花  
簷前雨過皆成雪 塞上風來總是沙  
說與江南人不信 只穿皮襖不穿紗

### 早行 明太祖

忙着征衣快着鞭 回頭月挂柳梢邊  
兩三點露不爲雨 七八個星尙在天  
茅店雞鳴人過語 竹籬犬吠客驚眠  
等閒擁出扶桑日 社稷山河在眼前

枕上聞雞鳴 唐寅

三通鼓角四通雞 曙色升高月色低  
時序秋冬又春夏 舟車南北更東西  
鏡中次第人都老 世上參差事不齊  
若向其間尋穩便 一壺濁酒一餐鹽

寄妻 解縉

一去京華已十秋 夢魂常在錦江游  
堂前土地勤勤掃 架上詩書好好收  
禾黍熟時頻照顧 園籬破處且培脩  
阿姑當奉兒常訓 辛苦終爲遠大謀

七古 二十二首

牛角飲 方以智

一牛角 兩牛角 滿斟四五壺 雙手前向握  
苗兒各唱四聲歌 笑我江南不能學

撒秧謠 施峻

東阡有田三十畝 秧穀已撒十五斗  
去年薄收難接新 種得早稻方救貧  
相傳今年晚更好 十分祇宜一分早  
東鄰西舍皆晚禾 我種早稻知如何

賣婦謠 徐泰



東家賣婦江南去 西家賣婦江南去 肝腸寸斷兩不知 涕淚并作河流注  
哭聲震天天地悲 道旁觀者各淚垂 人生不幸遭此時 他家食卻五歲親生兒

築隄謠 陸垞

彼田高 我田低 高田積土河成蹊 低田年年催築隄 築隄復取田中泥  
去年大水百穀傷 高田得熟低田荒 今年土龍雨莫禱 高鄉之田爲茂草

除夕歎 蔣之翹

去年除夕歸自北 行李到門天已黑 今年除夕客南方 江路逢兵歸不得  
山妻凝望眼將穿 只道今年似去年 高樹夕陽鴉影亂 尙同小女立門前

車碌碌 德祥

車碌碌 上山遲 下山速 前車行 後車促 後車不管前車覆 前車已覆無奈何 後車  
碌碌何其多

月夕看梅 德祥

梅花夜開香滿溪 溪上月出風淒淒 開門出溪看花去 落花流水無東西 枝間月落且歸  
去 明日看花還杖藜

牧牛詞 王翹

二月三月春雨晴 渚田水暖芹芽生 牧童驅牛出原隰 細草青青猶可食 夕陽短笛不見人 吹過村南又村北

東家兒行 李沂

濁水不流泥滑滑 東家小兒來養鴨 老鴨知人聲 小鴨亂雜行 奔入田中啜啜食禾穗 低頭忍罵驅鴨去 去年種桑長河湄 桑樹雖小桑葉肥 里中騎馬官人歸 出門探頭望 乃是東家兒 烹羊豕 走親戚 東家老嫗笑啞啞

贈江上老人潘止菴 錄一 姜梗

江郭村南十畝田 佃丁逃竄無租錢 新穀秋來無一粒 縣中長吏催科急 野菜作羹豆作粥 諸兒書聲出破屋

大雪詞 姜梗

城中斗米錢一百 雞豚塞巷木棉白 徵租下令雷霆急 老父賣兒街上立 老嫗關門掩面哭 冬青樹倒壓破屋

乞兒行 錢澄之

乞食兒 勿求飽 如今惟有乞兒好 富人有的糧食有丁 羨爾不聞追呼聲 鄉里小民難到縣 羨爾不見縣官面 官家賦稅多如麻 汝徒只稅籃中蛇 君不見 富家翁 朝防吏人夜防賊 通宵有眼合不得 籃中蛇去值幾錢 草堆一夜齣齣眠

早起口號 俞節婦

喔喔喔 隣雞三唱足 舅姑在高堂 穉子牽衣哭 誰道天未明 簷前見紅旭

棉花行 鄭瓊

秋陽燥烈棉花開 村婦引見提筐來 東畦采花西畦轉 從午至申筐不滿 大兒索花換糖喫 小兒索花買梨栗 孃言此花將有用 熟彈細紡機上織 染成青綠兼紅黃 剪裁與汝做衣裳 綠縐紅襖漂白袴 外面海青如汝長 羣兒拍手皆歡喜 隨孃提花到家裏 麗花揀花伴孃忙 明日采花仍復爾 日日采花花漸稀 孃心自苦兒不知 朝研暮彈通夜紡 丈夫急急催上機 機上翦來三丈六 每疋算作四丈足 大兒索幫向孃啼 小兒索袴向孃哭 縣官號令風火飛 胥隸吶喊狼虎威 民壯跟官缺工食 赦逋不准還重追 黃冊進陳戶口定 縣官新創加丁令 民間科差十倍多 富者賣田貧者病 前門里長催車需 後門甲首催荒絲 押尋且解官府急 飢凍難願兒女悲 麻繩鎖頸跪還拜 將布跟隨上街買

平時每匹三錢銀 急賣只得除五分 正數納官欠使費 荆條打臂驚無魂 歸見妻孥訴終始 舉家號哭哀欲死 破衾一幅養杖瘡 黃葉堆秋冷風起 官逋未了心膽寒 蕎麥豆苗還在田 屬妻收拾棉花子 今年將過還明年

貧居 毛子亭

昨夜風吹茅屋破 衾寒被澀不得臥 朝來縮頭怕出門 道旁老狐見人怒  
山南荳苗半枯死 抱甕欲汲溪無水 咽乾喉急暮來歸 小兒索食牽我衣

青山 王鏊

青山上有一片石 我醉欲眠此其席 舉眼望天天黑色 世間何處有此適 歌聲不斷雲自飛 天風飄飄吹我衣 山雨欲來還不歸

牧牛詞 高啓

爾牛角縛環 我牛尾秃速 共拈短笛與長鞭 南隴東岡去相逐 日斜草遠牛行遲 牛勞牛饑唯我知 牛上唱歌牛下坐 夜歸還向牛邊臥 長年牧牛百不憂 但恐輸租賣我牛

張節婦詞 高啓

靈壽張明府嫡母早寡守志

誰言妾有夫 中路棄妾身先殂 誰言妾無子 側室生兒與夫似 兒讀書 妾辟纈 空房  
夜夜聞啼鳥 兒能成名妾不嫁 良人瞑目黃泉下

首夏山中行吟 祝允明

梅子青 梅子黃 菜肥麥熟養蠶忙 山僧過嶺看茶老 村女當爐煮酒香

題老翁騎牛圖 劉基

白日上悠悠 竹梢霧已收 晴天不易得 及時當放牛 鄰家放牛多兒童 我家無兒只老  
翁 寒衣在機織未就 原上烈烈多高風 勿言衰老筋力薄 有牛可放殊不惡 但願天公  
不相惱 牛背閑眠飢亦好

題陸放翁賣花叟詩後 劉基

君不見會稽山陰賣花叟 賣花得錢卽買酒 東方日出照紫陌 此叟已作醉鄉客 破屋含  
星席作門 濕螢生籠花滿園 五更風顛雨聲惡 不憂屋倒憂花落 賣花叟 但願四海無  
塵沙 有人賣酒仍買花

漁家樂題漁樂圖爲曾朝佐郎中賦 劉崧

漁家樂 船裏爲家無土着 朝朝日日大江邊 長汀短汊從灣泊 醉眠飽食托煙波 卻笑

旁人事耕作 月明篷上蘆花飛 雨打船頭楓葉落 蘆花飛出水 鱖魚秋正肥 侵晨相喚  
提網去 薄暮放歌收釣歸 夫妻白首長相聚 有脚何曾踏山路 教兒打網莫種田 長江  
有水無荒年

# 清

## 五絕 七十五首

### 秋浦晚歸 王釐成

落日隱半規 離城尙十里 家家喚兒歸 我行猶未已  
坐聽阿孃語 連宵燈有花 那知昨夜裏 兒夢早歸家  
呼奴具餐飯 慰兒長途饑 關心雨後寒 試兒身上衣  
兒饑與兒寒 重勞慈母心 天地有寒燠 母心隨時深

### 踏雪 趙關曉

踏雪訪山樵 山樵踏雪去 一路草鞵痕 尋入松深處  
寒衣 謝淞洲

含淚別鄉人 翻然作遊子 枕上聽猿啼 家鄉五千里

### 雜韻 大寧

峯頂屋三間 松邊石一片 早晚雲飛來 只有樵夫見

田家 任瓊

柳陰荷鋤歸 豆莢未出土 呼兒夜飯牛 昨宵有微雨

出門 孫嘉樹

出門兒無語 抱膝嗚嗚泣 入門兒歡迎 牽衣呼母入

山居 張吾瑾

朝雲起山南 暮雲起山北 只有山中人 朝暮看山色

春遊 李靖

坦步到西村 村多楊柳樹 黃鶯自北來 飛入陰深處

遊水竹庵和樓更一 徐正學

谷口已聞鐘 山僧苦未逢 再行四五曲 又見兩三峯

自茅山寺歸 顧德圻

歸途三五里 一味晚禾香 秋水秋山外 行人步夕陽

偶成 王有香



冒雨訪山樵 獨上山橋去 一路草鞋痕 直到林深處

夜起 朱垣

遊子貪遠行 披衣忘太早 四顧寂無人 山頭月皎皎

題夢香生做陸放翁詩意畫冊 錄一 錢琳

梧桐一百尺 日日呼童洗 苔徑綠無塵 時時落桐子

卽日 王士禛

蒼蒼遠煙起 槭槭疏林響 落日隱山西 人耕古原上

灣頭 王士禛

一條楊柳岸 十里白蓮花 歷歷漁樵舍 飛鷗上釣槎

九月十五夜哭師兒二首 王士禛

滴盡眼中血 驕兒聞不聞 他鄉風雨夜 寂寞一孤墳

猶是中秋月 清光依舊圓 卻將萬行淚 送汝向重泉

寒食棠梨道 紙錢高下飛 夜臺音信斷 兒去幾時歸

江上 王士禛

水餐復水宿 淹留更何事 暮雨楚江邊 人歸草堂寺

故鄉 王鴻緒

每念故鄉事 忽遇故鄉友 緘書未及開 試問家安否

幽谷 王繩祖

遠山抱屋斜 幽谷幾人家 積雪寒不掃 野橋見梅花

重陽 王繩祖

重陽看幽菊 白酒山家熟 日暮獨歸來 溪風響巖谷

松臺山 朱彝尊

蒼蒼山上松 颯颯松根雨 松子落空山 朝來不知處

村夜 朱彝尊

山昏月未明 木落霜初降 何處夜歸人 一犬吠深巷

歸過高淳作兩絕句 江湜

來日江牌子 江牌子船名 來時所坐也 今朝泊何處 偏是高淳船 載我還家去

我坐高淳船 還過高淳湖 卻恨高淳水 西流不向吳

送子長歸里 江湜

送君歸蘇州 淚落送行處 非爲君去悲 自悲不能去

船中曲

錄東湊至邵埭作

錄一 吳嘉紀

野鴨衝水飛 小兒拍手笑 寡婦撥船來 回頭老鶴叫

後園六絕句 錄一 宋犖

種藕向清池 來看日幾市 新葉小如錢 呼童打花鴨

晚過秋聲館 汪沆

山館久不來 向夕啓竹戶 小鵲忽驚人 飛上梧桐樹

楓橋夜泊 李調元

初月上平林 微風動高樹 驚起沙上禽 飛過楓橋去

重安驛 何紹基

來時見鳳山 去時見鳳山 憑闌忽不見 身在鳳山間

兒啼 屈大均

短掉層冰上 汝啼應苦寒 初生便行路 淚落此河干

兒小 屈大均

兒小方垂髻 能爭掌上梨 雙雙初學語 恰似乳鶯啼

稚子 屈大均

丫角半垂絲 蠻花大於髻 雙行桃樹間 婀娜才五歲

小兒 屈大均

小兒雙角髻 狀似折腰菱 欲與簪花朵 葳蕤恐不勝

衛河四絕句 錄三 查慎行

河流千百曲 來往候風信 東南西北間 那得灣灣順

微雨曉來霽 孤雲斷不還 黃沙千里道 何處著青山

佳人跨驢去 隔岸是娘家 渡口風長好 吹開罩面紗

雲尖渡卽目 查慎行

水鳥插頭眠 近船忽羣去 只有一條谿 前飛落何處

景州城外 查慎行

遙遙廣川城 望望十里埕 連日北風多 春冰開復合

夏夜 查慎行

星火乍明滅 螢光入檻流 近來渾少睡 夏夜長於秋

初八日斷橋晚步 洪亮吉

閒從獨鶴行 偶與孤僧遇 落葉忽驚飛 衝人入林去

即日 高珩

矮屋水邊村 斜陽山下路 垂柳綠遮門 中有幽人住

靜坐 袁枚

靜坐西溪上 春風白日斜 吹來香氣雜 不辨是何花

偶作五絕句 錄一 袁枚

偶尋半開梅 閒倚一竿竹 兒童不知春 問草何故綠

所見 袁枚

牧童騎黃牛 歌聲振林樾 意欲捕鳴蟬 忽然閉口立

題畫 袁枚

村落晚晴天 桃花映水鮮 牧童何處去 牛背一鷗眠

十二月十五夜 袁枚

沈沈更鼓急 漸漸人聲絕 吹燈窗更明 月照一天雪

松下作 袁枚

小住倉山畔 悠悠三十春 蒼松都已老 何況種松人

栽樹自嘲 袁枚

七十猶栽樹 旁人莫笑癡 古來雖有死 好在不先知

錢 袁枚

百物皆可愛 惟錢最寡趣 生時招不來 死時帶不去

偶步 袁枚

偶步西廊下 幽蘭一朵開 是誰先報信 便有蜜蜂來

春日喜晴 袁樹

陟覺春寒減 柴門向午開 今朝風日好 或恐有人來

弄船人 袁樹

君看弄船人 長篙注在手 兩脚跳如飛 一身乃未走

舟中作 陳維崧

潮生前秦橋 月出東湖潑 不見故鄉城 漸聞故鄉語

嬌女 陸繼輅

嬌女如嬌鳥 依人亦可憐 知他長成日 飛傍阿誰邊

卽事 郭麐

三更呼酒飲 酒盡蒙頭臥 待渠酒醒時 已是五更過

夜過崑山 湯貽汾

城郭不曾見 崑山半夜過 人人愛明月 一櫓一聲歌

日佳臺柬內子 湯貽汾

昨宵待明月 攜手上高臺 今夜月先在 如何人未來

繁峙道中 湯貽汾

山村柳絮天 稚子習耕田 飯罷日亭午 人牛相對眠

舟行絕句 趙翼

一身充兩役 誰道吳娘癡 襁兒背上臥 搖櫓並搖兒

欲雨 劉嗣綰

垂垂一林棗 下有小兒女 暮雨村上來 雙鳩踢枝語

十二月廿七日夜寤卽事 鄭梁

歲暮夜大雪 紙窗如月明 微風過庭樹 簷馬時一聲

聶口二首 錄一 錢載

小船牽縴前 勿使大船後 望見黃鶴樓 日斜至漢口

江浦見收早稻四首 錢載

昨日見稻田 今朝見割稻 江國別十年 那能不言好

曬稻復打稻 心歡忙亦閒 黃鋪萬頃田 碧映一圍山

掃穀復龔穀 老翁樹下看 牽龔布裙女 赤脚轉團圓

篩米復淘米 滿家香醇醇 今朝是七月 明朝是八月

梅花臥鳥 魏際瑞

冬山清似秋 曉月明如夜 山鳥月中寒 夢醒梅花下

金灣 嚴可均



落帆金灣江 遙遙問釣叟 爾知湖上村 誰家有美酒

觀採蓮 袁綬

日暮歌聲起 前溪正採蓮 渡頭逢浣女 相與問華年

五律 二十七首

縱棹園 張康衢

過橋人跡少 一逕入溪斜 曲岸圍新荻 柴門掩落花  
奚童閒汲水 幼女學鋤瓜 坐覺塵囂遠 晴天卷片霞

山中野步 孔升

獨行無伴侶 犬吠有人家 老樹依山曲 荒谿繞屋斜  
雲深迷古洞 籬破雜閒花 借問停舟處 迢迢路尙賒

蘊草浜候潮 朱滋

咫尺吳淞路 扁舟不易行 水消纔半尺 月落近三更  
竹樹蕭蕭響 村雞喔喔鳴 終宵燃燭坐 爲待早潮生

齊市夜泊 朱滋

譟鼓三更後 江船泊岸初  
連檣皆載米 有客獨翻書  
市小人聲寂 村寒雞唱餘  
權歌幾處起 靜聽意何如

入都叩別家大人 俞繡孫

最是傷心處 牽衣欲別時  
親年雖未老 兄病已成癡  
寒暖宜珍重 晨昏善護持  
雲山千里隔 何日是歸期

送彭有斯孝廉歸儀真因懷紀伯紫 王士禛

我憶真州美 城池靜不譁  
長橋帶修竹 野水抱人家  
南郭羣山好 東園一徑斜  
鍾山遺老在 相見話桑麻

漫成 王崇簡

雞聲出深柳 遠見有人家  
村逕依流水 籬門逐野花  
煙高林影靜 雲夕日光斜  
坐此不知晚 麥田起落鴉

雨後泊舟 王文治

午景正煩熱 雨過暑卻迴  
舟依綠樹泊 窗對白雲開

持麈蠅先避 垂竿魚欲來 遙看帘影動 知是賣村醅

秋日深雲庵晨起 王文治

山閣睡初覺 禽聲四面來 屋藏林影暗 窗對日光開  
清澗浮紅葉 頽牆繡綠苔 偶逢僧汲水 抱甕與徘徊

課女 吳偉業

漸長憐渠易 將衰覺子難 晚來燈下立 攜就月中看  
弱喜從師慧 貧疑失母寒 亦知談往事 生日在長安

夜發 吳嘉紀

田家夜收稻 吾亦適江關 燈火遠相映 去留俱不閒  
水喧仙女廟 月上謝公灣 一路饒風景 扁舟任往還

園田通倉橋西 吳嘉紀

煙火幾十家 園田三百畝 野雪甘青菜 春風脆新韭  
門閒時繫船 市近易沽酒 我無買地錢 空羨荷鋤叟

雨過 吳嵩梁

雨過讀書臺 儻然絕點埃 階前一蛩語 天末萬鴉回  
坐石月初上 彈琴風自來 晚香在衣袖 忽悟藕花開

示女宜護 吳嵩梁

新詩經母授 了了誦聲初 稍待垂髫日 應能課弟書  
中年誰慰我 合室盡憐渠 兩妹同嬌小 心靈恐不如

題海珠菴 李調元

臨流欲賦詩 偶向盤石坐 灘急萬魚橫 溪深一鳥過  
清陰不知寒 綠淨亦可睡 忽驚鏡面中 照見我一箇

老漁 何紹基

白髮滄江叟 低頭作老漁 移舟來問客 有酒更多魚  
我欲詢名姓 因之問里閭 無言搖櫓去 日落暝煙虛

別稚女 屈大均

稚女難爲別 臨行淚欲揮 可憐初絕乳 未解一牽衣  
念爾在襁褓 同予餐蕨薇 晨昏娛祖母 莫使笑聲希

兒明洪生日示之四首錄一 屈大均

九齡猶失學 汝懶豈吾兒 名父難爲子 貧家未得師  
詩書雖不好 紙筆亦同嬉 弟妹多歡笑 須令祖母知

夜泊常州 俞樾

毘陵城外路 雲樹故依然 一雨足暝色 孤篷撐暮煙  
人家排水次 燈火認隄邊 記取舊遊地 重來已五年

孫女阿葆 張文虎

離家今四載 襖襟已雙丫 走避渾疑客 孤生未識爺  
倚嬌頻索果 愛好欲簪花 嫁汝知何日 吾衰滿鬢華

靈鷲寺 屠倬

尋源入溪口 忽復轉前山 萬壑生春水 長林橫石關  
佛鐙隨月上 飛鳥先人還 余亦刺船去 梅花第幾灣

出門 端木國瑚

出門誰道客 相話只家常 早起看行李 淒然入異鄉

全無別時語 反比語時長 惟念平安字 春來兩地望

楊林塢拜四叔母與諸兄夜話四首 蔣士銓

茅屋無多姓 柴桑自一村 略驚諸母老 深喜薄田存  
清白懷家世 艱難愧友昆 環看小兒女 或可大吾門  
顏色未全改 隣人相識稀 聽疑鄉語別 來賀遠方歸  
雞黍今宵盛 兒童昔日非 傳聞十年事 問答語多違  
生計諸兄拙 貧居八口單 深知讀書誤 未覺力田難  
風雨敝廬在 錢刀衆業寬 起衰心獨苦 憐我戴儒冠  
旅食悲前日 虛名愧此身 不堪懷舊事 何以慰先人  
才大寧無用 山深別有春 團圓拌一醉 明日各風塵

舟過丹徒 王玉璜

出行已百里 村落半柴扉 隻鳥時依樹 孤螢不上衣  
月高人影小 潮定鷗聲稀 沿水星星火 歸鷺宿鷺飛

## 五古 五十六首

### 白雲洞 陸彥

我遊白雲洞 身在白雲裏 落葉和松風 時聞響山雨  
石牀不可留 清寒逼衣履 隔塢暮鐘聲 雲留我歸矣

### 早行用前韻 周光鄰

叱牛人欲起 雞唱村將曉 策馬度荒阡 秋風生木杪  
路轉前山來 楓林殘月小

### 園中曉起 陳壤

曉來天氣涼 酒醒夢亦醒 閒窗蕉露多 滴響入清聽  
披衣下苔階 隨步過花徑 殘月猶在池 無風水光定  
隔林有茅庵 飄來數聲磬

### 賣女詞 張雲璈

八歲小女兒 生長在茆屋 去年阿爺死 有母不能育  
賣女錢十千 聊以繼饘粥 得卻手中錢 失卻心頭肉  
女淚盈一把 母錢盈一匊 阿女淚未乾 阿母錢已足

### 春日訪萬竹隱 徐闇

門前有流水 舍後有修竹 幽人抱膝吟 鳥聲亂谿谷  
我來值春明

花氣泛林麓 糞酒復烹鮮 斜陽映茅屋 酣來枕石眠 笑呼山月出

歸晚 黎兆熙

薄暮跨驢歸 歸向城東路 落日隱青松 寒煙在溪樹 望望荷樵人 依依入村去

將抵灌口 蔡時田

十里一柳村 陌上柳無數 柳下見田疇 田外仍柳樹  
深秋圍茆屋 人去莽無路 惟有荷鋤人 自繞阡陌度

偶憩 龍爲霖

避暑投遙林 碧草生煙霧 坐靜時聞香 不見花開處 老農田間回 問客來何處  
答言偶憩此 茶瓜啣嗟具 款款話農桑 依稀忘日暮 臨別相送遙 墟西指前路

主人驅犢歸 余亦從茲去

觀田家刈禾 朱輅

雞鳴田父起 亟亟收田秬 然燈各啓戶 陽烏光未生 婦子煮藜莧 羣餐喧豆棚  
忽忽結伴去 仰視秋雲橫 連朝天氣佳 場圃築已成 風月晚林下 碌碌村村鳴

山村晚歸 任曾貽



薄暝起寒煙 微茫下山路 瀏瀏石上泉 蕭蕭月中樹 時有采樵人 遠向前村去

賣米船 吳本錫

夜到賣米船 早起期負戴 五更已揚帆 云向前村賣 前村見船來 持錢亂招手  
更言過前村 倏忽過村口 哀哀待船人 日暮恆苦飢 中流西南風 空飄平糶旗

將試吳陵別母作 李鍾泗

往兒出門時 兒行兄相依 母顏別兒苦 阿兄能慰之 茲晨兒出門 母心增傷悲  
母悲還顧兒 猶恐兒心哀 兒哀出門去 母悲誰竟期 去去兒無語 兒心愴以摧  
出門復入門 淚落不可揮

鬻女行 張孺

貧婦提弱女 女年方六七 云是農家婦 丈夫患羸疾 家有汗邪田 秋霖不結實  
翁姑共垂老 死生莫可必 四口相依倚 區區此女一 此女賣與人 願得布一疋  
但求此女飽 遑恤及後日 布作翁姑裙 重重線縫密 此是兒孫身 仍令常在膝

早起 劉源岷

清曉披衣起 出門步遲遲 東方日初上 萬戶未開時

寒氣逼人骨 冷風吹柳絲 誰家落魄子 手持短簫吹

暑夜卽事 史致澤

納涼柴門外 坐久逾初更 殘月猶未上 螢光時一明  
不聞荷菱香 但聽修竹聲 蘆葉忽颼颼 夜潮知已生  
枯枝帶葉燒 俄頃松風鳴 臨風一再啜 頓覺心神清  
柳陰覆幽徑 屋角懸疏星  
呼僮汲新水 樹下安爐鉗

卽景 李汝章

林疏風漸冷 山暝月未吐 幽徑寂無人 草際流螢度  
一鶴下秋煙 松花落如雨

野步 盛丕

入春多苦雨 偶得數日暖 郊原踏青去 鶯啼綠楊岸  
柴門狎雞犬 春風吹桃李 暗香任凌亂 野渡煙蒼茫  
村徑喧童穉 悠然歸獨晚

晚望翠微寺 王士禛

澗西翠微寺 迢迢翠微裏 蒼茫探樵路 似有微鐘起  
山風冷吹煙 斜日亂溪水 紛紛飛鳥還 行人去何已

宿靜長書屋 王昶

方池澹微波 迢遙映明月 竹外水禽歸 露下荷香發  
微雲渡遠山 夕陽下高閣 梧竹何蕭森 綠陰散籬幕  
曲徑不逢人 茶煙出林薄

九月二十日蚤起偶作錄一 王衍梅

一客蒼梧來 一客桂林至 我雖懶送迎 好客自掃地  
秋花笑籬落 揖讓含野意 少頃榜人催 旁有一犬吠

山園 王繩祖

亂峯隱斜陽 深園入輕霧 明月光在天 涼風忽生樹  
村犬吠已寂 歸樵晚仍遇 何處遠鐘聲 蕭寺依雲住

山園 任昌運

山園饒綠影 頗愛花木疎 開軒面竹所 涼氣過雨餘  
沿池多種柳 影覆池有餘 愛看山月上 約客剪園蔬  
時鳥欣一哢 幽興復何如  
忽聞兒童笑 新釣池中魚

風雪歸莊圖 任昌運

澗水斷小橋 路迷三叉口 村翁披綠蓑 獨貰一壺酒  
不見夜歸人 柴門空吠狗

寓齋雜詩五首錄一 江湜

小齋六尺闊 臥榻據其半 喫飯與讀書 兩用榻前案  
客來須命坐 撤書書帙亂 客曰此舍窄 盍以他舍換  
或月一遷地 傳舍歷無算 因是易安居 美惡不區判  
方當借此齋 文史稍編貫 君看今日晴 紙窗尙明煥  
案旁餘一几 堆書便抽看  
平生南北遊 行跡如流竄  
是身一虛舟 舟行那問岸

重至華亭作一首 錄一 江湜

當塗至華亭 水路一千里 歲晚役車休 而我行不已 問我何爲忙  
欲答豈有以 曰爲鱸魚來 此言亦無理 有窮不可諱 乞食而已矣

客中同舍生 江湜

客中同舍生 有得家書者 書傳母病情 望子到膝下 迢遙二千里 嶺壁不通馬  
風雪迫凋年 時危行客寡 欲歸難遽歸 方寸可知也 嗟我母亦衰 曾病今年夏  
夏後書不來 燈前淚盈把

僮言 江湜

有僮從我來 今朝告我去 問汝去何方 曰尋喫飯處 典我衣與裳 猶可七日糧  
更爲五日留 於汝亦不傷 答言身作僕 原是逐口腹 從主杭州來 百飯百不肉

不肉還是可 不飯愁殺我 欲去那復留 坐待不舉火 况主官太卑 直同與儂  
與儂復役我 豈非欺我哉 他官作計全 挾貨累萬千 以母錢爲官 自可招子錢  
主今空兩手 餓來卻張口 除是吸西湖 西風吸得否 何路不稍寬 必做蠶樣官  
冬衣旣典盡 冬至方嚴寒 儻言一何直 主人重歎息 彼以飢故逃 我飢逃不得

流民船錄一 吳嘉紀

撥棹欲何之 遠投煙火處 歲儉竊盜多 村村見船怒 男人坐守船 呼婦行乞去  
蔽體無完帶 蔽身無敗絮 嬌兒寘夫膝 臨行復就乳 生長田舍中 那解逢人訴  
一米一低眉 淚溼東西路

舟中贈程聖瑞時聖瑞往江南 錄一 吳嘉紀

江南多水村 村村植梅樹 花開雪始晴 蕩漾湖日暮 此中好鄰舍  
攬船互來去 茆屋臨稻田 婦人織棉布 自然足衣食 何必桃源住

喜二女至 吳清藻

自我客邗上 多與親愛別 一女寓東亭 相離里數百 音問雖常通 苦少見面日  
昨者寄書至 相見預可必 曉起正尋思 卻看已在側 笑率諸兒女 羅拜環繞膝

問我老健否 眠食可安適 繼問家鄉信 毋以次定吉 復若有千言 欲述不能述  
我亦轉無語 相對兩默默 維時我寄居 與弟正同宅 遣見叔父母 一一問安畢  
並見諸兄嫂 逮及弟妹姪 彼此訴離情 笑語喧滿室 人情會合難 誰能不珍惜  
况乃一家人 團聚更喜悅 殷勤留小住 未肯遂分析 今朝將告去 各各淚沾溼  
所去幸不遠 相隔在咫尺 朝暮可歸來 還慰我頭白

永年有野老 吳安業

永年有野老 務農居北鄉 上田種秬稻 下地種雜糧 有牛三四頭 力足任園場  
自從三世來 未嘗徙村莊 開門臨坡隴 不識道里長 衣食出天公 年年無缺望  
憐我不耕人 作客來遠方 勸我買薄田 歸種西湖旁

七里瀨 李調元

煙江漁互唱 小艇人相語 峯回不見峯 路轉疑無路 遙見山下人 漸入山中去

淒淒篇爲亡友金擎伯作 沈日富

爾我各食貧 爲人課童子 爾家東市頭 爾館西市尾 且晚爾殊勞 往返常一里  
長夏各小病 我病先爾起 看爾就爾家 爾已在館矣 見爾無他言 唯言酷暑裏

珍重爾出入 无疾乃可喜

竟夏尙無恙 忽忽秋令及 由館致爾書 言我今且疾 約我明日來 夕已在我室

言常不得暇 得暇來故亟 明日爾仍來 我已歸不值 爾復卽我家 則又在明日

日日來看我 爾來一何密 骨肉不是過 交游寧可必 寧不感爾意 相關真息息

鄰婦悲 金和

還家不得處 寄居非家時 涼雨睡未起 但聞鄰婦悲 鄰婦作何語 一家十三人

中春纔幾日 盡死餘一身 此禍何自起 起自賊至夜 夜半聞刀聲 走避北山下

遠投山下村 村中阿姊家 自然驚失魂 隨風播在沙 風沙將魂去 老幼一時病

舅姑年最高 先後遂竝命 夫婿及小郎 未嫁阿妹三 比肩小男女 四女纔一男

此病死略同 彼病死不異 朝死棺未封 夕死棺又至 官軍駐鍾山 四月歸家來

生者尙何人 一女唬母懷 頃者天大暑 此女復病死 生者尙何人 屋內一身矣

如何乞醫藥 死者未死前 死者既死後 如何償葬錢 惟有一塊田 亂時向誰賣

賣後衣食難 但恨一身在 一身豈免死 死胡獨後期 一身豈惜死 死更無人知

人間人不知 鬼路鬼自熟 只願作鬼安 不願作人哭 不願作人哭 哭聲已不支

問答有老翁 欲慰難爲辭 鄰婦如此悲 所以摧心肝 我非鄰婦悲 何以眼鼻酸

淨業湖待月 法式善

獨坐空亭中 林風吹獵獵 草根一陣香 飛入兩胡蝶 童子撲取之 乃知是黃葉

桃花寺 查慎行

已過桃花口 再問桃花寺 獨客扣門來 老僧方坐睡 欲知春淺深 但看花開未

晚抵梁家鄉牖 查慎行

十里五里程 三板兩板水 遠寺有鐘聲 隴隴煙樹裏

隨風渡渚去 已斷還復起 獨客此時聽 孤燈壓篷底

胥門曉發 查慎行

月落日未升 大星明一箇 舟人貪早起 客子便晨臥 忽聞水氣腥 知有漁榔過

五月二十六日到家驚聞兒建京師訃信傷慘而作七首錄二 查慎行

去歲夏四月 兒來告行期 我時臥在床 汝去故遲遲 我欲速汝出 慰汝以好辭

爲言吾雖衰 歲月尙可支 銓除汝已及 行且把一麾 勿論地遠近 三年望旋歸

詎料凶問來 哀哉甫及暮 此語恍如昨 此情痛難追



兒生乃冢孫 及見祖考妣 祖沒五十三 兒齒十一矣 兒亡四十八 少祖五年耳  
家世孰高年 吾今踰六紀 人間愧爲父 地下愧爲子 孰與遊九京 頽齡諒無幾

歲暮飲酒詩十篇 錄一 洪亮吉

一屋無閒人 勉復出門走 一巷無閒人 驅車出坊口 東西街十里 排戶款良友  
皆云出門久 十至九不偶 沿路爆竹聲 兒童拍雙手 車來仍復返 斜日已交酉  
一世無閒人 誰同飲盃酒

同吳竹橋丈邵元直范東叔秀才探梅致道觀三首 錄一 孫源湘

春風滿城郭 出門無不宜 好友人二三 如與春風期 飄來梅花香  
清我心與脾 不知何處開 隨香信所之 香氣忽不覺 舉頭見南枝

雪溪 符曾

溪水寒不流 溪上雪盈尺 填溪溪路平 溪行路欲絕  
北風三日勁 雪凍堅如鐵 何時掉舟來 臥聽聲騷屑

月下有懷 戚學標

月光清照人 人在光中立 愛此涼夜佳 不覺衣露溼

靜樹無鳥驚 虛檐有螢入 何處欲寄衣 寒枯響方急

還家詩

壬子九月二十五日

張問陶

娶妻五六年 謀歸不可必 生兒忽已死 生女已過膝 今冬得暫歸 婦孺謹若狂

草草覓輿馬 一夕齊歸裝 一夕齊歸裝 五日到家裏 入門見鄰竹 隣竹亦可喜

父母聞婦來 快若兒新婚 慰婦且自慰 明年當抱孫 原註是時能悅 阿嫂聞姪來 是能讀女誠

紅巾裹梨棗 攜姪看宛若 宛若亦姣好 阿弟聞嫂來 攜婦前致詞 婢僕窺戶外

嫂當爲之師 兒女聞妹來 牙牙若相問 老生談中庸 不知何議論 我有南海兄

雞狗騰牆頭 填門無數客 賀我如封侯 賀我如封侯 我醉忽狂叫 我醉忽狂叫

兄歸乃妙妙 明日一書至 兄已過渝州 明日一與至 神速如置郵 笙歌盈堂前

兄歸家始全 全家忽重聚 昔別知何年

送客 張際亮

晨起置樽酒 寒光生裳衣 顧彼雙飛鳥 眷眷常追隨 前夜聞秋風

昨夜聞秋雨 風雨滿長途 君今去何許 但聞落葉聲 不聞行人語

溪上 莫友芝

朝朝溪南行 暮暮溪北坐 耽此野人居 茅檐花竹裏  
酒熟不須肴 信意摘紅果 溪鳥忽飛來 白向尊前墮

野行 彭兆蓀

人家不逢人 籬竹斜映水 斗覺衣裳單 身入青蘿裏  
寥寥一犬吠 意倦作旋止 傾耳聞希聲 前村落松子

浩然伯父家石洞歌 湯貽汾

伯家有奇石 高過青松樹 大洞三十六 小洞更無數  
粉蝶時穿來 紫燕時穿去 都是洞中仙 只愁不能住

幽尋 趙翼

幽尋不知疲 意行度遙陌 昔游所未經 數折地愈僻  
忽至野水岸 路斷行跡絕 欲問空無人 一鷺草邊白

遠游二首 錄一 蔣士銓

初日照林莽 積靄生庭闈 長跪拜慈母 有淚不敢垂  
力學既苦晚 可復無常師 負笈出門去 白日東西馳  
遠游幸有方 兒生未遠離 母心毋念之

兒食有齋粥 母母念兒飢 兒服有敝裘 母母念兒衣 倚閭勿盼望 歲莫兒當歸  
俯首聽兒言 丁寧語兒知 小妹不解事 視母爲笑噦 新婦亦善愁 含淚無言詞  
繁憂未能語 匪但離別悲 父車旣已駕 我行復遲遲 豈無寸草心 珍重三春暉  
仰看林間鳥 繞樹啞啞飛

二月二十日以病新愈命同兒赴貴陽書寄劉仙石書年觀察五

首錄一 鄭珍

病起忽若夢 不知此何節 惟見櫻桃花 滿山白如雪 憶我除日歸  
絕粒已半月 居然不許死 天意豈無說 持杯勸口飲 汝窮命真鐵

卽事 鮑桂星

庭陰兩三樹 簷鳥四五聲 悠然午夢回 緩步巡階行 階前一壺酒 掃石還獨傾  
把酒下以書 一紙盡一觥 不覺夕陽夕 樹影膝上橫 山梨脆可飮 野莧紅可羹  
呼兒共脫粟 一飽有餘清

瓜步曉望 顧宗泰

片帆入空江 咫尺到瓜步 回看江上山 微茫隔煙樹 別浦曉禽飛 衝雲天外去

六言 九首

偶興 黃國袍

秋水路迷咫尺 野航人受兩三 載酒還來舍北 尋花卻過村南

題普門蓮社 徹字

戶外一溪野水 庭前幾樹名花 隔岸忽聞犬吠 江邨定有人家

邨居雜興 錄一 金蘭

兩岸花明柳暗 一樓山色湖光 橋東橋西酒店 溪南溪北漁莊

竹崎關 查慎行

佛桑花根犬吠 龍眼枝頭鳥鳴 漸覺山平水遠 郵籤報近榕城

從端江到桂林一路山水奇絕有突過天台雁宕者賦六言九章 錄二  
袁枚

前望不知去蹤 後望不知來路 山川如此遮攔 不見一船留住  
長繩牽上青天 一步船高一丈 分明水底山多 篙打亂山頭響

過牟直軒明達山居莫友芝

茅屋四圍桑竹 疏籬一帶雞豚 客來不用几席 共坐千年樹根

題畫 湯貽汾

此境不知何處 臨溪萬樹梅花 不是扁舟能到 更誰知有人家

除夕二首 錄一 蔣士銓

歲鼓通城爆竹 紅鐙兩岸酒樓 廿六年前此夕 有人同泊揚州

七絕 一百七十七首

洞庭詞二首 錄一 李念慈

綠樹平湖好卜居 數間茅屋一牀書 山家供客無兼味 手摘黃柑換白魚

真州西城觀荷 任錦心

一帶垂楊綠樹村 釣魚人坐古槐根 愛他臨水三間屋 十里荷花紅到門

途中紀事 陳士璠

月映湖光分外明 蘆花影裏一舟橫 夜深聞有鄉音在 曉起開篷問姓名

平水 童鈺

未曾五里已千溪 兩岸青山曲作堤 不見人家惟見竹 空中何處一聲雞

訪友不遇 王鑑

雙溪小逕曲欄斜 三月尋人不在家 夜靜更深風送月 亭前吹落刺桐花

汝陽道中 丁之球

沙垠衰草雨淒淒 水闊泥深路漸迷 風急雲低天欲暮 空林時有鷓鴣啼

野塘 車研

野水樹頭三兩家 夕陽橫抹酒帘斜 蝶穿籬出如迎客 一徑秋風紅蓼花

漁家 吳樹本

半篙秋水夕陽天 釣得鱸魚不賣錢 一曲高歌一尊酒 移舟穩臥荻蘆邊

送王東亭進士歸歷下 汪耀麟

六月離家五月還 一年遊屐未曾閒 春風秋雨冬來雪 看遍江南四季山

寄內 沈清瑞

識字聰明憶阿沂 彥兒可比舊時肥 年來也解牽娘袖 笑問阿爺何日歸

聞彭兒讀論語其母苦節望子詩以勉之周槩

兒衣兒食長兒年 兒母憐兒望眼穿 辛苦莫忘晨夜讀 買書錢是續麻錢

溪西 黃始

溪西人家秋水生 孤舟常自三更行 一聲啼鳥半江月 纔到兩山天欲明

春日竹枝詞 顧彩

西城山色淡於煙 城上兒童放紙鳶 昨夜一篙春水漲 小溪撐出看花船

憶西山則遠

去年梅子黃時候 記得山中正焙茶 小立竹西墻角畔 雨餘蛛網挂藤花

抵署 張藻

連朝話舊到更深 不盡婁江望遠心 莫怪老人添白髮 兒童幾輩換鄉音

村外閒吟 朱鳳翔

荷鋤時趁月明歸 稚子依依候竹扉 競說田家風味美 稻花落後鯉魚肥

東阿卽事 李翔

幾間茅舍傍山陽 柳綠桃紅簇小牆 犬臥花陰雞唱午 依稀風景是吾鄉



青茅港 周際華

深柳長榆繞徑栽 連陂草閣對江開  
村莊兒女歸家晚 都向田中揀麥來

龍溪口夜泊 蔡平世

敲岸停舟繫柳梢 且尋村酒醉今宵  
溪山深處無人伴 明月相隨過板橋

曹河 劉啓秀

兩叢野菊開茶竈 一港寒流洗樹根  
行客到來三丈日 山僧秋睡未開門

沔縣道中 蹇諤

新橋流水遠山斜 曲徑遙通三兩家  
亂石圍牆茅蓋屋 當門一樹紫薇花

春日遊張氏別墅 許秀貞

柳煙開處露柴扉 燕子將雛傍晚歸  
最好年光三月半 滿城兒女試春衣

寓齋卽日 談宣

階移日影柳橫斜 門掩蒼苔靜不譁  
燈火未來人去後 巡檐叉手數歸鴉

普利看梅 何弢

酒沾林外野人家 霽日當簷獨樹斜  
小几呼朋三面坐 留將一面與梅花

歸農 黃霖

我愛騎驢婦坐車 兒肩書籍僕挑花 出城未到青羊市 先問橋西賣酒家

揚州雜詩 費錫璜

朱樓綠樹影參差 芳草沿城水滿池 盡日城南無客到 落花紅滿范公祠

清明道中作 吳鏡

車聲轆轤櫓聲輕 半載山程更水程 忽見家家插楊柳 始知今日是清明

游一畝園 汪連

夾道濃陰帶晚霞 南山茶接北山茶 空林雨後無人跡 開盡朱藤一樹花

野步 陸溥

閒蹋春泥過野塘 杖藜隨處菜花香 柴門深鎖無人跡 一片蜂聲鬧夕陽

村居 盛大鏞

村家小豎也從師 日課神童四句詩 報向先生蠶事好 十觔繭做一車絲

夏日 李貞媛

臨水高樓菡萏香 閒看池畔玉鴛鴦 深閨盡日無人到 風過松梢一陣涼

溪陰 周再勳

數間茅屋枕頽牆 果子青青杏子黃 雨足桔槔聲暫歇 翠畦瓜豆已成行

三月過東山村後卽景 張銜

小徑東連遠路橫 桃花天氣半陰晴 莊園隔樹深難見 遙聽黃鸝四五聲

夏日雨後書興 萬國寧

雨後茅簷絕點埃 蕭蕭綠竹映蒼苔 呼童莫把柴門掩 捲起湘簾待月來

鶴頸灣晚望 李景黃

半黃衰柳弄殘霞 老屋敲斜水一涯 幾箇漁舟齊撒網 不知捉蟹與撈鰕

送莊子涵先生 李思曾

疎林紅葉響蕭蕭 孤艇衝寒趁晚潮 半夜烏噉霜正滿 一帆斜月過楓橋

輓張史亭先生 沈金臺

衰柳疎疎噪晚鴉 西風直入竹扉斜 草堂高臥人何在 開偏秋籬野菊花

舟次口占 沈金臺

寒雲漠漠風淒淒 高樹蟬鳴鳥復啼 扁舟日暮停何處 且過石橋楊柳溪

溪行 程增

遙天漠漠淡煙低 一片秋光在小溪  
獨坐篷窗聽絡緯 蘆花影裏夕陽西  
半帆細雨半帆風 篷底村醪倒未空  
忽聽數聲柔櫓響 賣魚船出小橋東

寄懷家大人秦中 高瑛

獨攜襖被向秦川 僂指歸期應惘然  
茅店雞聲霜月白 故鄉兒女正安眠

秋花 蘇棻

疎疎細雨滴蒼苔 庭畔秋花一半開  
小婢不知人愛惜 亂和枝萼折將來

夜課 汪鈴

鏡怯寒威焰不青 忽聞急雪打窗櫺  
宵深未敢拋刀尺 爲伴孤兒課一經

絕句 呂霜

一年社日多忘了 忽見庭前燕子飛  
禽鳥也知勤作室 銜泥帶得落花歸

湖晚 梁孟昭

西子湖頭煙滿村 山窗風雨欲黃昏  
塔燈漁火參差出 爲怯清寒喚掩門

病起 陳素安

幾日無心課小娃 晴窗睡起自分茶  
重簾不捲紗幃靜 落硯何來數點花

山程 林以寧

遠山日落煙迷處 彷彿當年從此去  
浦口村童放犢歸 停驂借問來時路

繡餘吟 陳淑蘭

繡餘靜坐發清思 煮茗添香事事宜  
招得階前小兒女 教拈針線教吟詩

送胡崱孩赴長沙 王士禛

青草湖邊秋水長 黃陵廟口暮煙蒼  
布帆安穩西風裏 一路看山過岳陽

上己後二日吳陵舟中雨霰甚寒因懷家大人與家兄己次吳

江王士禛

小雪春陰水上城 背篷獨聽短長更  
吳船此夜松陵驛 又過姑蘇一日程

裂帛湖雜詠六首 錄一 王士禛

萬樹垂楊掃綠苔 桃花深映槿籬開  
遊人盡說西堤好 須及清明上己來

偶過東園 王崇簡

啼鳥聲中荒徑斜 深門亂木影交加  
一年好景無如此 開徧塔前野菜花

安寧道中卽事 王文治

夜來春雨潤垂楊 春水新生不滿塘 日暮平原風過處 菜花香雜豆花香

爲楊東川孝廉題畫 王文治

小樓初雨夢初醒 獨理殘書傍畫屏 溪童報道杏花發 折取一枝供膽瓶

曉發 王芑孫

野店寒深不可眠 僕夫催路五更前 荒雞未叫燈如豆 牽馬出門星一天

泊桃源縣 王昶

寒江無月水雲昏 山縣淒涼只似村 仙犬不鳴燈火靜 行人今夜泊桃源

龍眠道中四首錄一 田雯

忽見鷓鴣一隻飛 漁莊蟹舍雨霏微 前年過此曾投宿 野店斜陽水四圍

漁家 朱華

篷底炊煙出港斜 午餘進饌有魚蝦 柳陰映處將船泊 兒女鷓鴣共一家

尋梅 任昌運

幽居不識荒村路 風雪騎驢任所之 忽見疎籬落香雪 水邊竹裏半橫枝

道中雜題絕句錄一 江湜

苦竹敲簷笳出泥 破籬笆下透籬雞 山農於此有至樂 打穀在場兒亂啼

北湖晚眺 江璧

野塘西去夕陽斜 中有柴門三兩家 行盡板橋人不見 一灣秋水漲菱花

卽事六首錄一 宋犖

聚寶山頭日已曛 閒尋怪石踏飛雲 牧童樵子相傳說 拾時應來獻使君

絕句 吳嘉紀

白頭竈戶低草房 六月煎鹽烈火旁 走出門前炎日裏 偷閑一刻是乘涼

舟中二首 吳錫麒

彭彭魄魄打麥聲 啞啞軋軋縲車鳴 喚儂挑飯下田去 樹上一雞啼午晴

鷓鴣斂斂撲沙虛 小艇時來喚賣魚 水柵已過喧乍定 酒家門口卸帆初

日暮泊村口 吳清藻

夕陽西墮釣魚磯 兩岸行人喚渡稀 傍水柴門猶未掩 聽他聲引鴨兒歸

東城卽目 汪沆

菅茅作屋兩三家 獨抱寒塘一徑斜 行盡竹林人不見 隔離吹過野梅花

江行口占五首錄一 沈心

高枕看山不計程 陰陰綠樹畫眉聲 片雲欲雨猶未雨 天外一峯忽晚晴

由羅江至中江夜行 李調元

逢人便問艾家壩 遙指松林山外村 天近黃昏行不到 星星燈火出蓬門  
嶺上疎星煜煜明 四鄰悄寂各無聲 東家犬吠西家應 知是行人冒夜行

夏日四首在大女何氏家中作時方寡居 錄一 李調元

車水田中水不加 炎天辛苦是農家 涼棚少婦弓鞋小 手帶嬰兒足踏車

見賣薔薇花作 李調元

喚賣薔薇三月天 兒童爭戴幾枝鮮 老人見此顛狂甚 欲購囊無大版錢  
時錢有大版二版之別

早發 李鼎元

晨心欲落亂飛鴉 樹色河聲一道斜 暗裏有香尋不見 薰風吹綻馬蘭花

夏日行柯山裏邨 李慈銘

溪橋縹度庫篷船 邨落陰陰不見天 兩岸屏山濃綠底 家家涼閣聽鳴蟬



夏日至邨後官瀆水口菴閣上小憩 李慈銘

檻外荷花水接天 閒來僧閣枕書眠 茶香睡足鉤簾起 藤榻槐陰聽晚蟬

家書封後函背又批二十八字 李慈銘

書到應將二月時 復書已及暮春期 柯山桃李南湖柳 春事皆須報我知

將赴贛擬泊舟璜溪 邱維屏

浮藍渡口欲黃昏 稚子牽衣送出門 問我扁舟何處泊 前頭笑指尙書村  
原注璜溪爲大司空董仲儒公故里

冬日草堂漫興四首 錄二 邵長蘅

臥病不出經半月 當門黃葉尺來深 呼童掃葉汲溪凍 供給寒齋擁褐吟

霜凍日斜景易昏 野夫竟日掩柴門 地爐芋魁煨徑尺 穉子賒酒不出邨

東皋雜詩 錄二 杭世駿

東郭人家近野塘 水村南畔足幽香 今年十日雨八九 苦竹編籬補壞牆

莎徑斜編種樹笆 茆檐低稱野人家 紫茄白苧青蠶豆 小雨吹成五色花

訪高雲逵不值 金蘭

短笻橫谿小徑斜 昔曾來處路非差 綠楊門巷都相似 誰是高三十五家

谿上卽目 二首 金蘭

一聲潑刺浪紋鱗 無數遊魚戲綠蒲 恰有霽泥船隻過 兩竿夾得菜花鱸  
牧豎成羣戲水涯 摸魚射鴨更撈蝦 放青牛逸過橋去 喫白一畦蠶豆花

過黛湖 金蘭

黃梅雨歇路猶滑 喚隻小船划過橋 十里煙痕青不斷 慈姑葉與蒨薺苗

戊午上元夕抵家 金和

船對潮行去艣遲 到家已是月高時 迎門兒女先調笑 錯過春燈酒一卮

布幔和德尹二首 錄一 查慎行

背日開簾更覺涼 午陰屋角漏微光 呼兒勤掃蜘蛛網 方便花時蝶過牆

雨後 查慎行

便從一雨望豐年 大抵人情慰目前 我比老農還計短 只貪今夜夜涼眠

魚溝看桃 查慎行

一村桃間一村柳 日氣射花紅撲鞍 此事今年真過分 江南江北兩回看

從峒晤騎騾至紅花埠 查慎行

銅嶠小驛勃姑啼 路入徐州漸向西 若要看花須趁早 防他一雨便成泥

過青山弔田間先生示懷永懷玉兄弟及令姪廷益三首錄一 查慎行

田塍高下路敲斜 小雨濛濛早稻花 到此不愁迷失道 讀書聲裏是君家

清明日南湖泛舟 查慎行

積雨初霽交清明 桃花杏花飄滿城 城南水色綠於酒 鵝鴨一灘春草生

和竹垞沙谿舖 查慎行

山田早插綠秧齊 小犢新生未架犁 閒背村童浮水去 牛欄只在岸東西

水口 查慎行

雨餘忽飄雨數點 山外更添山幾層 六百里灘多過盡 也如出峽到夷陵

西湖櫂歌詞十首錄一 查慎行

漁家小女髮如油 新向湖干學盪舟 也道城中妝束好 碧波回眼看梳頭

病後過竹垞先生齋 查慎行

偶因風雨宿君家 倦枕無眠到曉鴉 起向曝書亭上坐 一池荷葉兩三花

蒙陰縣南十五里早飯豆棚花下 查慎行

荒溪曲折凡三渡 草屋敝斜只半間 不負一餐留客坐 豆花棚下看蒙山

丹陽卽目 查慎行

連橋旁有小車行 不斷伊鴉轆轤聲 夾岸坡陁帶殘雪 麥苗青上曲阿城

上元雨中獨登虎丘二首 錄一 查慎行

上元無月亦無燈 十里山塘冷欲冰 夜泊扁舟寺門外 梅花樓下弔詩僧

靈州縣齋清明 查慎行

已過上巳卽清明 一月天纔兩日晴 記取靈川好風味 新茶新豆到山城

早秋湖上二首 錄一 查初揆

金沙港口歸舸遲 看花又過錢王祠 白蘋開邊東西路 祇有划船小女知

重九後一日同竹樓放櫂西溪尋秋雪菴 錄一 查初揆

魚弟漁兄話夕陽 舍南舍北山柿黃 城中晚飯不歸去 煨芋如拳勸客嘗

臨江官舍詠桃樹 施閏章

短牆茅屋似山家 小樹窗前帶雨斜 記是老夫經手種 春風滿眼見開花

多結塘 洪亮吉

多結塘邊雨似麻 沿途風峭尙飛沙 無人知道春將半 時有出牆紅杏花

偶成 洪亮吉

客來半不知名姓 到卽隨堂住幾時 醉後忽然長揖去 主人不問僕難知

皖江雜詩 姚瑩

迎江寺前江月生 迎江塔下江水清 行人塔下船初泊 齊聽寺中鐘一聲

贈漁童 姚瑩

兩三土屋傍河干 十五兒童解釣竿 賣去素鱗歡阿母 糶把幾日足朝餐

寄魚門 袁枚

江南江北路迢遙 同是門前水一條 一日兩家流得到 如何人不似春潮

二月十二日 袁枚

紅梨初綻柳初嬌 二月春寒雪尙飄 除卻女兒誰記得 百花生日是今朝

客至 袁枚

看山終日踏雲立 忽聞竹外叩門急 手整衣冠出見賓 鞋底還粘幾黃葉

阿珍 袁枚

阿珍十歲髻雙丫 又讀詩書又繡花 娘自怒嗔爺自笑 不知辛苦爲誰家

卽事 袁枚

盆梅三株開滿房 主人坐對心相忘 偶然入內女兒怪 問爺何故衣裳香

湖上雜詩二十二首 錄二 袁枚

月明如水浸沙隄 隄上游行一杖攜 惹得家僮沒尋處 夜深孤坐斷橋西  
范公祠裏藕花居 四十年前我讀書 今日再來人不識 自家一步一躊躇

一寺在萬山凹處晚間獨步 袁枚

四面青山繞作城 簷前雨滴殿中晴 細看不識來時路 轉問僧從何處迎

寄家書作 孫源湘

書寄一千三百里 去時剛值月初弦 初三數起十三日 書到君邊月正圓

觀荷 錄一 孫源湘

蜻蜓蝴蝶兩飛忙 撲葉穿花翅盡香 一對閭村小兒女 貪撈蓮子水中央

探菊玉松山房花事零落籬落四五枝都無佳者 錄一 孫源湘

曲逕疏籬傍水隈 扁舟特地看花來 老翁搖手向余道 好種今年盡不開

李小霞古木寒雲小景 孫源湘

翠微深處有人家 曲逕層層古木遮 如此寒雲天欲雪 閉門明日看梨花

雨中作 孫源湘

憑闌日日望花開 等得花開奈雨來 蝴蝶不知雙翅重 雨中飛去又飛回

清明節送鎔齋師歸 徐師謙

寂寞林花三兩枝 柳隄煙鎖雨如絲 輕風短棹春江早 正是鄰家上冢時

村行 高鼎

牧笛聲中踏淺沙 竹籬深處暮煙多 垂髫村女依依說 燕子今朝又作窠

村居 高鼎

草長鶯飛二月天 拂隄楊柳醉春煙 兒童散學歸來早 忙趁東風放紙鳶

晚步 高鼎

萬斛松濤翠滿衣 籬門開遍野薔薇 白頭人把漁竿坐 笑指兒童看燕飛

題畫西湖小景 錄一 高鼎

野橋西去酒旗斜 一帶疎籬幾樹花 認得白沙隄上路 如何渾不見吾家

宿楊村 符曾

臨河野店席爲門 一盞殘燈掛壁昏 未曉寺鐘催客起 始知身臥在楊村

今年 郭麐

今年十月好年華 麥秀漸漸柳吐芽 七十老翁誇未見 鄰家一樹碧桃花

寶應道中 郭麐

新綠簑衣一翦齊 牧兒列坐柳陰低 舉頭貪看客船上 不覺犍牛浮過溪

三月九日夜作 郭麐

預恐老人起送我 下船隱約未三更 三更四更不成夢 夢醒忽然聞鷓聲

谿莊探梅用鐵厓體作七絕句 錄四 郭麐

溪西卽是問心菴 溪北梅花開向南 女兒見梅不肯折 卻折野花照水簷  
嘉善北門有梅花 嘉善北門無酒家 過橋小店不生火 當門少婦閒喫茶  
昨日小雨不到夜 溪水略無半尺強 扶藜野老指我看 豆葉未青菜葉黃  
黃公約我明日去 亦有老梅幾十株 只愁昨宵風色惡 兩株綠萼已開無

春村 張維屏



隔水人家柳數行 柳邊風過水生香 定知園裏花無數 蝴蝶一團飛出牆

村居雜詩十首錄一 傅山

老人曳杖出門去 布襪芒屨不怕泥 行到前村石橋上 春冰映綠柳條齊

水哉行三首錄一 彭而述

五月八日大水來 四城水道一齊開 幾畝菜園飄沒盡 白龍直上釣魚臺

穎然僧話雨中 彭而述

小園二月花垂垂 斜壓三枝間兩枝 恰喜大堤僧見訪 正逢穀雨煮茶時

雞聲 焦循

雞聲催起獨徘徊 屋角牽牛花正開 幾點疎星半輪月 晨光一片自東來

海棠二首謹步家君原韻 錄一 焦廷琥

村居過客未全稀 小飲山廚筍正肥 同向海棠花下坐 滿身紅雨落飛飛

郊行 程嗣立

十日清明穀雨來 麥苗市地碧於苔 見人牽犢過田去 知是前村種豆回

誰莊雜詩四首 程嗣立

前日梅花開似雪 昨來桃放又成霞 一春忙煞看花眼  
闌內牡丹新迸芽  
溝水東西抱小橋 兩行榆柳間山桃 春來足疾惟耽坐  
策杖花前日幾遭  
青草原頭送客歸 綠楊溪上對斜暉 瞥然一片花驚墮  
便有雙雙蝴蝶飛  
獨坐茅亭午不譚 天光雲影淨無涯 無端小犬吠牆角  
知有閒人來看花

平定山行雜詩錄二 喬松年

白白紅紅桃李花 石闌茅屋兩三家 山坳更有垂垂柳  
飛絮漫天打客車  
籬根菜把任橫斜 戶外椿條剪嫩芽 紅豆黃粱炊已熟  
更燒柏子飯胡麻

寓齋卽事 楊峴

龍王廟外雨如麻 龍王廟裏人喫茶 老夫一月病不出  
開到牆頭鴨腳花

小園 趙翼

小園不設繚垣遮 麀眼籬編六枳斜 一樹桂花風過處  
聽他香到別人家

卽事 蔣士銓

燕子樓東酒旆斜 雞埘豚柵幾人家 短籬黃蝶忽驚去  
飛上野田蕎麥花

歸程雜詩錄一 劉嗣綰

聽盡村歌是牧童 田家無事只編蓬 茆亭縛得低低好 一帶高樓正畏風

曉起 鄭梁

不知秋到梧桐落 還是梧桐落始秋 昨夜西風天際響 朝來一葉挂牆頭

逢客入都寄勛宗上人口號 鄭燮

汝到京師必到山 山之西麓有禪關 爲言九月吾來住 檢點白雲房半間

澉浦績麻曲十首 錄二 錢載

春來不忙多績麻 田家女兒雙鬢鴉 山香插髻且須插 不采菜花蠶豆花

春來忙也總隨孃 一年績麻那必忙 紅襖青裙齊換了 觀音山北喚燒香

菜花魚歌二首 錄一 錢載

一湖南北兩湖長 水網牽還岸網張 燕子飛來山笱出 菜花魚上菜花黃

寄章傑 錄一 嚴元照

種得芭蕉幾許長 小闌干外伴新篁 無邊生意眼前足 還有一階秋海棠

立夏日作 時以久 嚴元照  
雨斷屠

登盤只有新蠶豆 不見櫻桃石首魚 半月山中連夜雨 送春歸去意何如

鸞宅嚴可均

小時貧鬻東村宅 轉徙西村又范村 苦憶先人勤手植 百盆花卉一無存  
小時貧鬻東村宅 五十年來六徙家 我卻在家仍似客 暫歸三宿卽天涯

吉水卽事二絕錄一 顧嗣立

雨洗江干見草芽 青青竹屋覆山家 日高深院無人過 牆外風吹枳壳花  
曉過平望 顧嗣立

閨門放權到盤門 落照疎林已半昏 一覺醒來聽笑語 曉風吹過水邊村  
梁溪道中 顧宗泰

家家臨水啓柴門 春店燈寒月色昏 指點去年沽酒處 芙蓉溪外綠楊村  
沂水道中 顧宗泰

訪河橋外景徇幽 才過鵝莊又棗溝 回首城南三十里 清波幾曲是沂州  
稚子 左錫嘉

青門瓜下綠茸茸 稚子尋聲捕草蟲 忽轉砌坳無覓處 驚飛胡蝶過牆東  
舟行春望 席佩蘭

五里青山十里谿 春光綠到板橋西 桃花流水清明路 一帶湘簾卷未齊

春夜懷兩妹 席佩蘭

愁絕梅花一半殘 高燒銀燭夜深看 月明樓上聲聲笛 人倚春風第幾闌

抵郡寄妹 席佩蘭

半葉輕帆艣一枝 金閨亭畔雨絲絲 朝來聽得吳娘語 卻憶閨中笑語時

春分日看花憶妹 席佩蘭

去歲今朝尚在家 別來回首隔年華 春風偶卷珠簾起 妬殺庭前姊妹花

望餐花所居 席佩蘭

兩家門巷總城東 竹筵花叢望自通 一角小樓人不見 紅闌干在綠陰中

春晴 席佩蘭

二月春寒轉更加 東風吹雨溼窗紗 今朝偶揭湘簾看 錯過櫻桃一樹花

惜花起蚤圖爲趙若冰賦 錄二 席佩蘭

爲花日日祝春晴 花半開時睡不成 一夜蕭蕭窗外竹 錯疑風雨到天明

開簾草草整雲鬢 步出閒階見月彎 猶道不如雙蛺蝶 一生眠起在花間

卽事 陸蘭垞

曲折籬牆傍水開 落紅一雨點蒼苔  
芹泥滿地日初暖 燕子一雙花外來

裏湖櫂歌 凌社媛

波光綠浸柳陰陰 新種魚苗小似鍼  
五日東風三日雨 裏湖水比外湖深  
輞川莊外浪迢迢 攜得青罇復碧簫  
商略儂舟泊何處 嫩寒春曉段家橋

七律 十七首

早行憶岐山兄 吳縉

忙着征衫起五更 殘星未沒又登程  
人從斜月天邊去 馬向孤村夢裏行  
弗店雞聲剛斷續 亂山雲影漸分明  
知君留滯京華久 也有思鄉涕淚橫

喜兒子至 丁倬

悲歡一見兩情俱 再拜堂前手自扶  
次第平安詢母妹 從容笑語到孫雛  
魂驚連日江濤惡 體怯秋風病骨癯  
莫向阿翁感憔悴 年來贏得白髭鬚

老友旣庭暨王子咸中連許過予山莊 汪琬

湖山數曲接橫塘 閒有嘉賓款草堂  
三升黍酒傾香碧 一寸蔬芽翦嫵黃  
穉子倘能供灑掃 小妻猶足任排當  
明月滿庭花滿徑 爲君隨意設繩牀

消暑 汪琬

從來消暑無奇策 惟有杜門推第一  
齊紈團扇暫離手 粵葛短衫微露膝  
梧桐葉大涼陰生 梧牀棐几樂如何  
竹牀棐几樂如何 讀書與睡中分日

修花館卽事 錄一 吳嵩梁

老屋三間近小園 白沙翠竹亦江村  
小婦貪書如課女 衰親健飯爲添孫  
偶然臨水思移艇 頻年暗淚知多少  
除是游山未出門 纔得全家笑語溫

新市鎮 吳清鵬

北上辭家初百里 鄉音漸變近吳興  
比戶人家多種竹 沿湖兒女解歌菱  
雲溪橋轉通孤棹 幾回泛宅思移住  
水市樓明動萬燈 風俗從來素儉稱

正月二日 吳清鵬

老去光陰常愛惜 纔過一日便流連  
關心樂事惟正月 到眼明朝又小年  
準擬客來挑菜會 預商家集上燈筵  
排頭次第都須記 十五元宵月更圓

秋山曉行 查慎行

忽從山麓上山椒 忽轉山腰路一條  
露草燈明雞喔喔 風林月黑馬蕭蕭  
行人曉起偏多伴 古渡秋來未有橋  
正是新涼好天氣 喜逢霧色又連朝

自湘東驛遵陸至蘆溪 查慎行

黃花古渡接蘆溪 行過萍鄉路漸低  
吠犬鳴雞村遠近 乳鵝新鴨岸東西  
絲纒細雨沾衣潤 刀剪良苗出水齊  
猶與湖南風土近 春深無處不耕犁

大姊索詩 袁枚

六句誰把小名呼 阿姊還能認做吾  
見面恍疑慈母在 徐行全賴外孫扶  
當前共坐人如夢 此後重逢事恐無  
留住白頭談舊話 千金一刻對西湖

秀州道中 郭麐

細柳生枝桑努芽 小寒食節客還家  
灣頭新水嫩於草 樹杪流雲明似花  
淺醉未嫌村酒薄 敝眠時任幅巾斜  
故人應遲歸來晚 昏黑柴門尙可搗

偶然作 屠倬

湖面不開三里闊 市梢略有幾家存  
先生擁被不親見 童子推篷爲我言



已過蘆墟應小泊 倘沽村釀一傾樽 今宵更比昨宵好 月白全無水氣昏

九日登高 焦廷琥

霜落風寒朔氣催 秋山紅樹白雲隈 半天木葉凌空舞 一綫湖光自北來  
酒榼不因佳節設 菊花仍傍短籬開 孤村日暮漁舟小 好逐煙波帶月回

閒行 湯貽汾

布穀聲中新稻齊 短童隨我竹橋西 昂頭白鷺溪三尺 沒足黃牛雨一犁  
淺草逐門成細徑 暗潮推艇入平隄 閒行底事歸來晚 卻伴漁翁醉似泥

早行 黃遵憲

隄長已歷八九折 柝擊猶聞四五更 涼風吹衣抱衾臥 殘月在樹啼鳥聲  
東方欲明未明色 北斗三點兩點星 腐儒饑寒苦相迫 驅車自唱行行行

聽子玉讀書有感 端木國瑚

古人二十曰成人 原自童年志已新 壯歲讀書憐弟苦 少時失學嘆家貧  
五更燈火三間屋 一卷文章六尺身 同是成名俱不易 高堂心事日諄諄

沙灣放船 端木國瑚

恰好新晴放野航 輕鷗個個出迴塘 一溪綠水皆春雨 兩岸青山半夕陽  
時節剛逢挑菜好 女兒多見採茶忙 沙頭剩有桃花片 流出村來百里香

### 七古 樂府附 六十一首

#### 販茶行 潘高

東嬸人家西嬸虎 日黃家家閉門戶 昨夜食犬破山籬 數日不上茶山去 四月初頭正棟  
花 有人過山來買茶 行人居人各舉手 山中借問平安否 山外穀賤茶價平 販茶且過  
揚州城

#### 賣子謠 李鑾宣

百錢賣一兒 千錢賣一女 小者五六歲 大者三尺許 十五五沿隄來 彳亍于于黃塵  
霾 老姆謂兒女 賣汝實痛汝 懷中一塊肉 棄作路旁土 老父謂兒女 賣汝乃愛汝  
朱門酒肉臭 但去無所苦 癡兒癡女不知離別難 從人略賣衣褲單 衣單單 心悒悒  
兒長爲奴女爲妾 竈前竈後背人泣

#### 賣牛行 曹林堅

牧童面色如死灰 十牛五牛穀棘來 今宵牽向城外宿 城裏明早喫牛肉 牛兮食我草  
牛兮耕我田 無田無草那養汝 養汝那得到春天 夜半餵牛對牛哭 牽牛進城牛有犢  
牛乎爾勿怨 聽我語與汝 賣汝得錢能幾許 有男賣男女賣女

拆屋行 曹楫堅

水連牀 牀連屋 大兒小兒盡匍匐 牀前浙米牀上炊 那有乾薪一兩束 黑夜沉沉兒墮  
水 夫叫妻號救兒起 不聞兒啼兒已死 鄰家有小船 兒女安穩眠 我家無船屋裏住  
水來更向何處去 不如拆屋取屋材 粗案細桷併一堆 兩頭用繩縛作筏 漂東漂西波汨  
汨 未定一家誰死活

饑民船 湯禮祥

饑民船 何連連 船頭乞食船尾眠 自從六月遭大水 性命孤懸一船裏 船有時而南  
船有時而北 有時中流風怒號 大船小船行不得 行不得 泊何許 後村已過前村遙  
浪花如雪淚如雨

踏車山 顧豫

朝踏車 夜踏車 三日八日食一瓜 老農呼天兒呼爹 誰人知我踏車苦 含涕朝來告田

主 田主宿醒苦未醒 野睡風牕呼不騰

### 山居 大成

一株兩株老松青 松下結個小茅亭 三日五日來一次 肩荷柳栗手持經  
讀經讀到山月出 聽松聽罷天落星 適然拋卷松間臥 夢與松根乞茯苓

### 孤兒行 李化楠

孤兒早起行採薪 手皴足凍鼻酸辛 上山多狼虎 下山多惡狗 孤兒了不畏 但畏家中  
兄與嫂 浩浩風雪 枯葉蕭騷 一束不成悲且號 腹中饑餓身上單 雖有捶楚安得逃  
但免腹中饑餓身上單 雖有捶楚安得逃

### 賣兒行 費錫璜

人生貧 慎勿賣兒 賣兒不若殺之 請告丈人 天寒無衣 腹中苦饑 有兒安得不賣兒  
人生貧 但當夫婦兒女同賣作他家奴 慎勿賣兒 賣兒不若殺之 兒有過 主人當笞  
兒無過 主人當笞 兒早行出門 爲主人擔水 擔水歸 辦飯煮糜 又爲主人網鹿豕  
與糜 兒日午爲主人牧羊牧牛 兒腹飢 主人不知 兒離牛羊五步十步 主人知之 主  
人笞兒兒急呼 重復笞之 主人笞兒 兒不敢啼 謂兒伴死 重復笞之 兒呼亦笞 兒

不呼亦管 兒無大罪過 何用管兒爲 兒頭無毛 臀無皮 臂如黃瓜 面如青梨 兒是爺娘心頭肉 頭髮是爺娘心中絲 親爺見兒 淚下如綆縻 多謝丈人 人生貧 切勿賣兒 賣兒不若殺之

### 來日當遠奔行 費錫璜

來日當遠奔 囑咐兒三兩言 兒生不辰 逢此大艱 今年奔命逃 懼兒不獲全 爲兒作衣袋 緊着兒身邊 中有菜菔大豆牛肩 兒渴食菜菔 兒飢噉荳及牛肩 慎勿啼哭漣漣 哭於中野 阿母不得爲兒憐 囑咐未及終 淚出如流泉 倉皇入山口 賊勢如風煙 烏鳥一分飛 渺若天與淵 三覓終不得 痛哭大河邊 昨日囑咐兒言 舍置勿重宣

### 賣兒啼 黎恂

風蕭蕭 兒無衣 雨飄飄 兒苦饑 無衣且饑 何以育兒 前月兒父死 賒買三寸棺 比鄰索棺價 剝啄詬門前 賣兒抵棺價 兒往生處樂 斷守娘何爲 冀免填溝壑 南山有烏 母將其雛 啄粟飲水 俯仰自如 嗟我與兒 曾不若南山鳥 送兒出門 去 青山朝似暮 佇立且須臾 目斷山前路 兒亦不必啼 兒亦不必悲 兒如娘已沒 娘如未養兒 囊旣無錢與米 那不爲奴與婢 但願兒入貴人家 好視小郎與女公子

解七  
兒去矣 莫號咷 娘入門 黯魂消 仍無衣 風蕭蕭 仍苦餓 雨飄飄 解八

召伯埭上作方說

前年埭上望 湖水白連天 今年埭上望 麥浪青無邊 欲尋舊日買魚處 田家便是打魚戶 記得門前白板船 藕花香裏人來去

田父詞 田璜

雨濛濛 流淙淙 溝塍傾 忙山農 草蓑竹笠煙霧中 轆轤不鳴新苗綠 牛下溪潭低舐犢 抱兒閒看雞啄粟 倦向北窗晝眠足 三時歷盡雁南飛 高隴卑蛙稻梁肥 促婦開缸且釀酒 酒熟呼樽共鄰叟

刈禾詞 吳智

今年禾又熟 枯黃到平陸 刈時歌 鷓時哭 收來一畝無一斛 公私租債遞追促 牛賣男亦鬻 阿男號咷呼爺更呼叔 賣牛留其犢 犢子大時牛可贖

哺兒詞 感舟人子 不作也 彭紹升

朝哺兒 夕哺兒 兒饑兒飽惟母知 母哺兒 寧言疲 兒索母 無是非 兒半夜 方苦啼 索母 起作糜 糜不熟 兒還啼 解衣乳兒兒方嬉 兒勿嬉 有客爲爾長涕洟

人生誰無阿母慈 爾生如我當知之

養蠶詞 繆嗣寅

蠶初生 采桑陌上提筐行 蠶欲老 夜半不眠常起早 衣不暇浣髮不簪 還恐天陰壞我

蠶 回頭分付小兒女 蠶欲上山莫言語

采茶詞 繆嗣寅

采茶采茶山之曲 正值前山新雨足 采茶采茶山之陽 采得新芽不滿筐 同伴三三復五

五 踏徧危巖與深隴 一春生計在山中 儂家那得辭辛苦

踢塘車 方薰

去年踢塘車 田中赤裂飛黃沙 今年踢塘車 田中澆泱多魚蝦 去年一旱三五月 今年

風雨橫交加 踢車一日 雨落一尺 水深轉車足無力 雨中踢車愁徧仄 昨日前日不得

息 今日已暮仍乏食 雨不止 車不休 田中水 禾沒頭 眼中淚 車上流 子鬻去

妻難留 妻難留 道旁哭 來日何人共車軸 踢塘車 聲鞭鞭

母抱兒 鄭世元

母抱兒 兒在懷中噤 我兒且勿噤 村中榆樹剝盡皮 三日不食氣一絲 那得有乳哺汝

餓 抱兒出門去 負兒行道周 不知東西與南北 仰面乞食低面羞 行人來往各恹恹  
嗚呼 誰能救汝母子命

### 舟中短歌 方濬頤

下水船 順風駛 一晝夜 二百里 天明不肯秦郵棧 高張布帆權師喜 到廣陵 半日耳

### 孤兒行述翟氏乞者 包世臣

孤兒沿街泣 跣足履霜行乞食 面瘦如鬼肢無股 勞君道旁爲酸楚 孤兒生 孤兒生命未爲劇苦 兒年似昔上弟時 爺提娘抱 不知凍飢 爺娘今棄我 阿弟早遭此禍 無柴無米 詎養我弟 嚴冬雪漫漫 阿弟襖薄不耐寒 并我破極 勿謂我被霜風膚裂不完 晨出望煙火 君子周給我乞不得 中心愴悲 欲之他 未知否可 願得吾弟腹果 願得吾弟溫飽長大 孤兒下去地下黃泉 見爺娘 我無過

### 朝雨下 吳嘉紀

朝雨下 田中水深沒禾稼 飢禽聒聒啼桑枯 暮下雨 富兒瀟酒聚儔侶 酒厚只愁身醉死 雨不休 暑天天與富家秋 檐溜淙淙涼四座 座中輕薄已披裘 雨益大 貧家未夕



關門臥 前日昨日三日餓 至今門外無人過

傅谿孤子行追挽徐鏡如處士 吳嘉紀

傅谿水 濺濺流 谿上羣兒嬉遊 誰者兩稚子 登臺攀樹枝 太息夷猶 太息維何 他人有父有母 我兄弟亦人 命運獨罹愁苦 歸睽吾祖母 頭白身羸 前來挈孤 思欲存此二孤 貧家尚有機杼 山月在簷夜織縑 雞鳴天曙起織素 縑素各成匹 里姥購去孤兒食粟 孤兒衣布 孤兒稍稍成人 堂堂齒耄矣 不能苦辛 呼弟行買 東適江淮南適越與閩 蕪陰春暮榆綠 日晚榆上老鴉啼 遊子心腸斷 負米返故山 雲深路不明 入里詢祖母 鄉鄰指丘塋 長跪丘塋前 我非祖母何繇生 蒼穹廣大恩難名 恩不報 作人何爲 呼天號泣 涕下霑衣 不如早就下泉 題書與弟 好視吾一雙黃口兒女 一慟便去下泉 噫歔歔 去不歸 祖母孫子長依依

青萍港 吳嘉紀

青萍港 樹鬢鬢 野煙入河河水黑 來船去船樹根繫 人家門開鵝鴨歸 酒店月出藤蘿細 模糊缸底釀 鮮新網來鱖 村無盜賊客有錢 買君一醉高枕眠

灣港謠 吳嘉紀

郎刺船 儂夜炊 飯熟共郎食未畢 船頭已見飛鷺鷥 鷺鷥飛下三蚌 水大船輕到灣  
港 樹鳴東淘雞 海黑三塘岸 來到灣港程一半

贈方生詩四首錄一 吳嘉紀

天都方子雲直樸慷慨少年以至孝稱於鄉比居南梁室稍饒樂善好施久勿怠也鄉里  
人德之請老夫賦詩

乞藥詞

乞藥乞藥 父病馬嶺 醫住白岳 白岳暮去曉始來 一月去來三十回 峭壁陰長山月落  
松風瑟瑟猿啼哀 不愁草中出猛虎 只愁堂上臥老父 低頭嘗藥雙淚垂 藥味不及兒  
心苦

戲擬石湖九九數熱歌而小變其體不作吳語似較近雅也 吳清鵬

一九數頭九 洞房女子初停繡 二九一十八 村塾兒童半散學 三九二十七 來往行人  
樹下歇 四九三十六 農夫隴上不歸宿 五九四十五 埃過炎天六月暑 六九五十四  
盼得新涼早晚至 七九六十三 漸漸豆棚人去散 八九七十二 沿街乞子多愁思 九九  
八十一 夜作家家燈火集

歲暮今樂府分詠得收租船 沈曰富

貸主一畝田 爲主耕一年 一年筋力主不知 田熟主來收取之 雞飛鶻亂 租船到岸  
舍南收租舍北歎 主言需一石 農言祇八斗 八斗米色佳 一石米色醜 農家自此升斗  
無 主人猶欲追宿逋 君不見 主人收租豈得已 主家尙少官倉米

送曾青藜之江甯尋令兄庭聞并簡 邱維屏

十五年前一送君 十五年後君再行 老夫更添十五歲 難子還爲行路人 行路人 那可  
道 南京卻比北京好 君家阿大知不知 邊水邊風容易老

苜蓿頭 金和

苜蓿頭 斜陽低 苜蓿頭 腹中飢 我呼苜蓿來 其人面目如黑煤 身有敝枷脚無鞵  
是男是女相疑猜 試問何太苦 不覺淚如雨 自言今年已十五 去年喪父兼喪母 千錢  
賣作童養婦 阿姑畜之如畜狗 秋天日斫柴一航 冬天日拾糞一筐 春來苜蓿可作菜  
掘之使到城中賣 每日須賣二百錢 歸家許食菜蔬饅 錢多不加一勺饅 但缺一錢與一  
鞭 此菜一斤四錢耳 賣五十斤方稱是 力小還須去復來 出城入城二十里 昨日缺錢  
晚未食 今日強行更無力 菜葉行已枯 一錢仍未得 我呼家人卽賜飯 叩首當階呼不

願 願人盡買菜青青 但不受鞭餓何怨 餓何怨 鞭不支 且進飯 休涕洟 汝言未終  
我心碎 復與百錢啣而退 吁嗟乎 童養婦 前生讐 童養婦 終年囚 童養婦 水中  
泗 童養婦 火中投 君不見 苜蓿頭 君不聞 苜蓿頭

全椒南郊晚步 金和

書聲琅琅梅花香 一時吹送春風忙 知有人家不知處 山雲溪水天茫茫 燒火難灰草心  
綠 夕陽漸放人影長 獨步五里不忍去 半身新月山昏黃

鴉拾粒行 查慎行

牛前仰而犁 鴉後俛以拾 牛豈爲鴉耕 鴉因牛得粒 農夫呵牛長苦饑 不如鴉羣飽食  
東西飛

賣菜婦 姚燮

賣菜婦 街頭行 上有白髮姑 下有三歲嬰 賣菜賣菜 叫遍前街後街無一贖 昨日  
宜單衣 今日宜棉衣 棉衣已典 無錢不可贖 嬌兒瑟縮抱娘哭 娘胸貼兒當兒衣  
娘背風淒淒 但願兒煖兒弗哭 兒哭剝娘肉 莫道贖衣無錢 牀頭有錢 牀頭有錢三  
十餘 買得一升米 煮粥供堂上姑 餘錢買麥餅 爲兒餽 得過且過 明日如何 明

日天晴 賣菜街頭行 明日天雨 妾苦不足語 姑苦 兒苦

不寐 袁枚

一聲兩聲雞初鳴 四更五更天未明 羣雞亂啼聲漸迫 紙窗漸露東方白 病人夢短冬夜長 燈花墮几鼠鬪梁 頭自伏枕目自張 四十年事如何忘

野寺 袁枚

兩三間屋一溪水 庵久無僧佛墮几 香灰滿地旋作風 松鼠銜旛亂搖尾 我來誤踏野葛花 驚飛蛟蝶成團起

坐永嘉花船渡溫溪 袁枚

溫溪之水淺且清 舟人棄漿持篙撐 風急水衝撐不上 入水扶舟人踏浪 水中生山來阻舟 一溪分作雙溪流 推開篷牕清見底 坐聽篙聲打石子

從杭州起身到蘇松毘陵京口所過故人家輒留一宿 袁枚

七十七翁老如許 三年一看西湖雨 歸來處處作勾留 累得家家具雞黍 諸公休問重來期 此事茫茫非我主 慣說不來偏又來 無顏再作欺人語

禽言 孫源湘

泥滑滑 田婦踏車脚不韞 今日車水明日乾 東家秧枯西家拔 爾莫憂 泥滑滑  
架架格格 架架格格 扶犁下田土似石 大家插蒔且努力 西南角上片雲黑  
脫卻破袴 身上莫顧 穀再糴 種再播 一斗穀 一石糧 秋時糴穀補爾裳  
婆餅焦 阿婆看孫田裏苗 熱風吹水水易消 海塘作壩截住潮 婆心更比婆餅焦  
情急了 天奈何 六月盡 七月過 家有老 野無草 雨不來 情急了  
提壺盧 去沽酒 村北村南久無有 勸君莫更向前沽 前村米無麥也無  
得過且過 打麥推磨 麥再食盡大家餓 大家餓 且莫傷 官來催租身已亡

### 耕田歌 陳恭尹

耕田樂 耕田苦 樂哉樂有年 苦哉不可言 春未至 先扶犁 霜華重 土氣肥 春已  
至 農事始 雞未鳴 耕者起 泥汨汨 水光光 二月稻芽 三月打秧 五月收花 六  
月垂垂黃 再熟之田始有望 三月打秧 六月薈草 一熟之田 九月始得獲稻 近路畏  
馬 馬食猶寡 近水畏兵 兵刈何名 上官不問熟不熟 昨日取錢今取穀 西鄰典衣東  
賣犢 黃犢用力且勿苦 屠家明日懸爾股

### 田家行 陸繼輅

麥苗平遠似春水 暮山依微碧波裏 村前籬犬吠向人 鷓鴣拍拍驚飛起 濃陰沈沈最深處 兒童騎牛自來去 野人無事不入城 蘿衣卻掛門前樹 一聲兩聲橫笛風 一枝兩枝桃花紅 青鞋布韉我亦足 便欲相從結茅屋

阿桐生日 郭麐

客子歸家百事情 匆匆略遣一日過 兒童年歲俱不知 但覺今年比前大 今年住家一月餘 稍稍熟習親不疏 阿茶早起索背書 阿桐最小欲挽鬚 阿桐肩隨阿姊後 讀書不多略上口 布衫曳地腰領寬 趨走已作儒生酸 問渠生年才九歲 更知生日今朝是 旁有吾妹爲我言 猶記八年前日事 渠母生渠在外家 阿母走看啼啞啞 明朝兄自淮陰回 盡室語笑爭喧嘩 兄時作詩以志喜 但恨阿耶不見耳 阿母聽之悲喜半 願爾生兒及我見 嗚呼人事安可知 骨肉團圓異昔時 詩成阿母那能聽 弟妹聞之各淚垂

下河熟 郭麐

揚州蘇州水接連 官塘繚路皆茫然 村村雜樹短於薺 安問高田與下田 下河農夫大權喜 七月早禾齊割矣 已將二麥輸田租 鶯舍隆隆碾新米 揚州禁米不出界 蘇州有米不賤賣 此時妬殺下河人 家家飯糲已嘗新 下河之熟爾休妬 年年放水官長怒

潯陽江口作 彭孫遜

鱗魚村對潯江下 伐荻爲門竹爲瓦 清江無主終古流 處處江魚隨意打  
賣魚歸去日未中 呼兒作黍餉阿翁 江鄉六月薦新穀 破釜炊出桃花紅

贈別姜奉世 曾燦

西風瑟瑟吹庭院 臥病寒窗對書卷 與子雖然隔一城 似無三日不相見  
二月扁舟到蘇臺 桃花飛盡榴月開 至今梧桐看又落 游子何曾歸去來

番薯吟 有序 焦循

定海諸生李巽占家赤貧謹於事母授徒里外每食必歸食已復至主人怪之詰以故久  
之乃曰家貧母食番薯何忍獨飯也學使訪得實表之又給以金始卻不肯受語以歸養  
母乃感泣再拜持去

母食米 兒食薯 母心不豫 母食薯 兒食米 兒能不泣涕 海水洶洶浪拍天 中有斯  
人行獨賢 使君與金謝不受 無名得此身之咎 使君曰 汝勿卻 姑買市中珍 歸爲賢  
母藥 李生叩首納金去 兩眼紛紛淚如雨

鰵魚口 焦循



才過露筋祠 又入鰐魚口 舍去大船乘小舟 一湖菱葉橫魚留 雨後湖田早稻肥 田邊野鳥見人飛 農夫相見說田事 不問長安幾日歸

北新橋春望 盛大士

半林殘花一溪水 春盡江南三月裏 溪南移船溪北停 斜陽渡頭楊柳青  
渡頭家家種楊柳 何處青帘賣春酒 輕風一路颺頭香 犢背兒童笑招手

山行三首呈稚存丈 錄一 劉嗣綰

山田一頃雲一層 水色綠透高低塍 人家不辨水表裏 日暮村村笛聲起  
笛聲過處生晚涼 牧童太閒我太忙 下車無言顧我僕 我欲從之抱黃犢

孤兒行 鄭燮

孤兒躑躅行 低頭屏息 不敢揚聲 阿叔坐堂上 叔母臉厲秋鋒錚 阿叔不念兄 叔母不念嫂 不記瘦嫂病危篤 枕上叩頭 孤兒幼小 立喚孤兒跪 牀前拜倒 拭淚諾諾  
孤兒是保 嬌兒坐堂上 孤兒走堂下 嬌兒食梁肉 孤兒兢兢捧盤盂 恐傾跌 受笞罵 朝出汲水 暮莖芻養馬 莖芻傷指 血流瀉瀉 孤兒不敢言痛 阿叔不願視 但嘗死去兄嫂生此無能者 嬌兒着紫裘 孤兒着破衣 嬌兒騎馬出 孤兒倚門扉 舉頭

望望 掩淚來歸 晝食廚下 夜臥薪草房 豪奴麗僕 食餘棄骨 孤兒拾齧并遺膾羹  
湯 食罷濯盤浴釜 諸奴樹下臥涼 老僕不分涕泣罵諸奴 骨輕肉重 乃敢凌幼主  
高賤軀 阿叔阿姆聞知 閉房悄坐 氣不得蘇 終然不念覺冤孤 老僕攜紙錢 出哭  
孤兒父母 頭觸墳樹 淚滴墳土 當初一塊肉 羅綺包裹 今日受煎苦 墓樹蕭蕭 夕  
陽黃瘦 西風夜雨

### 後孤兒行 鄭燮

十歲喪父 十六喪母 孤兒有婦翁 珠玉金錢付其手 蒲葦繫盤石 可以卒長久 縱不  
愛他人兒 寧不爲阿女守 丈丈翁 得錢歸 鼠心狼肺 側目吞肥 千謀萬算伏危機  
姥曰不可 翁曰不然 令孤兒汲水大江邊 失足落江水 隣救得活全 丈丈聞知復  
活 不謝隣舍 中心悵然 朝不與食 暮不與栖止 孤兒蕩蕩無倚 乞求餐飯 旬日  
不返 外父外母不問 曷論生死 夜宿野廟 荒葦茫茫 聞人笑語 漸見燈光 綠林  
君子 勒令把火隨行 孤兒不敢不聽從強梁 事發賊得 累及孤兒 賊曰冤 故官亦  
廉知 丈丈辣心毒手 悉力買告 令誣涅與賊同歸 西日慘慘 羣盜就戮 顧此孤兒  
飢如瑩玉 不恨已死 痛孤冤毒 行刑人 淚相續

寓舍偶然作 錢大昕

風濺濺 雨瀟瀟 泥滑滑 路悠悠 水行風打頭 陸行石礙脚 人言出門苦 不如在家樂 在家未全樂 出門未全苦 婦歎我不聞 兒囑我不睹 夜投逆旅 主人延客 村酒一瓢 以永今夕

洪山女歌 錢載

洪山女 芋田掘泥 掘泥坐田裏 我往見 芋葉青 今來見 芋頭紫 及秋此收 及春行復種此 一女翻耙打蕎麥 數女挽車辱池水 收芋喚還家 當不養喫 丈夫明當入市 嗟哉我行人 我不如 女勤止

賣耕牛 魯一同

賣耕牛 耕牛鳴何哀 原頭草盡不得食 牽牛躑躅屠門來 牛不能言但嗚咽 屠人磨刀向牛說 有田可耕汝當活 農夫死盡汝命絕 旁觀老子方幅巾 戒人食牛人怒噴 不見前村人食人

各各作工 魏際瑞

各各作工 受苦雨 當寒風 二月新絲五月穀 算來何曾餘到儂

無錫訪張光燾不值留題齋壁 嚴可均

君家太湖北 我家太湖南 數年一會面 會面旬日談 繁花深巷舊時路 聞說遠遊歸期  
誤 今我尋君不見君 他年尋我知何處 曲阿城外拊橋闌 九龍山高霧雪寒